

JA ØGYAJPX̄Y JA ØMYADYA'AKY MIDI JA LUCAS YJAAY

Ja Teófilo ya'at yiktanija'ayi

¹⁻⁴ Migu'uk Teófilo, may ja jaa'y tō tjajaadyanwa'andi tyimyjade'en ja madya'aky sam øøts ja nmigu'uk tō t'ejxti pōn ja Jesús kyudanaadyip. Nayide'en sam øøts ja tō nyiktuk'ejxyin, sam øøts ja tō n'ixpikyin, jade'ents ja tjaja'wa'andi pōn jaty t'ejxtøø tnija'widøø sa jaty cho'ondaajky. Ja'ats tō pyudøkiyidi jøts ja øgyajpxy ømyadya'aky ja tkajpxwa'kxtit. Nay tøts øts ja nbemuky ngonmuky ti jaty tuujnøø ku ya'at øgyajpxy ømyadya'aky cho'ondaajky. Ixyamts mets ja jade'en ndyimdyanijayi, jøts wa'ats xnijawit ja tiy'ajtin, sa jaty tō myiknøjmi ku ja tō myiktukmadøy yø'øbi ixpøjkin.

Ku ja ankilis tnigajpxy jøts ku ja Juan Bautista kyaxø'økwa'añ

⁵ Ixyam idø'øn cho'onda'aky ja madya'aky. Ku dø'øn ja Herodes wyinaty rey'aty jam Judea, jamts ja teety wyinaty tu'uk chøøni pōn txøøw'ajtp Zacarías, ja' y'ijty møøt tyuñ tukpiky ja teetyøjkti pōn yiktejp Abías. Elisabet ja ñidø'øxy xyøøw, teety Aarón ja tyeety'ap'ajtmip.

⁶ Janch øy jaa'y idø'øn ja amajtskti, pyaduuñidip idø'øn Dios kyutujk ja' pōni ti ja yikta'ana'amdip. Jade'ents ja ka'ap pōn sa ñii'mxyidi, jade'en ja ka'ap pōn pyøky'ijxyidi.

7 Ka'ats ja y'u'nk ja teedi, ni ja Elisabet ka'ap ja y'u'nkpaaty, tyimyajaa'ñidi ja namajtsk wyinaty.

8 Xjats tuk'ojk ja Zacarías yjaa'y tyaja'jtidøø jøts ja ttuujnidit ja windsø'jkin ja Dios.

9 Jade'en idø'øn ja tkostumbri'atti ku ja teetyøjk ja jade'en tyaja'adyidi, winets ja tniwøjti pøn jap uktøkíp jap mā ja Dios yikwindsø'øgi, mā poom tyøy. Xjats Zacarías ja ojts tyimdyaja'adyi, ja' ja poom ojts tyiktøy.

10 Ixam ja poom wyinaty jade'en tyøy, jøts niduki'iyi ja mayjaa'y ixap yjanchapkaajpxmidi jap tsaptøjkwimpy.

11 Winets ja Zacarías t'ejxpaajty tu'uk ja Dios y'ankilis jøts ku ja jap aga'ñ'ampy tyani mā ja poom yikpikta'aky.

12 Ku Zacarías ja ojts jade'en t'ejxpaaty, ni sudso'ampy ja kya'ukwinmaa'nbyatni, tsø'øgi ja janchyik'o'jkniiyip.

13 Xjats ja ankilis ja ñimaaajyøø:

—Zacarías, kidi mdsø'øgi, tø Dios mgajpxaajkin mmado'oxiyi jøts pyaatp mnidø'øxy Elisabet tu'uk ja mutsku'nk. Mbaattip m'u'nk tu'uk, Juan ja mdukxøøw'attip.

14 Mdaxonda'akp ja' mdajotkujk'atp ja', jøts may ja jaa'y ja nayide'en ttajotkujk'attit ku ja kyaxø'økt.

15 Ja'ats møk nøjkx ja kunuu'kxin tmøø'taty jam Dios wyingujkp. Niwine'enin ja nøø ja kkatunk'att, ka'ap ja y'amu'ukyjaa'y'att. Jaayip ja Espíritu Santo tyuktatøjkniiy ja wyinmaa'ñ yam ja ka'aním myiñ naḡwiiiñ.

16 Ja'ats ja Israelit jaa'y tyukja'myatsp tyukja'byaatp ja Dios Teety jadigojk.

17 Jawyeen ja Juan mye'ent, jaanimts ja nwindson'ajtim mye'ent. Nayide'en winmaa'ñ nayide'en kutujk ja tmime'ent sam ja Dios kyugajpxyin, ja Elias'ajtpi. Jade'ents ja u'nkteety u'nktaak ja tyikjotimbett, jøts ka' ti tsep niti aki møøt chøønidiit y'u'nkti y'una'jkti, jøts ñayikmado'op ja' pøn kidyimyadoodip. Jade'ents ja tyiktøøjit tyiktuudaajkit ja jaa'y wyinmaa'ñ jøts ja tjøp'ejxti ja nwindson'ajtim.

18 Jade'en ja Zacarías yiknimaay, xjats ja ankilis ja t'amidøøy:

—¿Sudso'ampy øts ya'at ndajotkujk'att jøts ku yø tiy janch, pø tum møjaa'ñits øøts amajtsk?

19 Xjats ankilis ja y'adsojøø:

—Gabriel'ajtp øts, jøts Dios ø nmidumpy; ja' øts idø'on tø xkexy jøts mets ya'at aaw ayuujk ndukmado'ot.

20 Jabi ka'apxi jatyi tø xmibiky sa me tø nnøjmi, tants inet uum, jaanim me mgajpxt ku ja m'u'nk kya'axt. Jatp kubatp idø'on ya'at jade'en sa ø tø nwa'añ.

21 Ixap idø'on mayjaa'y t'awejxti ja Zacarías, maadyip tajtip ja jap ku ja jadine'en tyañini jeky jap tsaptøjkjøtpy.

22 Xjats ku ja pyidsiimy, ka'ap y'aaw y'ayuujk ja t'ukyajkni, jøts ja tyimyjatyi tja'gyukidøø kudamik ja wyinaty tø y'eixjøøxy y'eixma'aty jap tsaptøjkjøtpy. Nugo ja ja'ayi tñidoni, tøyi ja wyinaty y'uu'mni.

23 Kuts xyøøw ja ojts tyika'pxy winaak xøøw ja wyinaty tø yiktaguwani t'adsøønit ja tsaptøjk, winets ja ñøjxni tyigam.

24 Jøts ja ñidø'øxy Elisabet ja nay jatyi yjøtpy'ajtñi ku ja et ja xøøw jade'en y'uknajxy, magoxk po' ja y'ijty jap tyøkjøtpy jadine'en ja kya'ukpidsømni. Yide'en ja wyinmay jøts ja wya'añ:

25 “Ja'agøjxp Dios tø ttuñ ja may'ajt jøts øts ja jaa'y xka'ukmi'ajknüyit.”

Ku ja ankilis tñigajpxy jøts ku ja Jesús kyaxø'økwa'añ

26 Xjats ja Dios kidudujk po' tkejxy ja y'ankilis Gabriel jam Galileit naxjotp mā ja kajp txøøw'aty Nazaret,

27 jøts ja t'ats'ext ja tø'øxyøjk pøn txøøw'ajtp María, øy yikxon ja yjaa'y'aty. Niwa'añ ja wyinaty y'ejtñi jøts ja tmøøt'amajtskit tu'uk ja yaa'dyøjk midi txøøw'ajtp José, ja rey David y'aptatsk.

28 Xjats idø'øn ankilis ja jam tñidøjkiyiñ mā ja jam wyinaty chøøni jøts ja tñimaay:

—¡Dios køjxp ngajpxpøø'kxy, tø ja mmay'atyiyi! Ixa mets ja nwindson'ajtim møøt m'ejtñi; tø ja Dios njantyimgyunuu'kxyi ku nadyu'uk tø myik'a'ejxi wine'enin mdø'øxyøjk'atti naxwiiñ.

29 Kuts ja twin'ejxpejty ja ankilis jøts ku ja jade'en myigajpxyi, ñigyumaap ja ty-imyja'wyiyiñ, jade'en ja kø'øm ñawyinmaa'nxyiyi ti ja jade'en ttakajpxpoo'kxyiyip.

30 Jøts ja ankilis ñimaajyøø:

—María, kidi mdsø'øgi, tø Dios m'øy'ijxyiyi, mjanchtajotkujk'ajtip ja'.

31 Mjøtpyiyip mets, mbaatp tu'uk mmajnku'nk, JESÚS ja mduxøøw'atp.

³² Møk winmaa'ñ møk kutujk ja myøøt'atp; Dios U'nk ja yiktejt, yikutujkpi Dios Teety ja pyikta'agiyit sam ja y'apteety'amøj David,

³³ jøts ja wyindsøn'att jam Israelit y'etjotp xemikøjxp; niwindem ja kyutujk ja kyakøxt kyanaxt.

³⁴ Xjats ja María tyiktiy ja ankilis:

—¿Ti sudso dø'øñ ja ndejin jade'en yjatt? Pø ka'animts øts nniyaa'y nbaaty.

³⁵ Winets ja ankilis y'adsøøy jøts ja wyaañ:

—Ja Espíritu Santo mnimeniyip, jøts ja Dios Teety tsajpjøtpyt ja' myøk'ajtin jade'en mduniyip. Jøts paty ja niwine'enin tkayikpøktyu'unt, wa'ats ja y'ett midi idø'øñ myika'axp. Tø ja jade'en ttanibiktaagi jøts ja Dios U'nk yiktejt.

³⁶ Ñayi pyaätp ja mmigu'uk Elisabet myajnkun'nk tu'uk, øy idø'øñ ja yjamøjaa'yiñi. Ixyam ja tudujk po' kujk ttsøm'ity ja y'u'nk yam ja ka' tyimy'ukyikjøp'ijxy jøts y'u'nk ja tpaatt.

³⁷ Ka' Dios ti kyamayiyi.

³⁸ Xjats ja María wyaañ:

—Ane'emy øts ja Dios xyik'ity; wan øts ja jade'en xuñ sam ja tø wya'añin.

Winets ja ankilis jaty choo'naa.

Ku ja María ñijkxy jøts t'ats'ijxy ja Elisabet jam tyøjkwindum

³⁹ Jøts ja María nayi winet et anøø adsu'jky ojts ñijkxy jam kojpkjotp ma ja kajp wyinaty tu'uk jam Judeit ñaxjotp,

⁴⁰ jøts ja ojts tyøki Zacarías tyøjkjotp, jamts ja ojts tkajpxpøø'kxy ja Elisabet.

41 Kuts Elisabet ja jade'en tmadøøy ku María ja jade'en kyajpxpøø'kxyi, jatyi ja tyimya'wiyii'ñ yjotp ku ja mutsk y'adiijch, winets ja Espiritu Santo ja amuum tyatøjkiyøø.

42 Jøts ja yide'en møk yjantyimwyaañ:

—Tø Dios mjantyimgyunuu'kxyi ku tø myik'a'ejxi wine'enin ndø'øxyøjk'ajtindi naxwiiñ, jøts yø m'u'nk nayide'en tø yikunuu'kxyi.

43 ;Tyimdyi øts tyimbyøn øts ku øts nwindson'ajtim tyaagu'nk xkugajpxi!

44 Ja'ayi ja mgajpxpoo'kxin tø ndyimyadøy, jatyi øts n'u'nk ja xonda'agyti tø yjantyimyik'adi'ichiyi.

45 Nekim xønim mets ku ja tø xjanchjawi xkunuu'kxyjawi, jatp kubatp idø'øn yø jade'en sa yø Dios tø tyikutuky.

46 Xjats ja María wyaañ:

Øy tsuj ngunuu'kxyjawi ja nwindson'ajtim,

47 myinijkxpy øts n'aaw njoojt ja nDios Teety Yiknitsokpi.

48 Tønim ja Dios tnijawi jøts tø t'ejxjimbity ja y'u'nk ja myaay,

yamnim øts inet ejtp ejtni xoni nyiktejt wine'enin ja naxwii'ñit jaa'y yja'atti ya naxwiiñ.

49 Janch møj ja Dios myøk'ajtin ku øts ja jade'en tø xuñ;

pø wyandijpyts idø'øn yjanchwa'adsi yjanchkapøkmyøødi.

50 Ejtp ja tpa'ayo'ot pøn jaty ja windsø'jkiyip.

51 Tø tyikwingaxi'iky ja myøk'ajtin ku ja tø tmimajadaajki ja namyikaxi jaa'dyi wyinmaa'ñ.

52 Tø tyik'amutski pøn jaty kamaabyim yikutu-jktip,

jøts ja tø tyikjot'amøkpiky ja ayoobidi pøn jaty aay
pista'ak yik'ejxtip.

⁵³ Pøn jaty ayoodip winmaadyip, tøts ja tmø'øy ja
jotkujk'ajtín,

jøts ja kumeeñ jaa'y jadi'iñi wa'ats wiwøpy tø yik-
pagajxnidi.

⁵⁴ Tø ja tpudøki ja Israelit kajp ejxim ja y'u'nk
t'ejxkapyin;

ka'ap ja tja'dyigøypaty ja tø t'ayo'ixy,

⁵⁵ sam ja ojts yiktukmadowdin ja n'oktaakti ja
n'apteetyi, møøt ja Abraham, ku ja y'u'nk
y'una'jk jade'en kyakøxt kyanaxt.

⁵⁶ Xjats ja María jam tmøøtaa'nii'iñ tigøøk po'
ja Elisabet; ku jade'en ñajxy, jaanimts ja ñøjkxnāa
tyøjkwindum.

Ku ja Juan Bautista kyaxi'iky

⁵⁷ Xjats ja xøøw ja po' tpaajty juuni et ja Elis-
abet kya'axt. Jade'ents idø'øn yikaxi'iky tu'uk ja
myajnk'u'nk.

⁵⁸ Jatyi ja myigu'uktøjkti myigujøøndi
myigudøjkti ñimejnidi. Janch yikajxakp ja' ku ja
tnija'widøø jøts ku ja Dios wyinaty ja kunuu'kxin
møj tø myø'øyyi.

⁵⁹ Jøts ja kiduktujk xøøw tyiknøjkxtøø ja
maxu'nk jøts ja ejxa'an yikmo'ot ñe'kxkøjxp,
jamts ja tpikta'akwajnnidi ja xyøøw sam ja tyeety
xyøøw'atyin Zacarías.

⁶⁰ Jøts ja tyaak, ka'ap ja tkupiky, yide'en ja
wyaañ:

—Ka', ka'ap yø jade'en txøøw'att. Juan yø
xyøøw'atp.

⁶¹ Xjats ja yiknimaay:

—¿Tiku yø jade'en yiktejt? Pø ka'ats ja mmigu'uktøjk jade'en pøn txøøw'aty.

62 Winets ja tyiktøødøø ja u'nkteety ti tyukxøøw'atp ja y'u'nk, nugo ja ttanidonidi.

63 Jøts ja ojts t'amidøy tu'uk pedasi ja puu'yu'nk ma ja tkøxajjyit ja xyøøw, xjats tpiktaajky: “Juan yø xyøøw.” Jøts ja jaa'y ñigyumaap yjanchjajttøø ku ja t'ejxtøø jade'en.

64 Jøts ja Zacarías nay jatyi ojts y'awijy jadigojk, jatyi Dios ja tkajpxpøø'kxy, møk ja ttukmøjawi.

65 Ja'agøjxp ja ñigyumaap tja'widøø ja tøk'ayø'øbyidi, jatyi ja ojts tkajpxyø'øgyojti sa wyinaty tø yjaty kyubety, jøts ja yiknija'wiyii'ñ wine'enin ja Judeit jaa'y jam chøønidi y'etjotp.

66 Pøn jaty ja jade'en tñimadoodip, nugo ja tkumayidi tkudajidi jøts ja xem yam ñayiktiyidi ñay'amidøyidi:

—¿Ti yø tyu'ump, ti yø pyaatp yø mutsku'nk ku yø yaakt?

Jabi janchmøøjyipts ja Dios kyunuu'kxin yø'.

Ku ja Zacarías ja Dios yikajpxøø

67 Xjats ja Zacarías ja Dios tyukajpxøø ja ayuujk ku ja wyinaty tø tyatøkiyi ja Espíritu Santo, jøts ja wyaañ:

68 Janch møj ja Dios ja kyunuu'kxin tmø'øy ja Israelit kajp,

ku tø tñimiñ tñija'aty ja y'u'nk y'una'jk wine'enin adøm ja xja'ajtindi, tøts nitsoojkin ja xukpaajtyim.

69 Tø ja tu'uk tkexy ja yikutujkpi pøn xuknitso'ok'ajtindip ja nbøky, nay ja David y'ap y'ok pøn y'ijty ja Dios tmidump.

70 Jade'en sa ja Dios Teety jawyeenip ojts
ttuknigajpxy ja kyugajpxy,

71 jøts ku ja xaniguwandujtin ja nmidsep ja
nmi'ajkibi jøts niduki'iyi pøn x'øy'ejxim
xka'øy'ejxim,

72 jøts ku ja ndeety'ap yik'ayo'ejxtit ku ja ka'ap
tja'dyigøy ja y'ayuujk.

73 Ku ja wyinaty tø twanda'aky, jade'en ja
ndeety'amøj Abraham yiktamiwandaagi

74 jøts ku ja xukmimadaajkin ja nmidsep,
jøts ja jotkujk nmidu'unin, nisudso ngatsø'jka'ant,

75 øy tsuj tiy janch ndsinaa'yindit, jade'en ja
nwindso'jka'andit ejtp.

76 Jøts mets u'nk, mets ja Dios tsajpjøtpyit mguga-
jpxy'atiyip,

kumi mets ja jaa'y wyinmaa'n ja myiktøjip
myiktuudaajkip jøts ja nwindso'n'ajtim
yikjøp'ext,

77 jade'ents ja jaa'y tnijawidit jøts ku ja mye'ent
yiknitsokpi jøts ku ja pyojkpimaa'kxt.

78 Jadine'en ja Dios xtsøjkyim xpa'ayø'øyindi jøts ja
xanikejxyim ja y'u'nk ja yiknitsokpi,

79 ja'ats xyikwejim xyikajim, kujaj kudøø'kx
xyiktsinaa'yindit. Ja' xukmajtstujtimp ja
nga'ødyu'unin ja ngugoots'ajtin,

jøts ja xuk'ejxint xuknija'wa'ant ja tsinaa'yin midi
øy midi tsuj, jotkujk'atyim Dios wyingujkp.

80 Jade'ents ja mutsku'nk ye'jky, møk møjaaw,
wijy quejy, jøts øy tsuj ja winmaa'n tjagyepy. Jøts ja
y'atsinaay jawyeen jam abak etjotp mā niti kya'ity,
winetnimts ja ñanky'ejxi mā ja Israelit jaa'y jamdi.

2

Ku ja Jesús kyaxi'iky

¹ Xjats ja møj windsøn Augusto winet et ojts tni'ane'emy møk'ampy jøts ja naxwii'ñit jaa'y niduki'iyi yikjaamyuktit.

² Ja Cirenio jam wyinaty Siria kudunk'ajtp ku dø'øn ja jade'en miduk'ojk tjaamyuk'okwāndøø ja jaa'xyøøw jøts ja jumøjt.

³ Xjats ja jaa'y jade'en ñøjkxti kyø'ømgajpkøjxpti, jøts ja xyøøw jøts ja yjumøjt tkøyaktit jam.

⁴ Jade'en'ampyts ja José jam Galilea chøø'ñ mā ja kajp txøøwi Nazaret, jøts ja ñøjkxtøø Belén jam Judeit y'etjotp mā ja David wyinaty tø kyaxi'iky, kumi ja' ja José tyeety'ap'ajtpy.

⁵ Patyts ja jam tmøøtnijkxy ja María jøts ja tkøyaktit ja xyøøw ja yjumøjt, tøts wyinaty ja k-pxy ttunidi jøts y'amajtskidit. Jøtpynim ja wyinaty.

⁶ Winets ja y'u'nk ja nay jam pyaajtøø, jam ja ojts pyo'ga'pxy.

⁷ Jøts ja tpaajty ja yjagyooobu'nk, ojts t'abity jøts ja ojts tkø'øky jam jiyujkjøø'kx'ii'ñjotp. Ka'ap ja ja'taajk jam wyinaty tø ñibaadi, patyts ja jamyi tyāndøø.

Ku ja borreek'ejxpi ja ankilis pyaadyidi

⁸ Jamts wyinaty jiyujk'ejxpidi tsigi'ejxpidi wingon mā ja kajp txøøwi Belén, ja'ats t'ejx'ejttip tsunaxy'ampy ja byorreegidi.

⁹ Xjats ja jam jotmøñ t'ejxpattøø ja Dios y'ankilis. Jade'eñi ja jam tyimyikajtaajky mā ja wyinaty, jøts ja yjantymchø'jkidøø.

¹⁰ Nimaajyidibik ja ankilis inet ja'adi:

—Kidi mdsø'øgidi, øgyajpxy øy'ayuujk ø nmimimpy. Ja' mee ndukmadoowampy, ni'ijtyi ja jaa'y ja tjantyajotkujk'attit:

¹¹ tø ixyam kye'exy ja CRISTO, ja nwindson'ajtim, ja yiknitsokpi mā ja David jam kyugajp'ajty, ja' kyajpkøjxp.

¹² Ja' idø'øñ ja wyinaty ku inet xpaattit tu'uk ja maxu'nk mots'abidity kyø'øgyi jam jiyujkjøø'kx'ii'ñjotp.

¹³ Jaaktyimgyaxø'ktip inet ja may ankilis jam mā ja tyu'ukpi wyinaty, jøts ja Dios ja møk ttukmøjāwidi ttukunuu'kxyjāwidi, yide'en ja wya'andi:

¹⁴ Kunuu'kxy mets Dios Teety tsajpjotpit ku øy'ajtin tsuj'ajtin tyaky ya naxwiiñ naxkijxy, jøts ja jaa'y yikmo'odi pøn tmijotkujk'atwāndip ja Dios!

¹⁵ Xjats ku ja ankilis wyimbejtnidøø ku ja ñøjkxnidøø jap tsajpjøtpy, winets ja jiyujk'ejxpidi nixem niyam ñawyambinaxwā'jkidøø:

—Wants idø'øñ tja'myindi Belén, jamts ja t'ats'ijxyindi midi Dios tø xuknija'windi.

¹⁶ Xjats idø'øñ putyi ñøjkxtøø, jøts ja María jam ojts tjanchpaatti møøt ja José, janch jamdamik ja mutsku'nk tø yikø'øky jiyujkjøø'kx'ii'ñjotp.

¹⁷ Kuts ja jade'en t'ejxtøø, winets ja tñimadyaktøjkidøø sã ja ankilis ja wyinaty tø tyamimadya'agyidi ja maxu'nk,

¹⁸ jøts ja ñigyumaap yjanchjajttøø pøn jaty jam wyinaty.

¹⁹ Jøts ja María ja'myech ja tyik'ity sã ja wyinaty tø yiknøjmi, ja' ja wyinmaa'ñ'ajtnip.

²⁰ Xjats ja jiyujk'ejxpi wyimbejtnidøø. Møk ja Dios ja ttukmøjawidi ttukunuu'kxyjawidi ja agøjxp ku ja wyinaty jade'en tø t'ejxti tnijawidi jøts ku ja jade'en tø yjantyimjyaty.

Kuja maxu'nk Jesús y'atsyiktuk'ijxy ja Dios Teety tsaptøjkjotp

²¹ Kiduktujk xøøw ja mutsk ojts yikpiktaajki ja ejxa'an ñe'kxkøjxp jøts ja yikxøømøøy JESÚS. Nay ja' ttukxøøw'ajty midi ja María ja ankilis wyinaty tø tyukmadøyi ku ja wyinaty ka'aním tjøtpy'aty.

²² Xjats ku ja tiempi tpaajty wine'en ja wyinaty tø t'a'ejxidi wya'atsti sam ja Moisés kyutujk wya'añin, winetnimts ja maxu'nk ja jam Jerusalén ttaninøjkxtøø ja Dios.

²³ Jade'en'ampy idø'øn ja jade'en ttundøø kumi yide'en ja Dios kyutujk yja'ayi: “Tum Dios ja mixyuna'jk yiktamiyoxtip pøn jagyoobi'ajtp.”

²⁴ Xjats idø'øn ja jade'en t'atswindsø'jkidøø sam ja Dios Teety tø tyikutukyin: namajtsk naxpak, pøni ka'ats ja te winets ja tsapak nayide'en nama-jtsk yiktawindsø'øgit.

²⁵ Jamts wyinaty ja jaa'y tu'uk chøøni Jerusalén pøn txøøw'ajtp Simeón. Janch øy jaa'y idø'øn ja'. Yjanchja'myejchp idø'øn Dios ja'. Ja'ats idø'øn tjøp'ejx'ejtp ja Israelit kajp juunim idø'øn ja yjadyimy'uknitso'ok'att. Jam ja Espíritu Santo ja wyinaty tmøødi,

²⁶ jøts tø ja wyinaty twanda'aky jøts kunim ja jawyeen t'uk'ext ja Cristo pøn ja Dios Teety kyaxp, winetnimts ja y'ookt.

²⁷ Xjats ja winet ñijkxy tsaptøjkjotp, ja Espíritu Santo ja yiknøjkxip; kuts ja maxu'nk Jesús jam

wyinaty ja tyeety tyaak tɔ yiknijkxyi jɔts ja jade'en tpadundi ja kutujk,

²⁸ jɔts Simeón ja jam tnixajiyii'ñ kyø'køjxp jɔts ja tsaa'ñ'ijty, jɔts Dios ja ojts ttukmøjaWi ttukunuu'kxyjawi, yide'en ja wyaañ:

²⁹ Dios Teety, tɔts inet, wan øts inet jotkujk t'oo'kni. Tø xpaduñ ja m'ayuujk sã ø xnimaay.

³⁰ Tønim ø nwemp'ixy ja yiknitsokpi

³¹ midi tɔ xanibiktaagi ja naxwii'ñit jaa'y.

³² Yø' idø'on tu'ump ja may'ajtin jɔts ja jaa'y mja'myatstit mja'byaadit pøn ka'y'Israelitjaa'yidi.

Yø'øgøjxp idø'on yik'ejxkaptit ja Israelit kajp midi tɔ xwi'ixy.

³³ Xjats ja José janchñigyumaap yjajtøø møøt ja ñidø'øxy ku Simeón ja mutsk jade'en tñigajpxy.

³⁴ Winets Simeón ja kyunuu'kxmyigajpxidøø. Yikajxaktip ja' jɔts ja María yiknimaay, ja Jesús tyaak:

—Ejx madow, ja' yø mixyu'nk tɔ yiktanibiktaagi jɔts Dios Teety y'øy'ajtin ttukpaajtit may ja Israelit jaa'y. Nay mayts ja tkapaattit ku jaa'y yø may kyagupøkit.

³⁵ Jade'ents idø'on ja yiknijawit sã pønjabøn wyinmay y'am yjotp. Mdyimchaachkuwinmayip mets ja øy, tyimchaachjawip mets m'anmija'win ja'.

³⁶ Jamts wyinaty tu'uk Dios kyugajpxymi, Ana ja tø'øxyøjk xyøøw, ja Fanuel ñøøx, ja Aser ja y'aadsidip kyugojidip. Møjaa'tyigøynits idø'on ja'. Tyimy'unaj'kyi ja y'amajtskiyii'ñ jɔts ja ja'ayi wixujk jumøjtyi tmøøtsinaay ja ñiyaa'y.

37 Makta'pxy myaktaxk jumøjts ja wyinaty, jøts ejtpts idø'øn ja jap tsaptøjkjøtpy tmiduñ ja Dios xinaxy tsunaxy, y'amaay'ajtpy idø'øn ja', ka'ap ja tkugayi tku'uugi, ejtp Dios ja t'ajot'aty.

38 Ja Ana dø'øn jap ojts myiñ winet, jøts ku Dios ja ojts ja t'uktukmøjawi t'uktukunuu'kxyjawi, winets ja tnigajpxøjkijyñ ja mixy Jesús. Ja' ja tyukmadøpy pøn jaty wyinaty tjøp'ejxtip jøts ku ja Jerusaléngit jaa'y ñitso'ok'attit.

Ku ja wyimbettø yja'ttø jadigojk Nazaret

39 Xjats ja wyimbejtnidøø ñøjkxnidi jam kyajpkøjxp Nazaret, jam Galileit y'etjotp, ku ja jade'en wyinaty tø tpadungøjxidi ja Dios kyutujk.

40 Jøts idø'øn ja mixyu'nk jam jade'en yeeky, møj møjaaaw, wijy kejy. Dios ja amuum janty-imkyunuu'kxyip.

Ku ja mixy Jesús yikpaaty jam tsaptøjkjotp

41 Xumi nøjkxtipts idø'øn ja tyeety tyaak jam Jerusalén winjumøjt ku ja paski xøøw jam tpaaty.

42 Jøts ku ja Jesús yjumøjt wyinaty makmajtskni, winets ja ojts ñøjkxti niduki'iyi Jerusalén, jøts ja xøøw ja t'anøjkxidi kumi jade'en ja kostumbri.

43 Xjats ku ja wyimbejtnidøø xøøguixy, winets ja mixy Jesús jamyi tyaanaa Jerusalén, ka'ap ja José ja tkumaydi.

44 Jade'en ja wyinmaydi, jam ja tijy pyamiñidi mayjaa'y agujkp, jøts ja jade'en yø'øxyinajxtøø; jøts ja tja'ixaadyøø tjayiktøøddøø tjayik'amidoodøø ja myigu'uktøjkti pøn jaty ja møøt ñay'ijxy'atyidi,

45 nima ja tkapattøø. Xjats ja tniwimbejttøø jadigojk Jerusalén jøts ja jam t'ixaadyøjkidøø.

46 Kidigøok xøønim ja tpattøø, jamdamik ja wyinaty tsaptøjkjotp chøøni jam may kyajpxwejpì y'agujkp, jamik ja pyatmadø y jøts ja jam t'amidø y tyiktiy tyiktu'ugi.

47 Jøts ku ja jaa'y ja jade'en tmadoodøø, ñigyumaap ja tyimyja'widøø ku ja amwijy tsaachwijy, jøts ku ja tiy janch y'adsø y.

48 Xjats ku ja tyeety tyaak ojts y'ijxyi, ñigyumaap ja tyimyjaa'widøø jøts ja tyaak ojts ñii'mxyi:

—¿Ti, u'nk, jade'en myik'adøøjstip? ¿Ti øøts jade'en xjantyatump? Møk øø tø xjantyimyikjotmadyøki wine'enin øøts ixa njawidity, mjayik'ixa'ay.

49 Xjats ja Jesús y'adsøø y jøts ja wyaañ:

—¿Tiku ø x'ixa'adi? ¿Ti kidi xnijawidi ku øts nDeety yja' nduujniyit?

50 Niwine'enin ja tkaja'gyukidøø ku ja jade'en ñimaajyidøø.

51 Xjanimts ja tmøødidøø Nazaret, etpts idø'on ja myimadø yidi jøts ja tyaak nugo tja'myats'ijty sa yjajty.

52 Yaak'adøtspts ja Jesús, wej'adøtsp kaj'adøtsp ja!. Jade'ents Dios ja tyajotkujk'atyi ku ja jade'en y'ijxyi, jøts myigu'uk nayide'en yjotkujk'atti.

3

Ku ja Juan Bautista kyajpxwa'kxy abak etjotp

1 Makmojkx jumøjt wyinaty kujk yikutuky ja møj windsøn Tiberio ku ja Poncio Pilato wyinaty wyindsøn'aty jam Judea, jøts ja Herodes jam Galilea, jøts ja myiga'ax Felipe jam Iturea jam Tracnite, jøts ja Lisantias jam Abilinia wyindsøn'aty.

² Ja Anás møøt ja Caifás ja' idø'øn wyinaty mõjteetywindsøn'ajttip ku ja Juan, ja Zacarías myajnk, ja Dios tyukmadoji ja y'øgyajpxy ja y'ø'y'ayuujk jam abak etjotp.

³ Xjats ja ojts t'ayø'ø'y'abidsimy ja et jam mõj nõøba'am midi txøøw'ajtp Jordán, jøts ja jaa'y ttukmadøy jøts ku ja ñøbattit, jøts ja tyiktø'ødit tyiktuuda'aktit ja wyinmaa'ñ, wan tyiktigatsti ja chinaa'yindi winets ja yikpojkipimaa'kxtit.

⁴ Xjats ja jade'en yjanchtuuujnøø yjanchjajtøø sa ja Dios kyugajpxy Isaías wyinaty tø tjaadyañ ja ayuujk ku ja wya'añ:

Paty ja kugajpxy ñøjkxt jawyeen jam abak etjotp jøts ja myigu'uk ja tnøjmit møk'ampy:

“Awejxidi ja Dios y'ixpøjkin, yiktøwdi yiktuuda'akti ja mwınmaa'ñ yikxon.

⁵ Pønts ja kya'ukupøkp wan ja tyimyjapøni, ni'ijtyi ja tum jade'en tkupøkt.

Yik'øyip yiktuuda'akp ja' winmaa'ñ ku wyinaty pønjabøn tø wyınmaamyā'aty.

⁶ Jade'ents ja naxwii'ñit jaa'y ni'ijtyi t'ejxtit sa dø'øn ja Dios tyaky ja nitso'ok'ajtin.”

⁷ Xjats ku ja Juan ja mayjaa'y jam ñimejniyøø jøts ja tyiknøbatt, jøts ja tnımaay:

—iMee miku'! ¿Pøn mee tø mnii'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets ya nõbajtpi tø mmiñ?

⁸ Yikxon idø'øn mjaa'y'attit, wan idø'øn tyik'ijxy jøts ku ja mdsinaa'yin tø xyiktigatsti. Kidi mee kø'ømyi mnawya'añiyi: “Tixi ka'ap ti chøkyi, kumi ja Abraham adøm n'apteety'amøj'ajtyindip”; jøts ka'ats yjade'eni, ti Dios kamaajyip, øy ja pøn

ttukmigu'uk'att ja Abraham pøni pøn ja kø'øm y'a'ejxip.

⁹ Jøts tsojk ja nøjkx yiktiidyuñ pøn jaty tkami'øy'ajtíp ja Dios.

¹⁰ Xjats ja mayjaa'y ja yiktøøjøø y'amidoojøø:

—¿Ti øø ndu'ump? ¿Sudso'ampy øø nwinmaa'nbyaatt?

¹¹ Jøts ja Juan y'adsojimbijty:

—Pøni pøn ja pyikta'aky, pøni pøn ja yjujky'ajtin may'ampy tjagyajptíp, wants ja tmo'odi kujkwa'kxy pøn niti kidyimy'ejtxidíp; pønts ja kyaajyk yjøø'kxik jam, wan ja nayide'en møøt tjøø'kxwa'kxtit pøn ja kyaajyk y'uujkik kidyimy'ejtxidíp.

¹² Winets ja yikugubajtpidi myemidi jam nøbajtpi, jøts ja Juan yik'amidøøy:

—Windsøn, jøts øøts, ¿ti øø ndu'ump?

¹³ Jøts ja Juan ja y'adsoojidøø:

—Kidi kugujuu'ñ ne'egi ne'egi x'amidowdi, ja'ayi dø'øn mbadu'undíp sa kyutukyí.

¹⁴ Jøts ja tseptumbidi winaagin tyiktøømidøø:

—¿Jøtsimts øøts, ti øø ndumíp?

Xjats ja t'adsøøy:

—Kidi pøn o ti xpøjkxidi aguwanikøjxp, kidi pøn o ti xanitaayibyatti; tajotkuk'atti ja mmijuu'ndyi.

¹⁵ Ixjam idø'øn ja mayjaa'y wyinaty y'awejxti, ja' ja tyajotkukiwyandíp, yide'en idø'øn ja wyinmaydi jøts ku ja Juan ja' idø'øn Cristo.

¹⁶ Jøts ja Juan ojts tnigajpxy, ttukmadøøy ja mayjaa'y:

—Tiy janch ɪxyam ndyimdyukmadowdi jøts ku øts yø'øyi tø nnimiñ jøts meets ja nøø nduktanøbattit; jats ø tu'uk ɪx'oojk xpamiñ pøn meets ja Espíritu Santo mduktatøkiyip, jøts ja' tmime'ent ja tiīdyu'unin. Møk'ampy kutujk ja tmimiñ, nija'baat ø xkapaat'aty jøts øts ja nugo nwinaxt.

¹⁷ Jade'en ja ttu'unt ja naɣwii'ñit jaa'y sam ariin yikwigumyín. Abiky ja tpiktaajkit ja y'ak jøts ja tnið'øty ja jøøn midi nijuuni kape'tsp, jøts ja ariinbajk abiky yikpøkjø'økt, jade'ents idø'øn ja jaa'y yiktu'undit sam pønjabøn tmi'øy'aty tkami'øy'aty ja Dios.

¹⁸ Jade'en idø'øn ja Juan ja t'ana'amin'aty, jade'ents ja ttukmadøy ja mayjaa'y ja øgyajpxy ja øy'ayuujk.

¹⁹ Ñayi wyingugajpxiyii'ñ ja møk ja windsøn Herodes ku ja tnið'øxy'aty ja Herodías, ja myiga'axy Felipe ja ñidø'øxy, jøts ñayi tyamigajpx ja' sa jaty ja jam wyinaty tyundigøy;

²⁰ xjats ja Herodes ka'ap ja tmøjpikta'aky, jaaktyimdyundigøøy ja', ojts Juan ja tyikpuxøktøki.

Ku ja Jesús ñøbety

²¹ Ku ja Juan wyinaty ka'aním yiktsumy, ku ja jam tyiknøbejty ja mayjaa'y, winets ja Jesús jam ñøbajtmøø; ɪxjam ja wyinaty Dios'ajot'aty ku ja tsajp y'awaajch

²² jøts ja Espíritu Santo ja jade'en ñigida'agyi ejxim tsapak, wa'ats ja yik'ijxy, winets ja Dios Teety y'ayuujk yikmadøøy, yide'en ja jap tsajpjøtpy wyā'añ:

—Øts me n'U'nk'ajtpy; ndsøky'ajtpy mets jøts njantyajotkujk'ajtpy mets.

Ja jaa'dyi pøn jaty ja Jesús tyeety'apip

²³ Ee'pxmajkin ja Jesús wyinaty ja yjumøjt ku ja tyunk ja tjøpwa'jkiyi'iñ. Nømdip idø'øñ jøts ku ja teedyi ja José. Jøts ja José tteety'aty ja Elí,

²⁴ jøts ja' ja Matat, jøts ja Matat ja Leví. Jade'en ñabyayø'øyi Leví ja Melqui, Melqui ja Jana, Jana ja José,

²⁵ José ja Matatías, Matatías ja Amós, Amós ja Nahum, Nahum ja Esli, Esli ja Nagai,

²⁶ Nagai ja Maat, Maat ja Matatías, Matatías ja Semei, Semei ja José, José ja Judá,

²⁷ Judá ja Joana, Joana ja Resa, Resa ja Zorobabel, Zorobabel ja Salatiel, Salatiel ja Neri,

²⁸ Neri ja Melqui, Melqui ja Adi, Adi ja Cosam, Cosam ja Elmodam, Elmodam ja Er,

²⁹ Er ja Josué, Josué ja Eliezer, Eliezer ja Jorim, Jorim ja Matat,

³⁰ Matat ja Leví, Leví ja Simeón, Simeón ja Judá, Judá ja José, José ja Jonán, Jonán ja Eliaquim,

³¹ Eliaquim ja Melea, Melea ja Mainán, Mainán ja Matata, Matata ja Natán,

³² Natán ja David, David ja Isaí, Isaí ja Obed, Obed ja Booz, Booz ja Salmón, Salmón ja Naasón,

³³ Naasón ja Aminadab, Aminadab ja Aram, Aram ja Esrom, Esrom ja Fares, Fares ja Judá,

³⁴ Judá ja Jacob, Jacob ja Isaac, Isaac ja Abraham, Abraham ja Taré, Taré ja Nacor,

³⁵ Nacor ja Serug, Serug ja Ragau, Ragau ja Peleg, Peleg ja Heber, Heber ja Sala,

³⁶ Sala ja Cainán, Cainán ja Arfaxad, Arfaxad ja Sem, Sem ja Noé, Noé ja Lamec,

³⁷ Lamec ja Matusalén, Matusalén ja Enoc, Enoc ja Jared, Jared ja Mahalaleel, Mahalaleel ja Cainán,

³⁸ Cainán ja Enós, Enós ja Set, jøts Set tteedyi ja Adán, jøts ja Adán ja Dios Teety.

4

Ku ja Jesús ja miku' tyaguwaníyí jøts ja yikpøktyunwá'añi

¹ Xjats ja Jesús wyimbijty jam Jordángit nøø agø'øm. Tø ja Espíritu Santo ja tyatøjkiniyí jøts ja jam yiknøjkxøø tø'øts etjotp mā niti kya'ity.

² Jamts ja ojts chøøni wixijxxyøøw jøts ja miku' ja jam yjot'ejxwá'añi. Niti ja tkajii'kxy jadine'en jøtsnim ja pyaajtøø ja yuu.

³ Winets ja miku' ja ñimaajyøø:

—Pøni janch ku me mjanchDios U'ngi yik'øyi yø tsaā tsapkaaky.

⁴ Jøts ja Jesús t'adsojimbijty:

—Yide'en jap nøkyijxpy wya'añ: “Kuuyi Dios kyajpxy møj, kidi ja'ayip ja naxwii'ñit jaa'y nugo tyajujky'ajttip ti jaty yikjøø'kxp.”

⁵ Xjats ja miku' ja ojts wyaanijkxyi jam møj kojpkøjxp, jøts ja jam tyuk'ejxøø wine'enin ja kajp naxwiiñ.

⁶ Yide'en ja miku' ñimaajyøø:

—Nmøøgyøxp mets yá'at tuki'iyi wine'en øts yø kajp nnitani ja møj ja mutsk. Jade'en øts yø tø nyikmø'øy, øyts øts yø pøn ndyimyo'ot pøni pøn øts yø nmo'owampy.

⁷ Pøni xwinguxanaapy øts jøts ø xwindsø'øgit, winets mets yø tuki'iyi xja'ajtkøxt.

⁸ Xjats ja Jesús t'adsøøy:

—Miku' jıwawak. Kidi øts ya xwin'ixy, pø yide'ents ja Dios kyajpxy wyawañ: “Ja Dios Teety tu'ugyi mwindsø'øgip, ja' tu'ugyi mduujnip ja yja' pøni sa ja wyawañ.”

⁹ Xjats ja miku' ja wyaanøjkxkojmiyøø jam Jerusaléngit kajpkøjxp jøts ja tsaptøjkøjxp yikpajtiyøø, jøts ja ñimaajyøø:

—Pøni janch Dios U'nk mets, katswoon ya;

¹⁰ pø nømpxi Dios kyajpxy jøts ku ja tnøjmit ja y'ankilis jøts me myik'ejx'ett, jøts ku me ka'ap ti mjatit.

¹¹ Mets ja mdsa'anjø'øgit jøts mdeky ja tsaa kyakumit kyayo'odsit.

¹² Xjats ja Jesús t'adsøøy:

—Janch nayide'ents ja Dios kyajpxy wyawañ: “Kidi mDios xjot'ixy.”

¹³ Jade'ents ja miku' nisudso'ampy kya'ukwinmaa'nbyatnaa sa ja tjaakjot'ejxkojt ja Jesús, jøtsnim ja jade'en ñimyajtstuujtøø.

Ku ja Jesús tjøptøki ja tyunk Galileit etjotp

¹⁴ Jøts ja Jesús ñøjkxnaa Galilea, møk'ampy ja Espíritu Santo ja wyinaty tø tyatøkiyi, jade'en ja tmøøt'aty, tum ja' idø'øn ja jaa'y wyinaty y'aawidip y'ayuujkidip o madsoo.

¹⁵ Yats ja yik'ixpiky ma jaty ja tsaptøjk jam, jade'ents ja o pøn kyajxa'agiyi.

Ku ja Jesús yja'jty jadigojk Nazaretit kajpjotp

¹⁶ Jøts ja ojts ñijkxy Nazaret, jam kojpkøjxp ma ja wyinaty tø myutsk'aty. Poo'kxin xøøw wyinaty ku ja tyøjkii'ñ jam tsaptøjkjotp, jade'en idø'øn ja tkostumbri'aty, xjats ja tmıwaw'kukii'ñ ja Dios kyajpxy jøts ja tkajpxy.

17 Ja nõky ja wyinaty tø yikømø'øyy midi ja Dios kyugajpxy Isaías yjaay; jøts ku ja ojts t'agiibyaky, ja' ja jap pyaajt ma jap wyinaty yide'en kyøxja'ayi:

18 Dios Teety øts ja y'Espíritu Santo xpudøjkip, ja' ø xmøøpy, ja' ø xpiktakp jøts øts ja ayoobi jaa'y ndukmado'odit ja øgyajpxy ja øy'ayuujk; ja' ø tø xkexy jøts øts ja ngajpxjot'amøkidit pøn amjotmay'oo'ktip tsaachjotmay'oo'ktip, jøts øts ja nyik'awa'atspidsø'ømdit pøn jade'en ejtnidip sam tsumy jaa'yindi, jøts øts ja nyikwin'ejxwa'kxtit pøn wimbeets ku-goots ejttip; jøts øts ja nyik'awa'atspidsø'ømdit pøn øy sagasa yiktundip;

19 jøts øts ja Dios Teety ja yiknitso'ok'ajtin nnigajpxiyit.

20 Winets ja Jesús t'agiimyujky ja nõky, jøts ja ojts tkømø'øyy ja tumbi, jøts ja y'ixaajky, jøts ja mayjaa'y ka'ap ja y'ukni'ejxujtniyi.

21 Xjats ja kyajpxøjkiyiñ jøts ja wyaañ:

—Ixymts idø'øn yø jade'en tø yjaty tø kyubety mee mwingujky sa ja Dios kyajpxy wya'añin.

22 Jøts ja ni'ijtyi t'ødyejtøø ja Jesús, ñigyumaapts idø'øn ja tjawidi ku myadya'aky ja amdsuj tsaachuj pøni sa jaty ja ñi'mxyidi, jøts ja xem yam ñayiktiyidi:

—¿Kidi ja Joséjip idø'øn ya'at ja y'u'nk?

23 Jøts ja Jesús wyaañ:

—Tiigyajpxy yide'en meets inet mdyimwya'añ: “Tsøøyibi, nachøøyi kø'øm”; mnayinømdipts inet:

“Jade'en sa øø tø nnimadø y m'adi'ich jam Capernaum, tu'unts inet yā nayide'en mgø'ømna_xkijxy mgø'ømka_jpxkijxy.”

²⁴ Jøts ja yjaakwaañ:

—Tiy janch meets idø'øn nnøjmi jøts ku ni tu'ugin Dios kyugajpxy kyayikupiky kyø'ømna_xkijxy kyø'ømga_jpkijxy.

²⁵ Tyimñømp øts, kawinaak ja ku'økyø'øxy ja wyinaty yā Israelit etjøjty ku ja Dios kyugajpxy Elías y'atsinaay, ku et kyatuuy tigøøk jumøjt jagujkpwīnets ja yuu yjanch'ijty o magajp;

²⁶ ni tu'ukts ja kyayiktanigajxtøø ja Elías yā Israel, ne'egi ja' Dios ja tyanigajx pøn jam wyinaty tsinaapy Sarepta, jam Sidón kajp wīngon.

²⁷ Nay jats jaa'y wyinatymidi yā Israel pøn putstip ku ja Dios kyugajpxy Eliseo yjaa'ajty, jøts ja ni tu'ugin kyataadyøø ja pyu'uts. Pøn txøøw'ajtp Naamán, ja' ojts ne'egi ja yja' tyay pøn jam Siria kunaajx'ajtp kugajp'ajtp.

²⁸ Xjats ku ja jade'en tmadoodøø jøts ja yjanty-imy'ambøjktøø pøn jaty jam wyinatyi tsaptøjkjotp.

²⁹ Ojts ja tnibidø'økti ja Jesús, jøts ja tkajxpidsømdi jam kajpjotp, jøts ja tyiknøjkxtøø jam kojpkubajkp mā jam tu'uk ja kats'aaw, jamts ja tkutejnaxwa'andi.

³⁰ Jøts ja Jesús jadi'iñi jam mayjaa'y agujkp ñajxy jøts ja jade'eñi chøø'ñ.

Tu'uk ja yaa'dyøjk pøn ja miku' tø tyatøkiyi

³¹ Jøts ja ojts ñijkxy Capernaumit kajpkøjxp midi jam Galileit etjotp tãmp, jamts ja tyik'ixpiky ja jaa'y ku poo'kxin xøøw.

32 Ñigyumaap ja tjawidi ku ja jade'en yik'ixpikyidi, kumi tum ja'ja kyajpxy midi kutujk møøt.

33 Jamts tsaptøjkjotp wyinaty tu'uk ja jaay pøn ja miku' wyinaty tø tyatøkiyi, ja'ats ja møk yikwajnoø:

34 —Majstutk øøts; ¿ti øø xanibøjkip, mets Jesús Nazaretit jaay? ¿Ja' me tø xnimeni jøts øø xyikudigø'øty? Wa'ats me n'ejxkapy mbøn mets, pø Diosxi me m'u'nk'ajtíp.

35 Xjats Jesús ja miku' t'adsøøy, yide'en ja tñimaay:

—¡Amøñi et, kidi mgajpxy, jøts majtstu'ut yø jaay!

Winets ja miku' tyiknaxkidaajky ja jaay jøts ja ttawaajch ja jaay, nika'ap ja sa ttuun.

36 Ni'ijtyi ja jaay yjantymchø'jkidøø jøts ja xem yam ñawyajnidøø:

—¿Ti kajpxy ti ayuujk yø jade'en kyajpxy? ¡Møjtá'aky yø t'ane'emy yø miku' jøts yø jatyi chø'øgi!

37 Ja Jesús idø'øn yik'aawip yik'ayuuujkip øy maðsoo.

Ku ja Jesús tyikmøkpiky ja Simón Pedro tyakmø'jt

38 Xjats ja pyidsiimy jam tsaptøjkjotp jøts ja ojts ñijkxy jam Simón tyigam, jamts ja tyøjkii'ñ. Pøjkip tamik ja Simón jam wyinaty ja tyaakmø'jt, jantymyøn'oo'kp ja wyinaty. Winets ja Jesús yiknimaay jøts ja ttu'unt ja may'ajt jøts ja t'ext.

39 Jøts ja ojts t'ixy, ojts ja ñaxkøy ma ja pamaay jam wyinaty, jøts ja møk twingugajpxiyi'ñ ja jøømba'am, jøts ja jatyi wyinaajky, jøts ja

jaa'y nay jatyi tyanaagyukiyii'ñ, jøts ja kø'øm
t'ejxpinaṅwa'aky ja kaaky ja jii'kxy.

Ku ja Jesús tyikmøkpiky ja maabyamaa'y

⁴⁰ Kuts ja xøøw yjaxnaa, winets ja Jesús ojts
yiktaninijkxy ja maabyamaa'y pønity jam sagasa
jajtp; jøts ja ojts tu'uk tu'uk tkønixajy, jøts ja jade'en
tyiktsokijxy.

⁴¹ Nay jamts ja winaaginmidi pøn ja miku'
ttawajtsidøø nayide'en, jøts ja yjanchnømdi møk:

—Dios U'nkxi mets.

Jøts Jesús ja møk twingugajpxiyii'ñ, ka'ap ja tyik-
jaty jøts ja kyajpxtit, pø ñijaa'widipxi ja' jøts ku ja'
Cristo.

Ku ja Jesús kyajpxwa'kxy jam Galilea

⁴² Xjats ku xyiijndyaajky, jøts ja Jesús chøø'ñ
kajpjotp jøts ja ñijkxy jam mā pøn kya'ity. Jøts ja
mayjaa'y ja yjanch'ixa'ay; jøtsnim ja yikpaajty mā
ja jam wyinaty. Yikta'aniwyandip idø'øn ja', ka'ap
ja tmajtstu'utwa'andi jøts ja choont,

⁴³ yide'ents Jesús ja ñimaajyidøø:

—Nayi nnigajpxwampy øts ja Dios y'øgyajpxy
y'ømyadya'aky o magajp, pø ja'agøjpxxi ø tø
nyikexy.

⁴⁴ Jøts ja Jesús jam jade'en kyajpxwa'kxy mā jaty
ja tsaptøjk jam Galilea.

5

*Ku ja ajxk may'ampy yikma'aky Jesús
myilagri'ajtingøjxp*

¹ Tuk'ojk idø'øn ja Jesús jam yikpaajty mejy
agø'øm mā txøøwi Genesaret; jamts ja mayjaa'y
ja ñimejniyøø jøts ja t'amidodukwa'andi ja Dios

y'øgyajpxy y'ømyadya'aky. Janch yik'atejmujknipts idø'øn ja Jesús jam wyinaty

² ku ja t'ejxpaajty majtsk ja barki tawa'ats jam nøø adsay agø'øm, tø ja ajkxmakpi jam wyinaty pyidsømgøxti, jam tya'ajkxmaajk ja wyinaty tpujti.

³ Winets ja Jesús tu'uk ja barki ttatøjkiyiññ midi ja Simón yja'ajtpy jøts ja tnimaay wan tniyikjiwa'aky waani jøts jam wingon kidyimdy'a'ant møøt ja tsayjoojt. Jøts ja jam jade'en y'ixaajky, jøts ja jam tyik'ixpøjktøjkiyiññ ja mayjaa'y.

⁴ Xjats ku ja kyajpx'abajtiyiññ jøts ja tnimaay ja Simón:

—Yiknøjkx yø barki jam mā yø nøø køjnkjawi, jamts xniwejtspattit yø mda'ajkxmaajk.

⁵ Jøts ja Simón t'adsøoy:

—Windsøn, tuktsunaxy øø tø njanchjatuñ, ni tu'ukts øøts n'ajkx tø ngapaaty; nøøwejtspatp øts inet yø nda'ajkxmaajk jadigojk, pø tøxi me mwa'añ møk'ampy.

⁶ Jøts ku ja jade'en ttundøø, may ja ajkx ja ojts tmatsti, janch køøtswambim ja tya'ajkxmaajk ja'adi.

⁷ Winets ja tmiyamdøø ja myigu'ukti pøn jam wyinaty; jadu'ukpi barkijotp jøts ja pyudøkiyidit. Nøjkxti dø'øn ja jam, ojts ja barki ja majtsk tyik'ujtskøxti øy ja yjawi yjanchkøjnktøjkinidit.

⁸ Xjats ku ja Simón Pedro ja ojts jade'en t'ixy, winets ja twinguxanaay ja Jesús jøts ja tnimaay:

—Windsøn'ajtim, majtstutk øts, ka'ap øts yø xpaat'aty jade'en, pojkpitumbi jaa'y øts.

9 Janch tsø'jkiñip idø'øn ja Simón wyinaty jøts nayide'en ja myigu'ukti, ja'agøjxp ku ja ajkx ja wyinaty jadine'en tø tma'akti.

10 Nayi tsø'jkipts idø'øn ja Jacobo møøt ja Juan, ja Zebedeo y'una'jkti pøn ja Simón møøt ñamyigu'uk'atyiyi. Jøts ja Jesús tnimaay ja Simón:

—Kidi mdsø'øgi, ixymyi nduknijawidit sudso jaa'y ja nitso'ok'ajtin tpaatt.

11 Jøts ja byarki ja jam nøøba'am tyikja'attøø, jøts ja jamyi tnikakøjxtøø tuki'iyi, jøts ja tmøødidøø ja Jesús.

Kuja Jesús tyiktsø'øky ja jaa'y pøn jadi'iñi putsniip

12 Kuts ja Jesús jam wyinaty tu'ukpi kajpjtøp, winets yja'jty tu'uk ja jaa'y, møj pu'uts pa'am ja pøjkip, jøts ku ja Jesús yik'ejxpaajty jøts ja twinguxanaay. Jamyi ja ñamyujtstaajkøø jøts ja tminuu'kxaajky, yide'en ja tnimaay:

—Teety, mmøøt'ajtpy mets ja møk'ajtin jøts ø xyiktsø'okt, yiktsokts øts mdsojk'ajtingøjxp.

13 Jøts ja Jesús ja ojts tkønixajy, yide'en ja tnimaay:

—Ndsøky'ajtpy øts jøts mdso'okt, tsokni.

Ja'ayi ja jade'en wyaañ, jatyi ja pu'uts wyinajky.

14 Xjats ja Jesús møk'ampy tnimaay ja jaa'y jøts kidi ja pøn ttukmadøy. Yide'en ja tnimaay:

—Jamyi dø'øn mnøjkxt jam teety wyindum, jamts xpikta'akt ja myojxin midi ja Moisés ñi'ana'am, ja'agøjxp ku tø wyä'ach ja mbu'uts. Jade'ents ja jaa'y ja t'ejxtit tnijawidit jøts ku tø mdsø'øky.

15 Yikmøjpiktak'adøtsp idø'øn ja Jesús, may ja jaa'y ja ñimen'adi'ichiyi, namay ja ñamyukyidi jøts

ja pyatmadøyi, jøts ja tnankyiktso'okwa'añidi ja pya'am.

¹⁶Ja Jesús jam ja ñijkxy ma abak et ma niti kya'ity, jamts ja Dios Teety t'ajot'ajty.

Ku ja Jesús tyiktsøjky ja køuxjpi pakxujxpi

¹⁷Tuk'ojk idø'øn, jam ja Jesús wyinaty yik'ixpiky, jamts idø'øn ja fariseotøjk møøt ja kajpxwejpitøjk wyinaty chøønidi wine'enin ja wyinaty tø choondi o magajp, pømbi mendip Galileit etjotp, Judeit etjotp, jøts Jerusaléngit etjotp; ku ja Jesús tnankyjay'ijxyi ja Dios Teety myøk'ajtin ku ja pamaa'y ja tyiktsø'øky.

¹⁸Winets ja jaa'y tkiiya'jttøø tu'uk ja pamaa'y pøn køuxjx pakxujx, jøts ja jap tøjkjøtpy tyiktøkivya'andi jøts ja ttawingugiiyidit ja Jesús.

¹⁹Nimaats kya'awa'adsi ma ja tyøkidit kumi janch mayjaa'y jam wyinaty. Xjats ja tøjkiixpy pyajttøø, jøts ja ojts tnikiidyyu'utti ja tøj, japts ja tyikwinajktøø ja pamaa'y jøts ja ttawingugii'yidøø ja Jesús jap mayjaa'y agujkpy.

²⁰Kuts ja Jesús ja ojts jade'en t'ixy kudam ja amumdu'uk ja yjanchja'win tjagyapti, jøts ja pamaa'y ja tnimaay:

—U'nk, nbøkmyee'kxpy mets.

²¹Winets ja wyinmaadyøjkidøø ja kajpxwejpitøjkti møøt ja fariseotøjkti, yide'en ja wyinmaydi: “¿Pøn yø jaa'y jade'en, tigøjxp ku Dios yø jade'en twingajpxnaxy? ¿Pøn ja pøky ya t'ukmaa'kxp, kidi tu'ugyip Dios pyojkpimee'kxy?”

²²Wa'lats ja Jesús ja tnijawi sa ja wyinaty wyinmaydi, jøts ja tnimaay:

—¿Tigøjxp ku jade'en mwınmaydi?

23 ¿Ja ti ne'egi jawaani jajtni, kuts yø pa'amjaa'y nnøjmit, “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjxni mdigam”?

24 Ixyamnim meets inet x'uk'ext mabaat øts idø'on ja møk'ajtin nmøøt'aty ya naxwiin jøts ø nmaa'kxt ja pøky.

Xjats ja tnimaay ja køxujxpi pakxujxpi:

—Pidøkni, wa'kukiñi, wejtsjø'øk yø mmaabajt jøts mnøjxni mdigam.

25 Jatyí ja køxujxpi pakxujxpi pyidi'jky, jøts ja tyanaagyukiyiñ jam mayjaa'y agujkp. Wyejtsmujk ja myaabajt ja' ma ja jam wyinaty kyo'kni, jøts ja ñøjxnaa tyøjkwindum, møk ja Dios ja ttamøjawi.

26 Jøts ja ñigyumaap tja'widøø ni'ijtyi, ojts Dios ja ttukmøjawidi ttukunuu'kxyjawidi, yide'en ja wya'andi ja ñichø'øgi adøtsni:

—Ixyamnim inet ja tø n'ijxyindi midi niwindi kayik'eixpnm.

Ku ja Jesús tpawaay ja Leví

27 Ku ja jade'en y'ukjajty, xjats ja Jesús jam pyidsimy, ojts chøøñ jøts ja t'eixpaajty tu'uk ja yikugubajtpi, jam ja wyinaty chøøni ma ja ttukugubety ja jaa'y øy tyii'ji, jøts ja tnimaay:

—Møødik øts, møøt widejtk øts.

28 Winets ja jatyí tyanaagyukiyiñ, jøts ja tuki'iyi tum jam tnikakijxy, jøts Jesús ja tmøødiyñ.

29 Jøts ja Leví xøøw ttuuñ jam tyøjkwindum jøts ja twindsø'jkiiñ ja Jesús, mayts ja yikugubajtpi jam wyinatyi møøt jadu'ukpi jaa'dyi. Jade'en ja jam møøt twindsøønidi ja kaabyajt.

³⁰ Xjats ja fariseotøjk̄ti m̄øøt ja kajpxwejp̄itøjk̄ti t̄pagajpxnibøjk̄idøø ja Jesús pyabøjk̄pi, jøts ja tn̄imaadyøø:

—¿Tiku meets yø xm̄øøtkay yø yikugubajtp̄itøjk̄ti m̄øøt yø ka'øyjaa'dyi?

³¹ Winets ja Jesús y'adsøøy jøts ja tn̄imaay:

—Pøn tkaja'widip ja pya'am, ti tsøøyibi ja t'ukyikwa'andit. Ja' ja tyik'amaadyaktip pøn pamaa'dyi, pøn pya'am tja'wiy'ejt̄tip.

³² Kidi ja'ajipts ø tø nn̄imiñ pøn niwine'en kan-abyøkyja'wiyidip. Ja' ø tø nn̄imiñ pøn tja'widip ja pyøky jøts ku ja pyøkmyøødidi, jøts tyiktigat̄stit ja chinaa'yindi.

Ku ja Jesús yikt̄byijky tigøjxp ku ja kya'ayuu'atti

³³ Xjats ja tībyøjktøø ja Jesús jøts ja tn̄imaadyøø:

—¿Tiku yø mbabøjk̄pitøjk̄ janch nek̄im kyaydi tyojk̄xti, jøts yø Juan yja' yjanch'amaay'atti m̄øøt yø fariseotøjk̄ti? Ni kyakaydi kyajøø'kxti, janch tsap̄kajpx'ejt̄tip yø'.

³⁴ Winets ja Jesús t'adsøøy:

—¿Ma meets jade'en tø x'uknijawi jøts ku tø'øxy ñigaabyi tø'øxy ñi'ukpi winet y'amaay'atti winet kyakaydi kya'uukti ku ja jemyaa'y jamni?

³⁵ Abikñimts ja tiemp̄i tyimyja'tmit ku ja jemyaa'y wyinaty kya'uk'ejtni ku ja jam wyinaty tø cho'oni; jaanimts idø'øn tiy pøn kya'ukaañit kya'uk'uknit, jaanim idø'øn ja y'amaay'attit.

³⁶ Jøts ja nay ja'agøjxp ya'at ttanimadyaktøjk̄iyiñ:

—Ka'axi pøn wyetpach tta'agiyi jemwyet midi tyimyjemñim, ku ja jade'en yiktu'unt jøts kumi

mujkpi ja jemwyet jøts ja tjaaktyimgyøø'tsni ja wetpach, jaaktyimyiwēnip ja kyøøts'ajtīn ja'.

³⁷ Jøts ka'ap pøn vino tta'adami po'duk midī nāmīi'kxñim, ku ja jade'en ndu'unint jatyī ja tyikmigøødsi ja po'duk, windigøøpyts tuki'iyi, windigøøpy ja vino, windigøømyipts ja po'ak.

³⁸ Paty ja vino midī ñāmīi'kxñim nda'ada'amyin ja jembyo'ak jøts jade'en nimidi kyawindigøøty.

³⁹ Nayide'ents ka' pøn t'uukwa'añ ja vino midī nāmīi'kxñim. Pøn tø t'uukyujni ja vino midī jekyīp mīi'kxñi, xumi ja' ja chøjkpy, kumi nømp ja tuka-jpxy: “Yø jekyīp mīi'kxyīp tyimy'øy, ka'ap yø midī tmī'abaaty.”

6

Ku ja Jesús ttøjtøø ja ariin yam poo'kxin xøøw

¹ Poo'kxin xøøw idø'øñ, winets ja Jesús jam wyinaty ñaxy jam kamjotp møøt ja pyabøjkpitøjk, ja'ats jam wyinaty ttøjtīp ja ariin tøøm; jøts ja twixatsti ja ariinbajk jøts ja tjøø'kxti.

² Jøts ja fariseotøjk winaagin yiktøøjidøø, yide'en ja yiknimaadyøø:

—¿Tiku jade'en m'adø'øtsti midī ka'ap pyaat'atyī yiktu'unt poo'kxin xøøw?

³ Xjats ja Jesús y'adsøøy:

—¿Ka'anīm meets ja Dios kyajpxy x'ijxy midī tnīgajpxp sã ja David tuk'ojk tmøøt'adijch ja myīgu'uk ku ja wyinaty yjantyimyyu'uookti?

⁴ Pø tsaptojkjøtpyimxi ja tyøjkiyīi'ñ, japts ja tñixajyīi'ñ ja kunuu'kxy tsapkaaky, jøts ja tkaadyøø møøt ja myīgu'uk pøn jaty ja jam wyinaty myøøt. Yam ja ka'ap yjapaat'atyidi

jøts ja tka'adyit ja'abi tsapkaaky, ja teetyøjkti ja paat'ajtidip kya'adyip.

⁵ Nayide'ents ja wyaañ:

—Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y pøn ja kyø' jadi'iñi tøtsnip

⁶ Jadu'ukpi poo'kxin xøøwts idø'øn ja'agøjmyi ku ja Jesús tyøjkiyii'ñ jam tsaptøjkjotp, jamts ja yik'ixpøjktøjkiyii'ñ. Japts wyinaty tu'uk jaa'y midi y'aga'ngyø' xujxp;

⁷ jøts ja kajpxwejpitøjk jam tpa'ejxti tpagowdi ja Jesús, ja' ja y'ejxwandip pøni y'ukyiktsøkpy idø'øn ja pamaa'y ja' ku poo'kxin xøøw, jade'ents ja tni'øøniwya'andi.

⁸ Ti wa'ats ja tnijawi sa jaty ja wyinaty wyinmaydi jøts ja jaa'y ja tnimaay midi wyinaty kyø' xujxp:

—Tani, jøts ixem nøjkx mdani kujk'am.

Jaty ja jaa'y tyanaagyukiyii'ñ jøts ja jam ñijkxy tanaabyi.

⁹ Winets ja Jesús tnimaay ja mayjaa'y:

—Nyiktø'ødip nyik'amido'odip inet yam: ¿Midi'ibi ndu'unimp ku poo'kxin xøøw, midi'ibi kutuky ku n'ødyu'unint u ku nga'ødyu'unint? ¿ku nyiktsoojkint u ku nyik'o'jkint?

¹⁰ Jøts ja twin'ejxkijxy pøn jaty ja jam wyinaty ttamujkiyip, jøts ja tnimaay ja pamaa'y:

—Xajtøw.

Tsoojk ja' jøts ja xyajtiiy.

11 Jøts ja yjadu'ukpɪ jaa'y yjanch'ambøjktøø, jøts ja xem yam ñawyajnidøø, agø'ømyi sudso'ampy ja tjadyimy'ukyikpøkyā'adit ja Jesús.

Ku ja Jesús twiwijch ñimakmajtsk pøn wyinaty kyudanaabyi'atwampy

12 Wīnet ets ja Jesús ñijkxy Dios'ajot'ajtpɪ jam kōjpkøjxp, jam ja Dios Teety ja tmīgajpxy tuktsunaxy.

13 Jøts ku xyiijndyaaajky, jøts ja twaadsogijxy pøn jaty ja pabøjkɪp, jøts ja twiwijch ñimakmajtsk pøn ja tyejtɪp kudanaabyitøjkti.

14 Ja'ats idø'øn ja'adi ja Simón midi ja xyødejtīgajts jøts ja tɪktaajky Pedro; møøt y'uch Andrés ja', møøt ja Jacobo, møøt ja Juan, møøt ja Felipe, jøts møøt ja Bartolomé.

15 Jam ja Mateo, Tomás, Jacobo pøn ja Alfeo myajnk'ajtpy; jøts ja Simón ja cananista;

16 jam ja Judas ja Jacobo y'uch; jøts ja Judas Iscariote, pøn wyinaty tkøyakwamp ja Jesús.

Ku ja Jesús tyik'ixpijky ja mayjaa'y

17 Xjats ja Jesús tmøøtkidaajky ja kyudanaabyitøjk, jøts ja tmøøtja'jty jap jøyjøtpy niduki'iyi møøt ja pyabøjkpɪtøjk; nay jam wyinaty øy pøndi pøn jaty tso'ondɪp jam Judea, jam Jerusalén, jøts jam mejy agø'øm jam Tiro jam Sidón. Ja' ja jam wyinaty tø tñimendi jøts ja tpatmado'odit ja Jesús, jøts ja pyamaa'y ja tñankyiktso'okwa'añidi.

18 Winaagin jam pøn ja miku' tø tyatøkiyidi, tsokøxtits ja'.

19 Jøts ja jaa'y ni'ijtyi tñixajiwya'andi ja Jesús. Pyaatwandɪp ja' ku ja ttuktatsø'øky ja myøk'ajtin ja pamaa'y.

Ja xondaajkin jøts ja ayo'owin

²⁰ Winets ja Jesús y'ejxj'i'jky ma ja pyabøjkpitøjk jam wyinatyi jøts ja tnimaay:

—Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midi ja tyanitanaapy ja yjaa'y.

²¹ 'Nay Dios ja tkunuu'kxp pøn yu'oo'ktip xø'oo'ktip, ja' ja tyiknajxkøjxp.

'Jøts pøn yaxtip jiidyip, kunuu'kxy Dios ja nayide'en yik'ityidi, ja'ats ja ttukpaadidip ja xondaajkin.

²² 'Mgunuu'kxip meets Dios øy meets ja jaa'y mjamidsep'atyidi øts køjxp, øy ja mjabawøpyidi, øy ja mjaga'ømyigajpxyidi, øy mjagayiktsokti, øy mxøøw mguya'axy kamadøyim yjayikjawidi ja'agøjxp ku ø xpabøkti.

²³ Kidits mjotmay'ookti, kidi x'ayoojidi, japnim ja tsajpjøtpy mwingaxø'økxyidit; pøn jade'en mduujnidip, yø jade'embj jaa'y tyeety'ap tka'ødyundøø nayide'en ja Dios kyugajpxtyi.

²⁴ 'Jøts mjanch'ayøøy mee kumeeñ jaa'y, yaayj meets iij jotkujk mdsinaagyoti.

²⁵ 'Mjanch'ayøøy meets pøn tum jaa o ti tmøøt'ajttip, mjanch'ayuu'ajttip mjanch'axøøw'ajttip meets nøjkk.

'M'ayøøy meets pøn yam agujk jotkujk yiknajxtip, mdaya'axtipts meets ja mwinnmaa'ñ jadigojk.

²⁶ 'M'ayøøy meets ku mee myik'ødyijj myik'øñøjmi, pø nayide'ents ojs yiktejtj yik'ødyejtj pøn ojs nugo ñadyijj ja Dios kyugajpxy.

Paat'ajtip jøts ja mmidsep yikmijotjimbett

27 'Ni'lijtyi madowdi wine'enin mja'atti: Tsokti miyujy'atti ja mmidseptøjki, pudøkidi ja' pøn mja-gatsojkidip,

28 amidowdi ja Dios jøts tkunuu'kxt ja mmidsep pøn o sagasa mnimaajyidip, ku'amidowi pøni pøn mmi'ambøjkidip pøni pøn sagasa mdunwajnidip.

29 Pøni mgojxip mdse'ekip, ja' øy ku xmaa'kxuktit; jøts ku pøn mbøjkxidit ja yukwop, jaaktyimyo'odipts ja mnijan.

30 Kidi kanajtsjawim xjawidi ku tigati myik'amidowdi; jøts kidi jatyi o pøn xamatsti ku pøn o ti tø tnixaji.

31 Kidi meets ja jawyeen jade'en xjøp'ixy pøni sa mee xjatsøky, meets idø'ø'n mbaat'ajtíp jawyeen mnajtstunip sa dø'ø'n ja yjawí tsoktin jøts meets ja jade'en xu'unt.

32 'Øy meets ja'ayi møøt mjanamyaawya'añiyidi pøn mee møøt mnachøkyiyi, ¿ti øy'ajtints meets jade'en mdumpy? ¿Ti ja' ja ka'øy jaa'y kyajajtíp? Pø tyundipxi ja nayide'en.

33 ¿Ti øy'ajtín meets jade'en mdumpy øy meets ja'ayi xjamay'aty pøn mee nayide'en mdunxíyíp? Pø tyundipxi ja ka'øy jaa'y ja nayide'en.

34 Uk ja'ats meets o tigati mduk'anuu'kxpy pøn mee m'a'ejxip tyikwimbetp jawaani mayjawi, ¿ti øy'ajtints meets jade'en mdumpy? ¿Ti ja ka'øy jaa'y ja jade'en tka'anuu'kxyajktíp o tigati ja yja' jøts ja myiga'øy jaa'y ja nayide'en ttukubatti jawaani may?

35 Ka'ats meets idø'ø'n xmidsepøkt ja mmidsep, tsokti xmiyujy'attit, mduujníp meets ja may'ajt ja'.

Øy meets ja tigati xuk'anuu'kxt jadi'iñi, kidits meets ja xjöp'ijxy'aty jøts ja mmigubajtxidit jawaani møj jawaani may. Møjts meets ja myikwimbejtxiyidit, ja Dios Teety tsajpjøtpyit jade'en meets ja m'u'nktejyit; ti sa ja Dios Teety tmi'ø'y'aty nayide'en ja ka'ø'y jaa'dyi ja namyikaxi jaa'dyi.

³⁶ Mja'myatstip meets jøts mba'ayo'odip o pøn nayide'en sam ja Dios Teedyin ja tpa'ayøyin.

Kidi pøn o ti xawindsø'ødyi

³⁷ 'Kidi pøn nugo o ti xapøky'ejxti, jøts Dios ja nayide'en mgapøky'ejxidit. Maa'kxukti, jøts ja Dios nayide'en mmaa'kxukidit.

³⁸ Mo'odi o ti pøn, winets o ti nayide'en mmo'ojidit ja Dios. Nayide'en meets ja mmo'ojit mgamo'ojit pøni sa meets ti xyaky xkayaky møj may o ti. Nayide'en meets ja Dios mdunit pøni sa meets mmigu'uk xuñ. Nay ja'ats ja yik'awetsp.

³⁹ Xjats ja Jesús ttanimadyaktøjkiyiñ jadu'uk ja madya'aky, yide'en ja wyaañ:

—¿Ma ja winap jaa'y tø t'uktuu'niway ja myiwinap jaa'y? Pø namajtskxi dø'øn ja tyimgyunaxtit ku et'aaw ja ma tpaattit.

⁴⁰ Uk kuts pøn, pøn tni'ixpøjkimyidip o ti tunk, ka'axi mibaat twinaxtit ja yik'ixpøjkpidi; pø wan idø'øn jaanim wyinaty.

⁴¹ 'Jøts meetsmi, ¿sudso dø'øn ja mmigu'uk pyøky x'ejxpajtyi jøts ja mja' ne'egi xka'ixy kudam ja jawaani møj?

⁴² Jøts, ¿sudsots mets idø'øn namyikajxibim xkajpx'øyiwya'añ yam mets ja mdsinaa'yin øy xkayikyø'ø'y? ¡Meets win'øø'mbi ataadyi! Yik'øyidi

jawyeen ja mga'øchinaa'yindi, winetnimts ja mmigu'uk chinaa'yin xkajpx'øyyidit.

*Pøni sa wyimbidsimy øy ti, ja'ats tyikwingaxø'kp
pøni sa ti y'øyi kya'øyi*

⁴³ 'Ma meets øcha'amguipy tø x'uk'ixy jøts ku ja tyiktøømi ja ka'øcha'am; uk ja ka'øcha'amguipy tyiktøømi ja øcha'am, nima.

⁴⁴ Ja tyøøm ja kipy yikta'ejxkajp pøni sa ja tyøømi øy ka'øy: ka'axi ja iigi tsa'am yikwiduky kujp kip-kyøjxp, ni jam ja uvi tsa'am kyawinaky jam kujp aatskøjxp.

⁴⁵ Jade'ents idø'øn ja øyjaa'y pøn øyjaa'y, ka'ap ja t'aawi tjootti ja ka'øybi winmaa'n, ka'ap ja yjemwa'añ tyewa'añ kumi øyjaa'y ja'; pønts ka'øyjaa'y'ajtp ja ka'øybits ja y'aawip yjoojtip, yjemwa'andi tyewa'andi kumi jam idø'øn ja tyimyøødidi ja kya'øy'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Majtsk jøøjp ja pøch kyojpk

⁴⁶ 'Niti øy'ajtin meets jade'en xkatuñ ku mee xjanøjmi, "Nwindsøn'ajtim, nwindsøn'ajtim", jøts ka'ats xpadundi pøni sa njawa'añ.

⁴⁷ Ya net ndukmado'odit pønin ja kyaxø'økti ja jaa'y pøn ø xnimemp jøts øts n'ayuujk ja xpat-madoojidi, jøts ja jade'en tpadundi sa nwa'añ:

⁴⁸ jade'enin idø'øn ja nbiktaajkin sam ja jaa'y tyøjkøjyin, jawyeen ja køjnk øy øy tnidajiyi'n ja tyøjk, jøts ja tsaä ja amuum ttukpøchkojpk'ajty. Xjats ku ja møj nøøgom jam wyinajky, aguwani ja tyimyikjø'tj'ø'økwa'añ ja tøjk, jøts ja niwine'enin nisa tkatuñ, kumi tsaä ja wyinaty tyeky'ajtpy.

49 Pønts ø xjapatmadoooidip ja n'ayuujk jøts ka'ap jade'en tpadundi sa nwa'añ, ja'ats idø'øn jade'endi sam ja jaa'y midi tyøjk tkoj xixñaaxkijxy. Niti ja tkadukpøchkojpk'ajty, jøts ku ja møj nøøgom jam wyinaajky jatyi ja tmimajadaajky, ojts ja tyikiday jøts ja tyimyikudigøøy.

7

Ku ja Jesús tyiktsø'øky ja romanit soldadi ja tyumbi

¹ Xjats ku ja Jesús jade'en tnimaagyijxy ja jaa'y, winets ja ñijkxy Capernaum.

² Jamts wyinaty chøøni ja soldadi windsøn, romanit jaa'y ja'. Jamts tyumbi ja tu'uk midi ja janchkamajtstu'udyim yja'wip, mowa'añ ja yjanchpiky, ookwanip ja wyinaty.

³ Ku ja soldadi windsøn tnimadøøy ja Jesús, winets ja ttaniguejxy winaagin ja israelit møjaa'dyøjkti, jøts ja t'atstuk'amidoowa'añ ja may'ajt, wan tmiñ ja Jesús jøts cho'okt ja tyumbi.

⁴ Xjats idø'øn ja tninøjkxtøø ja Jesús jøts ja ojts t'amidowdi ja may'ajt møk'ampy, yide'en ja tnimaadyøø:

—Paat'ajtíp xpudøkit yø soldadi windsøn;

⁵ kumi chøjkpy yø' adøm ngajp, nayø'øts tø tni'ane'emy jøts ja tsaptøjk tø kyøjy.

⁶ Winets Jesús ja tmøødiyii'ñ. Jøts ku ja jam wyinaty yja'atwanidi ma ja tøjck jam, jøts ja soldadi windsøn ttukjøpkubajtyii'ñ pøn jaty ja minamyaajyip, jøts ja ttuknimaay ja Jesús:

—Mets teety, kidi xka'øyjawi, ka'ap ø xpaat'aty jøts mets ya mdøkit ndøjkjøjty;

7 paty ø kò'òm tò nganay'a'ejxiyi jòts mets jexyìp kò'òm tò n'ats'ixa'ay. Ana'am ja'ayi, jòts øts ja ndumbi cho'okt.

8 Ane'emy ø nayide'en nwindson xyik'ity, nay ja øts ndumbitøjkmidi pøn ø n'ana'amidip. Ku pøn nnøjmi: “Nøjkx”, nøjkxpts ja'. Uk nnøjmits øts yø ndumbi o ti, jatyi'ts yø jade'en tpaduñ.

9 Ja'ayi Jesús ja jade'en tmadøoy ñigyumaap ja tja'wiyi'ñ ku ja jaa'y jade'en, jòts ja tniwa'akjimbijty pøn jaty ja jam wyinaty payø'oyip, jòts ja tnimaay:

—Tyimyjanch, ni Israelit jaa'y øts ya ma jade'en ngapaadynim sam ya'at jaa'y tmøodin ja janchja'win møk'ampy.

10 Jòts ku ja waabi yja'ttøø møøt ja jøpkuyø'yibidi jam tøjkotp ma ja pamaa'y jam wyinaty, tødamik ja wyinaty myøkpøjkni ja pamaa'y.

Ku ja Jesús tyikujukpyiky ja ku'økyø'øxy myajnkun'kjam Naín

11 Ukjajts ja jade'en, xjats ja Jesús ñijkxy jam ma kajp txøøwi Naín, mayjaa'yts idø'on ja jam wyinaty pawidejtíp, may ja pyabøjkpitøjk ja jam tmøodi.

12 Kuts ja yja'jty jam kajpwingon, jòts ja ojts t'ejxpaaty tu'uk ja oo'kpi yikpagi'iy jòts ja y'atsna'xøkit, tu'umchi dø'on ja tø'øxyøjk ja t'u'nk'aty, jòts ku'økyø'øxy ja'. Mayts ja yik'oo'kpi pidø'kpi jamdi.

13 Jòts ku ja nwindson'ajtim ojts t'ixy ja ku'oogi, yik'ayo'ijxyim, jòts ja tnimaay:

—Amon, kidi mya'axy.

14 Winets ja Jesús twingunøjksiyii'ñ ja oo'kpi, jøts ja kajuun ja tnixajiyii'ñ, jøts ja oo'kpi kiibyí ja tkiiðyaktøø, jøts ja Jesús tnimaay ja oo'kpi:

—Mets u'nk idø'øñ nnimaapy: ¡Pidø'øk!

15 Xjats ja kyu'xkukiyii'ñ pøn idø'øñ wyinaty tø y'øøky jøts ja kyajpxpinibøjkiyii'ñ, xjats ja u'nktaak ja yiktagidøjkiyii'ñ ja y'u'nk, ja Jesús ja kømøøjyiyip.

16 Jøts ku ja jade'en niduki'iyi t'ejxtøø, jøts ja yjanchø'jkidøø, jøts ja ttukmija'widøø ttukunuu'kxyja'widøø ja Dios, nõmdip ja':

—Ya Dios ja myøjkgajpxy tø kyaxi'iky adøm njaa'yjøøjty.

Nayide'en ja wya'andi:

—Dios tø tnimiñ ja kyajp jøts tpudøkit.

17 Yiknija'wigyøjx ja jam wine'enin ja jaa'y jam chøønidi jam Judeit etjotp, ku wyinaty ja Jesús tø tyikjujkyiky ja oo'kpi.

Ku ja Juan Bautista tkexy ja kyugajpxy

18 Xjats ja Juan Bautista ja tnija'wiyii'ñ, nayide'en ja pyabøjkipi ja wyinaty tø tyamimadya'agiyi, winets ja tyaaixiyii'ñ namajtsk ja pyabøjkipi,

19 jøts ja ojts ttaniguexy ja Jesús, jøts ja t'atsyiktø'ødit pøni ja' idø'øñ janch Cristo pøn wyinaty menwamp yikniitsokpi. Uk kidi ka'ats, winets ja abikpyi ja tjøp'ejxtit.

20 Jøts ja wingon twingunøjksidøø ja Jesús pøn ja Juan wyinaty tø tyaniguexyidi, jøts ja tnimaadyøø:

—Ja Juan Bautista øø tø xkexy jidsik øø nyiktø'øt pøni janch ja Cristik mets idø'øñ midi yikniigajpxp

menwamp yiknitsokpi. Pøni ka'ats, winets øøts jadu'ukpi njøp'ext.

21 Ku ja wyinaty tø yja'atti, winets ja Jesús nay jatyi tyiktsøøjky may ja jaa'y pømbi pa'am pøjkidip, pømbi o ti ja'ambi tmøøt'ajttip, pømbi ja miku' tmøøt'ajttip, ñayikwin'ejxwa'kxmip ja' ja may winap jaa'y.

22 Jøtsnim ja y'adsojimbijty jøts ja wyaañ:

—Nøjkxti jøts xukmado'odit ja Juan ti jaty ya tø x'ejxti xmadowdi. Tamimadya'akti jade'en sa yø winap jaa'y wyin'ejxwa'kxti, sa yø pakpamaa'y yø'ødyi, sa yø putspi cho'okti, sa jaty yø nat jaa'y myadowdi, sa oo'kpi yjukpyøkti, jøts sa ayoobi jaa'y yiktukmadowdi ja øgyajpxy ja ømyadya'aky midi yiknitsokp.

23 Ejtni xoni ja'adi pøn ø xmibøjktip, ka'ap twinmayimbettit twinmay'adøjtít sats ø xjanchjawidi.

24 Xjats ku ja wyimbejtnidøø midi ja Juan wyinaty tø tkexy, jaats ja Jesús ttamimadyaktøjkiyi'ñ ja mayjaa'y, ja Juan yiknimadyakp, yide'en ja wyaañ:

—¿Ti meets ojts x'ats'ixy jam abak etjotp? ¿Tu'uk ja jaa'y midi jade'en ejxim kapy midi poj yik'ø'yimbejtíp yik'ø'y'adøjíp? Ka'axi ja yjade'eni, pø tu'ukyixi tmi'ity ja wyinmaa'ñ.

25 ¿Tits idø'øñ ojts x'ats'ejxti? ¿Tu'uk ja jaa'y pøn janch øybi wet tø ñadyaxoxiyi? Pø wa'atsxi mee xnijawidi pøn tsuj wet nadyaxojxidip, pøn nekim taxondip pyikta'aky, jamts ja ñachojk'ityidi jam windsøn tyøjkjotpti.

26 ¿Tits idø'øñ mjanch'ats'ejxtøø? ¿Tu'uk Dios kyugajpxy? Janch ja', ja' midi jawaani møj, nika'ap yjade'en sam yjadu'ukpidi.

27 Yø Juan idø'øñ yiktejp ku Dios kyajpxy yide'en wyaañ:

Ixya ngajxjawyeni tu'uk ja nngugajpxy,

pøn tyiktøøjip tyiktuudaajkip ja jaa'y
wyinmaa'ndyi jøts myikupøkt ku ixpøjkin
xminøjkxt.

28 Ndukmadoodip icyam jøts ku ni madsoo ka'ap pøn jade'en pyidsimñim ja Dios kyugajpxy sam yø Juan Bautista; pøni pønts øts nja' xpaduujnip jøts ku tyøki mā øts ngutujk ndanitanit ja njaa'y, ja'ats ne'egi møj yikpiktakp jøts nika'ap ja Juan Bautista.

29 Jøts ku ja jaa'y ni'ijtyi jade'en tmadoodøø pøn jaty wyinaty tø yiknøbetyidi ja Juan, nayide'en ja yikugubajtpidi, jøts ja tjanchmibøjktøø ja Dios jøts kudam ja ka'ap jade'en mibaat wyinmaamy'a'aty;

30 ka'ats ja tmøjpiktaktøø ja fariseotøjkti jøts ja kajpxwejpitøjkti sa Dios ja wyinaty tø tyamidsøkyidi, jøts ja ka'ap tkupøjktøø jøts Juan ja yiknøbatidit.

31 Jøts ja nwindson'ajtim wyaañ:

—¿Pønxiø øts jade'en meets n'uktami'ejxip?

32 Jade'en meets ndami'ejxi sam mutsk unajkindi muum y'adø'øtsti jap maayjøtpy ku myi'unajk tkagupøjkiyidi ja kyuyajtin midi yjatsøjkpy yjaguyatwampy, jade'ents ja ñawya'añidi: “Tø øø yikxon njaxu'uxy jøts ni mga'atsti; tø øø jotmay'øøgyim nja'øømi, nijade'ents mgajotmay'oo'kmidi.”

33 Kuts ja Juan Bautista tø myiñ jøts ja kyakay kya'uuky ku ja ka'ap vino t'uuky, jøts meets mn-imy jøts ku miku' ja myøøt'ajtpy.

34 Jøts ku ø tø njamemi jøts ku ø ngaamyi n'ukmi, jøts mnømidi jøts ku øts janch kaxim ngay n'uuky, jøts ku øts ja møøt namyigu'uk'atyiyi ja yikugubajtpidi møøt ja ka'øyjaa'dyi.

35 Pøni pønts ja Dios yja' tkupøjkp, ja'ats tja'gyukip sam ja Dios yja' ttsøkyin.

Ku ja Jesús jam fariseo tyøjkjotp wyinaty pøn txøøw'ajtp Simón

36 Xjats ja fariseit nidu'uk tnimaay ja Jesús jøts ja tmøødit kaabyi tyøjkwindum. Jøts idø'on ja ojts tmøødi, ojts ñijkxy, tyøjkii'ñ jam fariseit tyøjkjotp, ja kaabyajt twinguwa'ltsiyii'ñ.

37 Winets ja tø'øxyøjk tu'uk pøn ka'øyjaa'y'ajtp midi jam tsinaapy jam kajpjotp, ku ja tnija'wiyii'ñ jøts ku ja Jesús wyinaty tø ñijkxy kaabyi jam fariseit tyøjkjotp, jamts ja ojts tmija'aty ja pa'akxuu'kpi, tsagueegi tul'tsjøtpy.

38 Ñiyaxpim ja twingugu'xii'ñ ja Jesús tyeky, jøts ja wyeenøø ja ttuktaxø'jky. Jøts ja nay jatyi ja wyaay ttawibø'øty jøts ja ojts ttsu'kxy, ojts ja ttabakja'laxy ja pa'akxuu'kpi.

39 Jøts ku ja fariseo ja ojts jade'en t'ixy pøn ja Jesús wyinaty tø wyayi migaabyi, yide'en ja wyinmaa'ñ ja jap tyikyø'øy: “Pøni janch Dios kyugajpxy yø jaa'y jeexyip, tø yø jeexyip tja'wyini pøn yø ixa tojnip majtsip, pøni pøn tø'øxyøjk yø', pø ejtpts yø yjantyimpyøkyun'ity yø tø'øxyøjk.”

40 Winets ja Jesús tnimaay ja fariseo:

—Simón, nmigajpxwampy.

Jøts ja fariseo y'adsøøy:

—Yinet Windsøn.

⁴¹ Xjats ja Jesús wyaañ:

—Namajtsk idø'øñ ja jaa'dyi pøn tmiyoj'ajttip tu'uk ja meeñ'anuu'kxyajkpi. Tu'uk tmiyoj'aty magoxk magø'pxy denario jøts jadu'uk wixijxmyajk;

⁴² jøts kumi ka' idø'øñ ja tkubatti nipøn tkagubety ja yoj, jøts ja meeñ'anuu'xyajkpi ka'ap ja sa tijy øy ja tkagubattit, ojts ja ttamee'kxy ja myiyoj. Niğajpxts inet, çpømbi ja jawaani tsojkip, pømbi ja jawaani takajxajkip?

⁴³ Jøts ja Simón y'adsøøy:

—Ja' yjawi pøn ja yoj kajaa tmøøt'ajtp.

Jøts ja Jesús wyaañ:

—Janch tiy idø'øñ mwa'añ.

⁴⁴ Xjats ku ja Jesús ojts t'ixy ja tø'øxyøjk jøts ja tniṁaay ja Simón:

—M'ijxpxyi yø tø'øxyøjk, ku tø ndøki ya mdøjkjøøjtjy ka' mets ja nøø tø xmø'øy ja ndekpyujik; tøts øts yø tø'øxyøjk ne'egi xapakpujy ja wyeenøø jøts ja wyaay yø tø ttuktati'ich.

⁴⁵ Ka'ats mets ndeky tø xtsu'kxi, jøts ku yø tø'øxyøjk, jaayip ku tø ndøki ixa øts ndeky yø jade'en xtsu'kxi.

⁴⁶ Ka' mets ngubajk aceite tø xpiktaajkxiyi, tøts øts yø tø'øxyøjk ja pa'akxuu'kpi ndeky xpiktaajkxiyi.

⁴⁷ Paty mets idø'øñ nnøjmi, pøni pøn ja tsojkin waani tmøøt'ajtp nayide'ents ja waani yikpojkipimaa'kxt; jøts yø tø'øxyøjk møj ja tsojkin yø tmøøt'aty paty pyaat'aty jøts ja pøky yikmaa'kxkøxt.

48 Jøts ja tnimaay ja tø'øxyøjk:

—Nmee'kxpy øts, u'nk, yø mbøky.

49 Winets ja migaabyidi pøn jaty ja jam wyinaty møøtsinaajyip yjanchnawyambinaxwa'jkidøø:

—¿Pøn jaa'y ya'at ndejint, sudso pøky paat yø tmee'kxy?

50 Jøts ja Jesús yide'en ja tnimaay ja tø'øxyøjk:

—Ja'agøjxp mets ja mbøky tø nmaa'kxi ku me tø xjanchjawí, nøjxñits jotkujk.

8

Ja tø'øxyøjk pøn jaty ja Jesús pyudøjkidip

¹ Tøts ja wyinaty y'uknaxy jade'en, jøts ja Jesús t'ayø'øgyijxy ja kajp ja møj ja mutsk møøt ja pyabøjkpitøjk namakmajtsk, jøts ja tkajpxwa'kxy ja øgyajpxy ja øy'ayuujk midi yjaa'y ja tyanitanaapy.

² Nay jam idø'øn ja yjamyøøt'ajtmiiyidi ja tø'øxyøjkmidi pøn ja wyinaty tø tyiktsø'øky, jøts pøn ja wyinaty tø tkajpxpidsøjmi ja miku' jøts ja ttukmajtstu'uty. Ja María dø'øn jam wyinaty pøn yiktejp Magdalena, pøn ja miku' wyinaty niwixujk tø myajtstu'udyiyi;

³ nay jam ja Juana wyinatymi, ja Chuza ñidø'øxy, ja' ñidø'øxy pøn ja Herodes tumbi'ajtip, pøn tuki'iyi t'ejxp tñija'wip ti jam ejtp ka'ejtp ma ja Herodes jam wyindsøn'aty; jam ja Susana wyinatymi jøts may abikpyi jaa'dyi pøn jaty ja tigati tabudøjkiiyidip.

Kuja Jesús tmadyakpaaty ja jaa'y pøn nøjcx neppi

⁴ May jaa'y ja Jesús jam ojts ñimiñiyi pøn jaty tsoo'ndip o ma abikyajp jøts ja Jesús yik'ejxwa'añ;

jøts ku ja jaa'y may'ampy myujkpejty, jøts ja ttamimadyaktøjkiyii'ñ tu'uk ja ejxpajtin madya'aky. Jøts ja wyaañ:

⁵ —Tu'uk idø'on ja jaa'y chøø'ñ tømtwøjpi. Jøts ku ja twijy, øy ja tømt o ma ñaxkidaajky. Midi'ibi ñajtswøjii'ñ jam tuu'am, ja'ats yiktaa'nbu'uxkigyøjx jøts ja joon ja wa'ats tpeemujkijxy.

⁶ Midi'ibits ñajtswøjii'ñ jam tsaā agujkp, ojts ja jam yjamuxy jøts ja jatyi tyøtsjø'knaa ja'agøjxp ku ja naajx jam kyaneki.

⁷ Midi'ibits ñajtswøjii'ñ ma ja magyujp jam wyinaty myuxwa'añ, ja'ats ja ojts ñi'aa'mbajtiniiyi. Ku ja myujxmi winet jøts ja niwine'en kyayiky-onmøjkiyøø.

⁸ Midi'ibits ñajtswøjii'ñ jam pu'uty ñaxkøjxp, jøts ku ja yøøñ jøts ja ojts yikxon yjantyimdyøømi, magø'pxy magø'pxy ja pyajkpejty ja tu'ukpi tømt.

Ku ja Jesús jade'en myadyak'abajtiyii'ñ, jøts ja møkta'aky wyaañ:

—Pøni pøn ja'gyukiwyamp, wan tja'gyuki.

Tigøjxp idø'on ja Jesús ejxpajtin madya'akyøjxp ja y'ixpøjkin tyaky

⁹ Winets ja pyabøjkitøjk ja yiktøjiiyøø ti dø'on jade'en tyijpy, sudso yikja'gyukit ja'abi madya'aky.

¹⁰ Xjats ja t'adsøøy jøts ja tniimaay:

—Meets yø Dios mduknija'wiyip ja y'ayu'uch winmaa'ñ sa ja' kyutujk midi ja tyanitanaapy ja yjaa'y, jade'ents meets ja mdyimyiktukmadøy; ka'ats ja abiky jaa'y nayide'en madya'akyøjxp tnijawidit, ejxpajtin madya'akyøjxp øts yø ja'ayi ndamimadya'aktit jøts kø'øm tniimado'odit

tkani_imado'odit nayide'en pøni sa ø xpabøkti xkapabøkti.

Ku ja Jesús tni_gajpxy sudso dø'øn yikja'gyukit ku jaa'y neppi ñij_kxy

¹¹ Yide'en idø'øn yø madya'aky tijy: Jade'en ja tøm_t yikpikta'aky sam ja Dios kyajpxy y'ayuujkin;

¹² Jøts midi yiknajtswøjy_iñ'ñ jam tuu'am jade'en ja yikpikta'aky sam ja jaa'y pøn ja tpatmadoodip ja Dios kyajpxy, jøts ku ja t'ukja'gyukidi xjats ja mikul ja jaty_i pyøjkxiyidi jøts ja ka'ap tmibøktit, jøts ja nisudso'ampy kyanitso'ok'attit.

¹³ Jøts ja tøm_t jade'en yikpikta'aky midi yiknajtswøjy_iñ'ñ jam tsaa agujkp sam ja jaa'yindi pøn tmadoodip ja øgyajpxy ja øy'ayuujk, jøts ja ejtni xoni t'ukpabøjkøjti y'ukjanchja'widip ja'; kuts ja yiin waan sa tkujatidi jøts ja jaty_i tmajtstu'utti, jaty_i ja ñayjibikpyikta'agyidi ja'agøjxp ku ja jade'endi sam ja ujts kya'aa'tsmiweninim.

¹⁴ Jøts ja tøm_t midi ñajtswøjy_iñ'ñ jam kujp agujkp, jade'en ja yikpikta'aky sam ja jaa'dyi pøn tjamadoodip ja øgyajpxy ja øy'ayuujk, yjajanchja'widip jøts nika'ap t'ukpadunidi, ja' ja ne'egi yikmajadaktip ja pyikta'aky, ja myeeñ, ja yjingaap, ja yjotkujk'ajtindi. Jade'ents ja tka'ukyikmøjtøjkinidi ja øgyajpxy ja øy'ayuujk jøts ja niti tkayikwingaxø'økti Dios wyindum.

¹⁵ Jøts ja tøm_t midi ñajtswøjy_iñ'ñ jam pu'uty ñaxkøjxp, jade'en ja'ami sam ja jaa'dyi pøn amumjoojt nadyamiyojxidip ja Dios, jøts ja jade'en tpatmadojidi ja y'øgyajpxy y'øy'ayuujk. Møk ja yjanchja'win ja tpikta'akti, ka'ap ja juuni

ttamajtstu'utti, ja'ats idø'ø̃n tyikwingaxø'ktip ja øgyajpxy ja øy'ayuujk.

Niti jadi'iñi kyatañ, kuwañim ja tyimyiknijaw:

¹⁶ 'Kidi ja'ajip ja jaj yiktaguno'kp jøts ja yikumutst uk jøts ja yikpikta'akt jap maabajt patki'py; ja' ja wya'añ jøts ja yikpikta'akt jam køjxp ma yjajt tyøø'kxt, jøts ku jam pøn tyøkit ka'ap ja jam kube'ets kugoots yja'attit.

¹⁷ Ti ka'ukyikpatp ku ti yjaju'uch'ity. Øy kajpxy ayuujk yjagayiknigajpxwa'añ, kuwanits ja yiknijawi pøni sa ja y'ejxi tyiyi.

¹⁸ Jade'ents idø'ø̃n øy xmado'odit; pøn tpabøjktip jøts tmadogukiwya'andi øy øy, jaakyikpudøkipts ja yikxondi jøts ja tja'gyukidit. Pønts ka', jaaktyimyikpøjkxidip ja' ja wyijy'ajtindi midi ja jaakjanadyaja'wiyidip jøts ja nisudso'ampy tkidyimyja'gyukidit.

Ja Jesús tyaak jøts y'uch

¹⁹ Winets ja Jesús y'uch yja'ttøø møøt ja tyaak ma ja jam wyinaty, nika'ap idø'ø̃n ja tpaatti wingon kumi janch mayjaa'y jam wyinaty.

²⁰ Xjats ja Jesús yiktukmadøøy jøts ja yiknimaay:
—Ja mdaak møøt ja m'uchti ja mmigajpxwajnip, ixap ja tøjkwimptyi.

²¹ Jøts ja t'adsøøy:

—Ja' øts idø'ø̃n ndaagip, ja' øts idø'ø̃n n'uchidip nmigu'ugidip, pøn tmadoodip ja Dios y'øgyajpxy y'øy'ayuujk jøts ja jade'en tpadundi pøni sa nwa'añ.

Ku ja Jesús tyiknajxy ja møk poj jøts ku ja tyik'amøkiy#ñ ja mejy

22 Winets ja nay ja'abi xøøw tyøjkiyii'ñ barkijøtpy møøt ja pyabøjkpitøjk, jøts ja tnimaay:

—Wan tjaa'myindi jam jaduktamajñ.

Jøts ja ñøjkxtøø,

23 jam ja wyinaty mejkyujk'amdi ku ja Jesus mya'oo'knaa. Jøts ja møk poj ja jam jot-møñ pyaajtídøø, yikxon ja nøø jam barkijøtp yjanchtøjkyini øy ja tyiknitigøøñit.

24 Jøts ja tyujxtøø ja Jesús jøts ja tnimaadyøø:

—¡Windsøn! ¡Windsøn! ¡Nøøjøø'kxwaa'nindip!

Winets ja Jesús pyidi'jky jøts ja møk'ampy twingugajpxiyii'ñ ja møk poj ku ja nøø ja tyiktojmji'iky adsø'jkibim; jøts ja poj jatyi yjanch'amø'jty, jadi'iñi ja myøøñ.

25 Jøts ja tnimaay ja pyabøjkpitøjk:

—¿Ma dø'øn ja mjanchja'windi xyiktunwa'andi?

Tø ja yjanchnichø'jkidyigøøñidi, ñigyumaap ja tyimya'widøø jøts ja xem yam ñawyajnidøø:

—¿Ti pønimts ya'at jade'en, pø mimadojipst ja poj yø', pø mimadojipst ja nøø yø' ku yø' t'ane'emy?

Ja Gadarit jaa'y pøn wyinaty ja miku' tø tyatøkiyi

26 Jøtsnim ja yja'ttøø jam Gadarit etjotp midi idø'øn ja jaduktamajñ tamp Galileit et wingon.

27 Jøts ku ja Jesús jam wyinaajky, yø'øpyidsiimy, jøts ja ñimejnøø tu'uk ja kugajp pøn ja miku' wyinaty jekyip tø tyatøjkniiyi. Niwa'ats ixwa'ats ja wyidejtni, ka'ap ja tyøjkjotp y'uuktsinaañi, jam ja chinaadyakni ma ja oo'kpi ñaxøkidi.

28 Jøts ku ja t'ejxpajty ja Jesús jøts ja jatyi twinguxanaay, yide'en ja tjantymñøjmi møkta'aky:

—Jesús, Dios U'nk tsajpjøtpyit, ¿ti ø xanibøjkip? Tun may'ajt kidi xjantyimy'ayo'onduñ.

²⁹ Ja' idø'on ja jade'en tyikwamp ku ja Jesús ja miku' møk'ampy t'ane'emy jøts ja jam pyidsø'ømt ja jaa'y y'am yjotp. Ejtp idø'on ja miku' ja xyumimi'adi'ichiyi ku ja yjayiktagiwiiñ yjayikta-pakwiiñ pujx kadeen; jatyi ja ttaojtiguixy yam ja jaa'y ja jade'en tø yja'uktajotkujk'ajtmiyi jøts ja nimā kyanøjkxt, jøts idø'on ja miku' ja yikakwidityi o mā jam abak etjotp.

³⁰ Jøts ja Jesús yide'en tyiktiiy:

—¿Ti mxøøw?

Jøts ja y'adsøøy:

—Legión ø nxøøw.

Ja'agøjxp ja jade'en ñaxyøømø'øyi kumi janch may miku' ja wyinaty tø tyatøkiyi.

³¹ Ja'axi dø'on jade'en kø'øm wandip jøts ja tnimaadyøø ja Jesús jøts ja ka'ap kyaxidit jap mā miku' y'ayo'ombaatti.

³² Jamts wyinaty ja kuch yjøø'kxwidejtmidi jam kojpkøjxp ku ja miku' ñuu'kxaktøø jøts ja ttatøkidit ja kuch; yikjajt idø'on ja Jesús ja jade'en.

³³ Xjats ja miku' tmajstuttøø ja jaa'y jøts ja kuch ja ttatøjkidøø, winets ja jiyujk niduki'iyi yjanchep-kuwo'ongøjxtøø jøts ja nøøjøtpy ñaxkidakøjxtøø, japts ja ojts ñøøjøø'kxkøxti.

³⁴ Jøts ja jaa'y pøn wyinaty kuch'ejxtip ku ja jade'en t'ejxtøø yjatti kyubatti ja kyuch, jøts ja yjantyimchø'jkidøø, jøts ja kyaknøjkxtøø jam mā jaty pøngapøn chøøni kamjotp jøts nayide'en jam kajpjotp, jamts ja tuki'iyi ttamimadyakøjxtøø.

³⁵ Jøts ja jaa'y ja tnidso'ongøjxtøø jøts ja t'ejxwa'andi pøni janch idø'on jade'en. Jøts ku

ja yja'ttøø jam mā ja Jesús jam wyinaty, xjats ja t'ejxpattøø ja jaa'y pøn ja maamyiku' wyinaty tø myajtstu'udyiyi jøts ku ja jam chøøni wijy kejy, xøxy piky ja jam mā ja Jesús wyinaty tyani, jøts ja yjantyimchø'jkidøø.

³⁶ Jøts ja jaa'dyi pøn wyinaty kø'øm tø ty-imy'ejxti, ja'ats ja tmadyaktøø sudso'ampy ja ja jaa'y wyinaty ja maamyiku' tø myajtstu'udyiyi.

³⁷ Ja'agøjxpts ja jaa'y ni'ijtyi ñuu'kxaktøø pøn jaty jam wyinaty tsinaadyip Gadara jøts ja Jesús jam pyidsø'ømt etjotp, pø jantyimchø'jkidipxi dø'øn ja'adi. Jade'ents ja Jesús ttatøjkiyiñ ja byarki jøts ja chø'jñ.

³⁸ Jøts ja jaa'y pøn wyinaty tø myajtstu'udyi ja maamyiku', ja'ats møk'ampy nuu'kxakmaa jøts ja yikmøødit jøts Jesús ja tmøøtnøjkxt, jøts ja ojts t'ane'emy jøts ku ja ne'egi tya'ant, yide'en ja tnimaay:

³⁹ —Nøjkx mdøjkwindum, jamts xnigajpxt xnimadya'akt sa Dios tø m'ødyuñiyi.

Nøjkx idø'øn ja jaa'y jøts ja ttamimadyaktøjkiyiñ amuum ja mayjaa'y sa Jesús ja wyinaty tø yikmøkpikyiyi yik'ø'y'atyiyi.

Ja Jairo ñøøx, jøts ja tø'øxyøjk pøn ja Jesús wyet ojts ttojni

⁴⁰ Jøts ku ja Jesús wyimbejtñaā ñøjkxnimaa jam jaduktamajñ, pøkpaat may jaa'y ja jam yjanchja'wiyøø, pø tum awejxipxi ja jaa'y ja wyinaty.

⁴¹ Xjats tu'uk yaa'dyøjk yja'jty pøn txøøw'ajtp Jairo, ja' idø'øn jam wyinaty tniwindsøn'ajtp ja tsaptøjk. Jøts ja ñagyuxendyaajkøø jam Jesús

tyekyjø'øm jøts ja tnīmaay, ojts ja ñuu'kxa'aky jøts ja myøøtnøjkxyit jam tyøjkwindum.

42 Jam ja tyu'ukpi nøøxu'nk, makmajtskin ja yjumøjt ja wyinaty, ja'ats jam wyinaty oo'kp ka'oo'kp. Jøts ku ja Jesús ojts ñijkxy, janch may jaa'y ja pyadso'onøø, janch yikxon ja yik'atejmuky.

43 Jamts tu'uk tø'øxyøjk pamaa'y, myakmajtsk jumøjtyip ja tajxnaxyi ja pyaajtñiyi. Tø ja tnīdya'ayodøjkini ku tsøøyibi ja jadine'en tjamijuy jøts ja nipøn yjanchkayiktsø'ogyiyi.

44 Xjats ja ojts wīngon tjīguyø'øyi ja Jesús, jøts ja wyet pa' ja ojts tjøjxi, jøts ja tyajxnaxyi ja nay jatyi y'adujky.

45 Jøts ja Jesús yide'en tyiktiiy:

—¿Pøn ø tø xøñ?

Kuts nipøn tkanīgajpxy, jøts ja Pedro møøt ja myigu'uk wyandøø:

—Wīndsøn, pø mjanchyik'atejmujkpts, nugots mjanchyiktejmiñ mjanchyiktejxipy, jøts mnimy: “¿Pøn ø tø xøñ?”

46 Jøts ja Jesús wyaañ:

—Tø ø nyiktøñ, tø njawi jøts ku øts nmøk'ajtin tø nduktamøkpiky tu'ugin ja jaa'y.

47 Xjats ja tø'øxyøjk, pø ja'axi tam idø'on yiktejp, jøts ja ojts ñimyibejpnī ñichiyuuñi ñagyuxendya'agyi jam Jesús tyekyjø'øm, jøts ja ojts ttukmadøy jam mayjaa'y agujkp tigøjxp ku ja wyinaty tø ttøñ jøts ku ja nay jatyi myøkpikjky.

48 Wīnets ja Jesús ja ñīmaajyøø:

—Ja'agøjxp u'nk tø mmøkpiky ku ø tø xjanchjawi. Nøjkxni amgujk jotkujk.

49 Ixam ja Jesús wyinaty jade'en wya'añim, ku yja'jty tu'uk ja jaa'y pøn tsoo'mp jam tsaptøjk

windsøn tyøjkwindum, ja Jairo. Jøts ja Jairo yiknimaay:

—Tøts ja mnøøx y'anuu'kxiñi, kidi yø windsøn nugo x'adsejpa'di'ich.

⁵⁰ Jøts ku Jesús ja jade'en tmadøoy, jøts ja tnimaay:

—Kidi mdsø'øgi, møk m'aaw mjoojt xpikta'akt, tu'ugyi ø xjanchjawit, jujkpyøkpa ja m'u'nk inet.

⁵¹ Jøts ku ja jam tøjkwindum yja'ttøø, ka'ap ja jap tøjkjøtpy pøn tyiktøjkiyi'ñ, ja Pedro ja ja'ayi myøøtøjkiyi'ñ møøt ja Jacobo møøt ja Juan jøts ja u'nkteety u'nktaak jade'eñi.

⁵² Janchyaxtip ja wyinatyi, ja y'u'nk ja tyimchaachpa'ayoodip. Jøts ja Jesús ja ñimaajyidøø:

—Kidi mya'axti; ka'ap yø kiixy y'øøky, maapts yø ja'ayi.

⁵³ Jøts ja yjanchyiknixijky, pø ñija'widipxi ja' jøts ku ja wyinaty tø y'oo'kni.

⁵⁴ Xjats ja Jesús ja tmajch kyøjøp'am, jøts ja møk'ampy tnimaay:

—Pidø'øk, u'nk.

⁵⁵ Jøts ja yjujkpyijky, nay jatyi ja pyidi'jky; jøts ja Jesús ja ojts tni'ane'emy jøts ku ja tyika'adyit.

⁵⁶ Ñigyumaap ja møjaa'y ja tyimyja'widøø jøts ja Jesús ja tnimaay jøts ka' pøn ttukmado'odit ku dø'øn ja wyinaty jade'en tø tyuñi jyatyi.

9

Ku ja ñimakmajtskpi pabøjkpitøjk yiktanipøkti ja tunk jøts ja yikajxtsoondi

¹ Xjats ja Jesús tnankñamyujkøø nimakmajtsk ja pyabøjkpítøjk jøts ja myøk'ajtín ja tmøøy, ojts ja tku-tujkmø'øy jøts ja tyikpidsøjmidit ja jaa'y ja miku', jøts ja tyikmøkpøktit ja pamaa'y.

² Ojts ja tkexy jøts ja Dios y'øgyajpxy y'øy'ayuujk ja tkajpxwa'kxidit midi ja tyanitanaapy ja yjaa'y jøts ja tyiktso'oktit ja pamaa'y.

³ Jøts ja tnimaay:

—Ka' mniyø'øyik xko'ondit, niti xkako'ondit, ni tajk, ni pejn, ni tsapkaaky, ni meeñ. Tu'ugyi mwet xminøjkxtit midi ixja mwet'ajttip.

⁴ Jøts ku mdøjk'amido'odit o ma pøni ma mja'atti, tu'ugyits jam mja'ta'aktit kunim jam mdsoonditnim.

⁵ Jøts ku ma pøn mgagupøkidit, tanaxtits ja kajp, ja'ayi ja pu'ux x'ukwinaptit jøts jade'eñi xuk'ejxtit jøts ku jade'eñi tø mnañiwa'achidi.

⁶ Jøts idø'on ja yø'øwya'kxtøø, ñøjkxtøø o magajp, jøts ja jam tkajpxwa'kxti ja øgyajpxy ja øy'ayuujk jøts ja pamaa'y ja tyiktso'okti o madsoo.

Ku ja Juan Bautista ja o'jkin tpaajty

⁷ Xjats ja windsøn Herodes ku ja tnija'wiyii'ñ sa jaty ja Jesús wyinaty y'adi'ich, jøts ja ka'ap ti tabyajtín tpaajty pømbi ja nimaajyip jøts ku ja Juan wyinaty tø yujukpyiky, ja' wyinaty tø pyidsimy jadigojk jap oo'kpi jutjøtpy.

⁸ Pømbits wandip jøts ku ja yja'aji ja Dios kyugajpxy Elías, jøts ku ja' wyinaty tø kyaxi'iky; pømbits nømidip jøts ku ja yja'aji ja Dios kyugajpxy pøn wyinaty windi'ixyip tø y'atsmendi, ja' nidu'ugin tø pyidsimy jadigojk.

⁹ Jøts ja Herodes wyaañ:

—Pø øtsimpts ja Juan kyubajk kø'øm nan̄kyikwinajkøø. ¿Pønts idø'øn ndejin yø' ixa njamado'ity yiknimadya'aky janch ñigyumaap?

Jøts idø'øn Herodes ja tjadyimwyin'ejxwaañ.

Ku ja Jesús yikaay ja nimagoxk milbi jaa'y

¹⁰ Xjats ku ja Jesús kyudanaabyi wyimbejtøø, ojts ja tyamimadyakixyi ti jaty ja wyinaty tø ttundi. Winets ja ojts twaadsøøñ jøts ja tmøøtnijkxy ma nipøn kya'ity jam Betsaida kajp wingon.

¹¹ Kuts ja jaa'y ja tnija'widøø, jøts ja ojts tpanøjkxti; kyupøjkts ja Jesús ja' jøts ja ojts ttamimadya'aky sa ja y'ejxi tyiyi ja Dios kyutujk midi ja tyanitanaapy ja yjaa'y, jøts ja tyiktsøøjky may ja pamaa'y.

¹² Jøts ku ja et chuu'ñaä, xjats ja ñimakmajtskpi kudanaabyi ja ñimejnøø jøts ja ñimaajyøø:

—Kajxni yø mayjaa'y, jøts nøjkx pyoo'kxnidi jøts nøjkx t'ixaañidi ja kyaajyik yjøø'kxik o magajp midi ya wingon tãmp, nitits ya kya'ity ma adøm yaadi.

¹³ Jøts ja Jesús ja ñimaajyidøø:

—Yikaydi meets.

Jøts ja tnimaadyøø:

—Ja'ayits tsapkaaky jap jamagoxkyi jøts ajkx majtskyi, pø winet inet idø'øn pøni nda'ajuu'yigyøjxp øøts inet yø jaa'y ja kaaky ja jii'kxy.

¹⁴ Nimagoxk milin ja jaa'y jam wyinaty. Xjats ja Jesús tnimaay ja pyabøjkpitøjk:

—Yik'ixa'akti tukpik jaty niwixijkxmyajk jaty.

¹⁵ Jøts idø'øn ja jade'en tpadundøø, ojts ja jaa'y y'ixakøxti.

16 Winets ja Jesús tnixajiyii'ñ magoxk ja tsapkaaky jøts majtsk ja ajkx. Ojts chajp'ixy jøts ja ttamøja'wiyii'ñ ja Dios Teety. Jøts ku ja t'adujkpajky, jøts ja ojts ttagødøki ja pyabøjkpitøjk jøts ja mayjaa'y ja ttaguma'adyit.

17 Ojts idø'øn ja niduki'iyi kyay'abidsømdi, niduki'iyi ja kyujxidøø; jøts ja kaaky wyindank ja makmajtsk kach ujts ujts yikpøkmuiky.

Ku ja Pedro wyaañ jøts ku ja Jesús yja'aji pøn yiknitsokp

18 Tuk'ojk idø'øn ku ja Jesús jam wyinaty ja Dios Teety t'ajot'aty nadyu'uk, jamts idø'øn pyabøjkpitøjk ja pyawidityiyi jøts ja tyiktiiy:

—¿Sā jaa'y wya'andi kyajpxti, pønik øts idø'øn?

19 Xjats ja y'adsoodøø:

—Pømbi wandip jøts ku mets Juan Bautista; pømbits wamidip jøts ku mets m'Elías, nømidipts jadu'uk jøts ku me mja'aji ja Dios kyugajpxy pøn mendøø jekyip jøts ja' nidu'ugin tø wyimbity jadigojk.

20 Jøts ja tjaakyiktiiy:

—Jøts meets, ¿sā mee mwa'añ, pøn øts yjawi?

Jøts ja Pedro wyaañ:

—Cristoxi mets, ja yiknitsokpi, ja Dios U'nk.

Ku ja Jesús tnigajpxy ja y'o'jkin

21 Winets Jesús ja ojts møkta'aky t'ane'emy jøts ja ka'ap tmadyakyø'ødyit.

22 Yide'en ja yiknimaadyøø:

—Møk øts ja ayo'on nbaatt, ka' øts ja møjaa'dyøjk xkupøktit, ka' øts ja teetywindsøndøjk xkupøktit, ni ja kajpxwejpitøjk ø xkagupøktit. Xyik'ooktip øts

ja', ja kidigøøk xøøwts ø nbidsø'ømt jadigojk oo'kpi jutjøtpy.

²³ Jøts ku ja jade'en wyaañ, winets ja tnimaay niduki'iyi pøn jam wyinatyi:

—Pøni pøn ø xpabøkwamp, jawyeen ja kø'øm kyanabya'ayowit, jabom jabom øts ja xku'ayowit, ja'ats øts idø'øn xpabøjkp.

²⁴ Pønts kø'øm nabya'ayojip, pøn kasaduñim nay'ejxip, windigøøpyts y'anmija'win ja y'ity; pønts ø xku'o'jkp xkudigø'øyip, ja'ats ja yja' nøjkx nitso'ok'ajtp.

²⁵ ¿Ja ti ja ñiwya'ant øy ja jaa'y tjaja'bøjkixy ja naxwiiñ'ajtin jøts ja y'anmija'win ne'egi wyindigøy?

²⁶ Jøts pøni pøn ø xatsø'ødyump, pøni pøn øts n'øgyajpxy n'øy'ayujk xatsø'ødyuujnip, nayide'ents øts ja tsø'ødyumbi nøjkx ndatsø'ødyuñ, ku ø nme'ent yikutujkpi, ku øts ja ndeety kyunuu'kxy'ajtin nmimejnit møøt ja ankilistøjk yja'adi. Øts idø'øn ja naxwiiñ'it jaa'y nmøjkudanaabyi'ajtpy.

²⁷ Tiy janch mee nnøjmi jøts ku jaa ja jaa'y ya winaagin tyanidi, pøn ka'ooktip kunim ja tyim'y'uk'ejxtit są Dios kyutujk tmime'ent midi ja tyanitanip yjaa'y.

Ku ja Jesús adsu'jky y'atstigajch amuum chamambøjkijxy

²⁸ Tø dø'øn ja wyinatyi tyuktujkxøøwip jade'en y'ukjaty, jøts ja Jesús pyatøjkijy'ñ jam kojpkøjxp Dios'ajot'ajtpi, myøødiy'ñ ja Pedro ja', møøt ja Jacobo jøts ja Juan.

29 Kuts ja Jesús jam wyinaty Dios'ajot'aty, xjats ja wyeen y'aaw ja tyigajch, jøts ja wyet ja ñaamy ja pyoobyi'ñ tøø'kxpim tsamambim.

30 Winets jam kyaxøktøø namajtsk ja jaa'y, ja'ats ja jam møøt myadya'aky, ja Moisés idø'øn ja' møøt ja Elías,

31 nabejk'ampy aju'uk ja ñi'awidityidi jøts ja tkajpxy'atti ja o'jkin midi ja Jesús wyinaty pyaatwampy jam Jerusalén.

32 Øy ja Pedro møøt ja myigu'uk yjamaa'y'ookti, wijy'ejttip idø'øn ja'. Jøts ja ojts t'ejxidi ja Jesús y'aju'uk møøt ja ñamajtskpi yja' nayide'endi pøn ja jam wyinaty møøt tyani.

33 Jøts ku ja jaa'y jam wyinaty jagamnidi, jøts ja Pedro tnimaay ja Jesús:

—Windsøn, ityimy'ø'y'ajtp ku øø nyam'aty! Nyik'øyip øø tigøøk ja ujts'aadyøjk; tu'uk mets mja', tu'uk Moisés yja', jøts tu'uk Elías yja'.

Ka'ap idø'øn ja Pedro y'aaw tjawi pø ti dø'øn ja kyajpxy.

34 Ixam ja jade'en wya'añ ku yoots jam ñaxkidaajky, jøts ja yjancho'jkidøø ku ja jap yoots agujkpy ñay'ejxpajtidøø.

35 Winets ja tmadoodøø ku jap yoots agujkpy kyajpxy ku jap ñimy:

—Øts idø'øn ya'at n'u'nk njanchøjkpy; mimadojidip pøni sa wya'añ.

36 Ku ja wyinaty jade'en tø tmadowdiwya'añ, xjats ja t'ejxpattøø ja Jesús jøts ku ja jam nadyu'uk. Amøñi ja y'ejttoø, ka'ap ja pøn ttukmadowdi ku ja wyinaty jade'en tø t'ejxti.

Ku ja Jesús tyikmøkpjky tu'uk ja mixyu'nk pøn wyinaty ja miku tø tyatøkiyi

³⁷ Jøts ku kyimjabom'ajty, ku ja ojts kyidaknidi jam kojpkøjxp, jøts mayjaa'y ja Jesús yjøpkubajtyøø.

³⁸ Jøts ja jam nidu'ugin møk'ampy ñimaajyøø:

—Windsøn, tun may'ajt, win'ejxik øts n'u'nk, yø'øyi ø tu'ugyi n'u'nk'ajtpy;

³⁹ miku' idø'øn yø xumitatøjkiyip, jøts yø yjanchxumiyiktsabaayi, yikmo'jtniyip yø', jøts janchyik'a'oo'pniyip tnankwyinwøpyi tnankjyøpwøpyi. Nijade'ents kyamajtstu'udyi, am'ijxyim tsaach'ijxyim yjaty.

⁴⁰ Tø øts yø mbabøjkpi njanøjmidi jøts jeexyip yø miku' tyikpidsømdi, nika'ats yø tø myayidi.

⁴¹ Xjats ja Jesús wyaañ:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkit? ¿Windemnim meets yø yjade'embì xuktatso'okt ku øts yø ejtp njanchjanigajpx'ity? Mets, yikmen yø m'u'nk.

⁴² Xjats ku ja mixy wingon myiiñ, jøts ja miku' ja ojts yiknaxkida'agyiyi jøts ja tyukpatkojmiiyi ja mø'ødyi; winets ja Jesús ja miku' twingugajpxiyi'ñ jøts ja tyikømøøy møk møjaaaw.

⁴³ Ñigyumaap ja jaa'y ja ni'ijtyi tja'widøø ku ja Dios ja myøk'ajtin jade'en tyikwingaxi'iky.

Ku ja Jesús tnigajpxy jadigojk jøts ku ja y'ookt

Exam idø'øn ja jade'en wyinatyi ku ja Jesús tnimaay ja pyabøjkpitøjk:

44 —Madowdi ya'at, jøts kidi xja'dyigøydi nijuuni; øts, yikøyakp øts jøts øts ja mayjaa'y nyiktagødøkit.

45 Jøts ja pyabøjkpøjk ka'ap ja tjā'gyukidi ku ja jade'en wyaañ, jøts nika'ap idø'øn ja ttuknimadøy; tsø'jkimidipts ja' jøts ja tyiktø'ødit ti dø'øn ja jade'en tyijpy.

Pøn idø'øn jawaani møj ma Dios ja yjaa'y ja kyutujk ttanitani

46 Xjats ja tkajpxy'ajtpinibøjkidøø pømbi jadyim'y'ukmøjtøkip,

47 wa'ats ja Jesús ja tnijawi sa ja wyinaty wyinmaydi. Winets ja ojts tsa'anji'iky tu'uk ja mutsku'nk jøts ja ñadyawingudsaa'nüyøø,

48 jøts ja wyaañ:

—Pøni pøn øts ya'at mutsku'nk xkupøjkxip, øts idø'øn ja wyinaty xkupøjkp; pøni pønts øts jade'en xkupøjkp, ja'ats idø'øn ja wyinaty kyupijkpy pøn ø xkajxp. Pønts kanamyøjpiktaajkip wine'enin meets ixaaði, ja'ats idø'øn nøjkx møjtøjkp.

Kuja Jesús wyaañ: Adøm ja' nbudøjkibi pøni ka'ap adøm ja xmidsep'ajtyindi

49 Xjats ja Juan tnimaay ja Jesús:

—Windsøn, tø øø n'ixy tu'uk ja jaa'y tyikpidsimy ja miku' mets mmøk'ajtingøjxp; tøts øøts ja ndukmajtstu'uty kumi ka'ap adøm ja xmøøtwidijtyim.

50 Jøts ja Jesús ja ñimaajyøø:

—Kidi xuktamajtstu'utti; adøm ja' nbudøjkibi pøn ka'ap adøm ja xmidsep'ajtyindi.

Ka'ap ja Jesús tyikjajty sa wya'andi ja Jacobo møøt ja Juan

51 Jøts ku ja et ja xøøw tpaajty ku ja Jesús wyinaty ñøjkxwanì tsajpjøtpty, xjats ja jotmøk'ampy chøø'ñ jøts ja ñijkxy jam Jerusalén.

52 Ojts ja tkajxjawyeni kyugajpxy, jøts ja ñøjkxtøø jam Samariit etjotp jøts ja jam t'ixaajyidit ja yja'taajk;

53 ka'ats ja Samariit jaa'y ja tkupøjktøø ja'agøjxp ku ja tnija'widøø jøts ku ja ñijkxy jam Jerusalén.

54 Kuts ja Juan ja jade'en t'ejxtøø møøt ja Jacobo midi ja pyabøjkpi'ajtpy, jøts ja ojts ñi'mxyi:

—Windsøn'ajtim, ¿tuñ øø nayide'en sam ja kugajpxy Elias y'adiijch, n'amido'op øøts ja jøøn tsajpjøtpty, wan yø jaa'y tkudigøøgyøxti?

55 Jøts Jesús ja nugo twin'ijxy jøts ja møk'ampy twingugajpxiyi'ñ, yide'en ja tnimaay:

—Ka' meets yjawì xja'gyukidi pøn meets myøk'ajtin mmøøt'ajtxiyip.

56 Nmøjkudanaabyi'ajtpy øts ja naxwii'ñit jaa'y, kaja'ajip ø tø nnimiñ jøts øts ja jaa'y nyik'ookt nyiktigø'øty, ja' ø tø nnimiñ jøts øts ja jaa'y nyiknitso'ok'att.

Xjats ja choo'ndøø jøts ja ñøjkxtøø abikyajp.

Ja jaa'y pøn tpawidetwandip ja Jesús

57 Jøts ku ja wyinaty jam tyuu'yø'ødyi, jøts ja Jesús ja jaa'y tu'uk ñimaajyøø:

—Windsøn, tsoomp øts, nbanøjkxp mets o madsoo pøni ma me mnijkxy.

58 Jøts ja Jesús y'adsøøy:

—Ne'egi jaa ja waajx ja yjut, ne'egi jaa ja joon ja pya'an; jøts øts niti ø xka'ejtxi øyik øts idø'øn ma n'ønø'ønt.

59 Xjats ja Jesús jadu'ukpi jaa'y tnimaay:

—Møødik øts.

Jøts ja wyaañ:

—Windsøn'ajtim, wan øts ndeety jawyeen t'atsyiknaxøki.

⁶⁰ Jøts ja Jesús y'adsøoy:

—Majtstu'ut, wan ja tyikpidø'økti ja myi'oo'kpi pøn y'anmija'win jajukyi tø tyik'oo'knidi; jøts mets, nøjkx mets ja Dios y'øgyajpxy y'øy'ayuujk xkajpxwa'kxi.

⁶¹ Jøts ja jade'en ñimaajyøø:

—Windsøn'ajtim, nmøødiwyampy mets, nijkxy øts nmigu'uk t'atstukmadøy, nijkxy øts t'atsnagyajpxpidsimyï jawyeen jap ndøjkjøtpy.

⁶² Jøts ja Jesús ja tnimaay:

—Ku jaa'y yu'uy, ja' ja y'ijxpy ja tyunk; pønts ejxjimbejt'adøtsp, tits ja nyikwa'anint. Jade'ents idø'øn ja Dios wyingujkp mā ja ttanitanï kyutujk ja yjaa'y; pøn ja tu'ugyi amumjoojt kamiduujniyip, tits ja jam ñiwyā'ant.

10

Ku ja Jesús tkajxwa'kxy ja ñidugui'pxmyajkpi jaa'y

¹ Jøts ku ja jade'en y'ukjajt, jøts ja nwindson'ajtim twiwijch ja nidugui'pxmyajk ja yjaa'y, jøts ja tpaguejxy namajtsk jaty. Jade'en ja ojts tyiknijkxy o magajp mā dø'øn ja kø'øm wyinaty ñøjkxwā'añ,

² jøts ja tnimaay:

—Janch may pikta'aky pyidø'økwa'añ, ka'ats ja tumbi myayidi. Paty mee x'amido'ot ja kubikta'aky jøts tjaakaxt ja tyumbi jøts pyidø'økt ja pyikta'aky.

3 Nøjxxtits meets; jade'enxi mee mnøjxxt sam borreek ñijkxy ma may miy'uk jamdi.

4 Ni mbejn xkawetstit, ni mmeeñ'abøjki'i'ñ, ni mgø'øk, niti xkako'ondit; jøts kidi pøn xmi'øømayidi xmiğajpxmayidi ku pøn xkajpxpoo'kxtit tuu'ajy.

5 Jøts ku ma mja'taajk x'amidowa'andit yide'en jawyeen mgajpxpoo'kxtit: "Ma meets, Dios mjagyepyidi."

6 Pøni jamts pøn jotøjkiyip ja Dios, ja'ats idø'on Dios janchjagyapip; pøni ka'ats pøn m'adsojimbexiyidi ja mgajpxpoo'kxindi, anaxtits ja tøj.

7 Jøts jam mda'andit ja' tyøjkjotpti pøn Dios jotøjkiyidip, mga'adyip mjøø'kxtip idø'on pøni ti ja mmøøjyidip, mbaat'ajttip ku jade'en myikmo'odit. Kidits tøjkp tøjkp nugo mwidetti.

8 Ku o magajp mja'attit, pøni ma myikupøkti mga'adyipts mjøø'kxtipts ja' pøni ti myikmøødyip;

9 myikmøkpøktip ja pamaa'y jam, jøts ja jaa'y xnøjmidit: "Jaani Dios kyutujk ya midi ja tyanitanaapy yjaa'y, ja adøm ja nmøøt'ajtña'andi."

10 Kuts ma ja kajp xpaattit ma mgayikupøktit, yø'øpyidsømdits jam jøts tuu'am mnøøømdit:

11 "Pu'uxpaat øø ndekyijxy tø tyä'tspøjknì midi ya kajpjøøjty, ixyamts øøts nyikwa'ach meets køjxp, ejxti sa x'ejxti, nañiwaajtsip øøts jade'en. Ja ti winets xkanijawidit, jaa Dios kyutujk wyingøñ midi ja tyanitanaapy ja yjaa'y."

12 Ixyamts mee ndukmadøy jøts ku nøjkx ja tiidyu'unin ñaxy, ne'egi kajaa yø yjade'embi jaa'y ja ayo'on tyimbaattit, jøts nigidi jade'en

y'ayo'ombaattit ne'egi ja kawindi'y jaa'dyi pøn jam Sodoma kugajp'ajttøø.

Ja ayo'on midi tyanaxtip ja ka'øgyajp

¹³ 'iCorazingit jaa'dyi, Betsaidit jaa'dyi, mjanch'ayøøy meets, ti jade'en mnadyatuujnidip! Ku jeexyip jam kajpjotp jam Sidón jam Tiro ne'egi yiktuñ ja milagri'ajtin midi meets ya tø myiktu'unxi, windi'ixyip ja jeexyip ja chinaa'yin tyiktigajtsnidi, ku ja pyøky jeexyip tyimchaachjawidi.

¹⁴ Kuts nøjcx ja tiidyu'unin ñaxy, mgu'ayowipts meets ja jinaxy, nika'ap ja ne'egi jadine'en y'ayo'odit ja jaa'dyi pøn tsinaadyip jam Tiro jøts jam Sidón,

¹⁵ jøts meets Capernaumit jaa'dyi, ¿ma mee xijy tø mdyimya'aty, tsajpjøtpy? Pø japxi meets ay-odaajkjøtpy mnøjkxtit.

¹⁶ Jøts ja Jesús ja pyabøjkpitøjk ja tnimaay:

—Pøni pøn mbatmadojidip, øts idø'on ja wyinaty xpatmadoodip; pønts mgagupøjkidip, øts idø'on ja wyinaty xkagupøjktip; pønts øts jade'en xk-agupøjkp, ja'ats idø'on ja wyinaty kyagupøjktip pøn ø xkajxp.

Ku wyimbejttøø ja ñidugui'pxmyajkpi jaa'y

¹⁷ Xjats ja ñidugui'pxmyajkpi jaa'y ejtni xoni yjanchwimbejtnidøø, jøts ja wyandøø:

—Windsøn'ajtim, tøbaat øøts ja miku' xmimadøy ku øøts ja tø ngajpxpidsimy mets mmøk'ajtingøjxp.

¹⁸ Jøts ja Jesús ja tnimaay:

—Janch jade'en, ojtsts øts ja miku' n'ixy ku ja kya'ukmajadakni ja myøk'ajtin ja'agøjxp ku ja pyidsimy jap tsajpjøtpy.

19 Øtsts meets ja nmøk'ajt̃in t̃ø nmø'øy jøts ka' sa mjattit. Øy meets ja tsaa'ñ øy meets ja kajpy xjadawa'kpety, øy meets ja miku' ja myøk'ajt̃in sa mjadatunwa'añidi, mimajadaajkip meets yja' ja' jøts meets ja ka' sa mdunit.

20 Kidits yø'øyi tu'ugyi xajotkujk'att̃i ku yø miku' mmimadøyi, ja' mdajotkujk'att̃ip ku ja Dios m'ejxkapyidi xemikøjxp jap tsajpjøtpy.

Ku ja Jesús xyonda'aky

21 Winets ja Jesús tjantyxondaajky ja Espiritu Santo, jøts ja wyaañ:

—Dios Teety tsajpjotpit, yikjucky'ajtpi ya naẏwiiñ, nmøja'wip ngunuu'kxyja'wip ja'agøjxp ku t̃ø xamidsøky o pøn ja mnitsoojkin, jøts yø wijyaa'y ja t̃ø tkaja'gyukidi k̃ø'øm, ne'egi t̃øts ja xuk'ixy xuknijawi pøn id'ø'n ka'ejxiyimdi. Jade'ents Teety t̃ø xuñ sa k̃ø'øm xamidsøky o pøn.

22 'Tum ja' øts nDeety xuktump midi ja k̃ø'øm tyunwampy. Ka'ap øts pøn wa'ats xnijawi sam øts nDeety k̃ø'øm xnijawin, nika'ats øts nDeety pøn wa'ats ñijawiyi sam øts ja k̃ø'øm nnijawin. Jøts pøni pøn øts ja nduknijawiwypy, ja'ats tnijawidip ja Dios Teety.

23 Winets ja pyabøjkpitøjk ja twin'ejxi'jky jøts ja yide'en ja'ayi yiknimaadyøø:

—Janch nekim meets ku meets ja k̃ø'øm xty-imy'ijxy xtyimñijawi midi meets ixa k̃ø'øm mdy-imy'ijxpy mdyimbyatpy;

24 may Dios kyugajpxy, may windsøndøjk yø k̃ø'øm tja'ejxwandøø tjanijawiwya'andi midi meets ixyam k̃ø'øm m'ijxpy mnija'wip, nika'ats

ja t'ejxtøø; ojts ja tjamadowa'andi midi meets
ixyam kø'øm mmadøøpy, nika'ats ja tmadoodøø.

Ku ja samariit jaa'y yjotwa'añ

25 Xjats tu'uk wya'kukiyi'ñ ja kajpxwejpidi
jøts ja nugo kajpxy'ejxwa'añ ja Jesús, yide'en ja
tyiktiiy:

—Windsøn, ¿sudso ø ndu'unt jøts øts
n'anmija'win ñitso'ok'att xemikøjxp?

26 Jøts ja Jesús ja y'adsojimbejtøø:

—¿Kidimts jap tø x'ixy nøkyjøtpy midi ja Moisés
kyutujk myøøt'ajtpy, sa ja xja'gyuki?

27 Jøts ja kajpxwejpi y'adsøøy jøts ja wyaañ:

—“Amumjoojt x'ajot'att ja Dios, ma'in
m'anmija'win ma'in mwinmaa'ñ myajada'aky
jade'en ja xwindsø'øgit; jøts nayide'en ja
mmigu'uk xpa'ayo'ot sam kø'øm mnabya'ayøyin.”

28 Winets ja Jesús ja ñimaajyøø:

—Tiy janch idø'øn mjanchwa'añ. Pøni mbad-
umpy yø jade'en, nitso'ok'atpts ja m'anmija'win.

29 Jøts ja kajpxwejpi ka'ap ja ttajotkuki ku ja
jade'en yik'adsøy, jøts ja tnimaay ja Jesús:

—¿Pøndsik øts idø'øn ndsaachmigu'uk'ajtpy?

30 Jøts ja Jesús y'adsøøy jøts ja tnimaay:

—Tu'uk idø'øn ja jaa'y, jam ja wyinaty
kyida'aky ma ja Jerusaléngit tuu' jøts ja ñijkxy
Jericó, xjats maa'tspi ja pyajttøø jøts ja wa'ats
yikwimaa'tskijxy, wyet ñaamy yikpøjkijxy; øy øy
yikwinwøjpy yikjøpwøjpy jøtsnim ja yiknikejky,
jawaani ja tkayik'oo'knidi.

31 Xjats jam jotmøñ wyinaajky nay jam tu'uk ja
israelit teety; øy ja tja'ijxy, wyininaajk ja'.

³² Jøts jadu'uk kyidakmøø ja Leví yjaa'y jøts ja nayide'en twininaajkmaa, øy ja tja'ijxy.

³³ Winets jadu'uk ja tuu'yø'øbyi kyidaajky Samariit jaa'y, jøts ku ja ojts jade'en t'ixy xjats ja wyinmaa'ñ ja tymchaachmiiñ ku ja jade'en yik'ayowim.

³⁴ Jøts ja wingon twingunøjkxiyi'ñ ja tsaachibi, xjats chaachi ja tsøøyiyi, ojts ja tpiktaajki ja aceite møøt ja vino jøts ja t'adsujmi ja chaachi. Winets ja ojts tyikpety kyø'øm jiyujkøjxp jøts ja ojts tyikja'aty ja'taajkjotp, jamts ja tpa'am'ejx tsunajxy.

³⁵ Jøts ku kyimjabom'ajty ku ja samariit jaa'y wyinaty choonwani, jøts ja tju'jty majtsk ja my-eeñu'nk jøts ja tkømøøy ja kudøjk, yide'en ja tnimaay: “Ejx'et yø jaa'y, mo' pøni ti ka'ejtxip, jøts pøni ka' yø meeñ tpaaty ixa nmø'øy, yiktunts mgø'ømeeñu'nk, ja øts ja ngubatt ku nwimbett jadigojk.”

³⁶ Xjats ja Jesús tyiktiy:

—¿Pønts me m'a'ejxip migu'uk'ajtip ja jaa'y pøn ja maa'tspi yiktsaachidyøø?

³⁷ Jøts ja kajpxwejpi wyaañ:

—Ja' ja migu'uk'ajtip pøn ja ojts y'ayo'ijxyi.

Jøts ja Jesús ja ñimaajyøø:

—Nøjkxts jøts nayide'en xu'unt, jøts nayide'en mjaa'y'att sam ja jaa'yin pøn ja myigu'uk ojts t'ayo'ixy.

Ku ja Jesús yja'aty jam Marta jøts María tyøjkwindum

³⁸ Xjats ja Jesús jade'en wyidity jøts ja yja'jty ma kajp wyinaty tu'uk, jamts ja tø'øxyøjk ja tu'uk

wyadsoojøø jøts ja ojts wyayi tyøjkjøtpy, Marta dø'øn ja xyøøw.

³⁹ Jamts myiga'ax ja tu'uk, María'ajtp ja', ja'ats twingu'ixajkiyiñ ja Jesús jøts ja tpatmadøy pøni sa ja wya'añ.

⁴⁰ Jøts ja Marta, ja' ja jam kyami'awatsip ja tyøjktunk, jøts ja tñimiiñ ja Jesús jøts ja tñimaay:

—Windsøn'ajtim, ¿kidi sa mwā'añ ku øts yø nmigu'uk nadyu'uk xuktunwanguixy yø tunk? Nøjmi waani jøts ø xpudøkit.

⁴¹ Jøts ja Jesús y'adsøøy:

—Marta, Marta, yø' me nugo mdajotkijxpy mda-jotmay'øø'kpy yø mdunk.

⁴² Ka' mets yø ne'egi x'øyjawī yø øybi winmaa'ñ midi xemikøjxp tamp, ja'ats yø María tø tjā'gyuki midi paat'ajtip. Ti pønts yø xijy ukpøjkxiniyip jadigojk.

11

Ku ja Jesús tnanky'ixpiky ja Dios'ajot'ajtin

¹ Xjats idø'øn ja Jesús jam ja wyinaty ja Dios Teety t'ajot'aty, jøts ku ja y'abajtiyiñ, winets ja pyabøjkpitøjk ja nidu'ugin ñimaajyøø:

—Windsøn'ajtim, tukjajtk øøts ja Dios'ajot'ajtk, ti sa ja Juan ttukajjty ja Dios'ajot'ajtk ja pyabøjkpitøjk.

² Jøts ja Jesús y'adsøøy jøts ja wyaañ:

—Ku mdsapkajpxtit, yide'en mwā'andit:

Dios Teety tsajpjotpit, kuuyi mets jadu'uk øy wā'ats.

Øyts ku xmimiñ ja mgutujk midi mdanitanaapy ja mjaa'y.

Yikjatts ya naxwiiñ nayide'en kò'òmdsojkingøjxp
pøni sà xamidsøky nayide'en sam jap xuñin
tsajpjøtpy.

³ Møøkyts øøts ixyam ja ngaajyik n'uujkik midi øøts
xka'ejtxip.

⁴ Maa'kxik øøts nbøky, kumi tø øøts nayide'en
nmaa'kxuky pøn øøts xjemdump xedump.

Agidyujk øøts axajtujk øøts, kidi øøts xmajtstu'uty,
jøts kidi myajada'aky ja miku' yja'.

⁵ Jøts ja yjaakwaañ:

—Jade'enin n'ukpiktaajkin jøts ku o pøn ja
myigu'uk jam tu'uk, jøts ja tñidsøñ møjtsuu'm
jøts ja t'atsnøjmi: “Migu'uku'nk, tun may'ajt
t'uk'anuu'kxk øts tigøøk ja mdsapkaaky, ngubatp
øts.

⁶ Nmigu'uk øts idø'øn tø yja'aty ndøjkjøtpy, ja'ats
øts idø'øn njadukaawyampy, ka'ap øts nja' ty-
imñiti.”

⁷ Jøts ja yjadu'ukpi yide'en n'ukpiktaajkmant
y'adsøy japyi tyøjkjøtpy: “Kidi øts jadine'en
nugo xjanchne'emy; aduky yø tøj k jøts ixyap
øts n'unajk nmøøtma'ay maabajtkijxpy; ka'ap øts
yap nbidø'økwa'añ, jade'ents øts inet ka' ti nyakt.”

⁸ Yide'ents øts ja ndyimy'a'ejxi pø myigu'ukxi ja',
øy ja yjagabidø'økwa'añ jøts ja t'atsmo'ot midi ja
myigu'uk ja amidojyip, kuwanits ja tjanchjatu'unt
jade'en, y'atsmøøgyøxp idø'øn ja' pøni ti jaty ja
chøjkpy jøts ja jade'en ka'ap y'ukna'amniyit, pø
naña'amixi ja kyatsøjkpy.

⁹ Paty mee yikxon ndukmadøy: Jøts x'amido'odit
xpøktso'odit ja Dios, mmo'oijpts meets ja';
mdukpaadip meets ja' pøni ti meets mga'ejtxidip;

myik'awaajtsxiyidip meets tøjkaaw ja' ku øy ma mgugajpxidit.

¹⁰ Paty ku pøn o ti t'amidøy, yikmøøpyts ja'; ku pøn o ti t'ixa'ay, pyatpyts ja'; ku pøn tøjkaagaj twingøxy, yik'awaajtsxiyipts ja o pøn.

¹¹ '¿Ku mee wyinaty m'uk'u'nkteety'aty jøts ku m'u'nk m'amidowidit ja tsapkaaky, wan meets m'aaw mjoojt ndejin myajada'akt jøts meets tsaa ja xkøjyit? ¿uk xmo'odit ja tsaa'ñ yam meets ja ajkx ja mja'amidøyiyi?

¹² ¿uk xmo'odit ja kajpy yam meets ja tutu'uty ja tømja'amidøyiyi?

¹³ Øyts mee mabaat mjagatyimy'øyjaa'y'atti, mjaajtipts ku xmo'odit ja m'u'nk m'una'jk midi øy tsuj pidsømp, jtits ja Dios tyungip, pø tsajpjøtpyxi ja', myo'opts ja' ja Espíritu Santo pøni pøn ja amido'oxiyip!

Ku ja Jesús yikniimaay jøts ku ja miku' myøk'ajtin ja yiktuujni

¹⁴ Xjats idø'øn jade'en ngøjmyi, jam ja Jesús wyinaty tyikpidsimy ja miku' midi jam wyinaty tyik'ejtnip uum tu'uk ja jaa'y; jøts ku ja miku' pyidsimy jøts ja jaa'y jatyi kyajpxpijky. Jøts ja mayjaa'y janch ñigyumaap ja tyimyja'widøø ku ja jade'en,

¹⁵ jøts ja winaagin ñømdøø:

—Ja møj miku' yø jaa'y ja myøk'ajtin yiktuujnip, ja' yø tyuktapidsimpy yø myimiku' midi yø jaa'y myøøt'ajtp, yø' wyindsøn myøk'ajtindi yiktuujnip.

¹⁶ Pømbits nugo ttatundip jøts ja tjot'ejxwa'andi, ja milagri'ajtin ja y'amidoodip jøts ja tyimdyuk'ejxidit midi kidakp tsajpjøtpy.

17 Wa'ats ja tnijawi sa jaty ja wyinaty wyinmaydi, jøts ja tnimaay:

—O pøn windsøn, ku kyutujk ja chepta'aky jøts yjaa'y ja ñawya'kxyi kawinakpiky jøts ja xem yam cheptundi agø'ømyidi, nankyøjxidipts ja jade'eñi jøts ni ja kutujk niti kya'ukwani, uk kuts tu'uk migu'uk agø'ømyi cheptundi jøts ja ñawya'kxniyidi, agø'ømyits ja xem yam ñankyudigøyidi.

18 Nayide'ents miku'mi pøni nawyanwa'kxip ja kø'ømyi jøts ja agø'ømyi ñanky'ayo'ombaadyi, ¿windemts ja jeky y'ejtnit ja myøk'ajtin, kidi ja jaty kyudigøøñit? Yø' øts idø'øn jade'en xyikwamp ku meets mwa'añ jøts ku øts ja miku' myøk'ajtin nyik-tuujniyi ku øts yø jaa'y ja miku' ngajpxpidsøjmiyi;

19 pøni ja'ats øts ja myøk'ajtin njanchyiktuujnip, ¿pønts meets mmigu'uk yja' yiktuujnidip ku ja tkajpxpidsømdi ja miku'? Pø yø'øxi mee kø'øm mni'øø'niyip jøts ku mee nugo mgajpxigøy.

20 Diosts øts ja myøk'ajtin nduktapidsøjmip yø miku'di, yide'en idø'øn xja'gyukidit jøts ku ja Dios tø tyikmeni ja kyutujk midi ja tyanitanaapy yjaa'y.

21 'Ku tu'uk jotmøkjaa'y t'ejx'ity tyøjk, janch yikxon ja ta'tspiky tø tsøøjmjø'kixy ja ta'o'jk, pønts ja mayip jade'en, jade'ents pyikta'aky ja jap tøjkjøtpy jotkujk tyik'ity, ka'ap ja ti tkumay.

22 Jøts kuts jam jadu'uk jawaani jotmøk yja'aty jøts ja myimajada'agiyi, tuki'iyi tya'o'jk ja pyøjkxiyi midi ja y'uktamøj, jøts pyikta'aky ja yikja'abøkøjxni ti jaty ja jam yjagyeypy.

23 'Pøn ø xkabudøjkip, ja' øts idø'øn xmidsepwamp; jøts ku øts pøn ti møøt njapøkmukwa'añ jøts ja jinaxy tpøkwa'kxy.

Ku ja miku' jadigojk t'awimbeti ja chinaadyaajk

²⁴ 'Ku ja miku' tmajtstu'uty ja jaa'y, jøts ja nugo wyidity o ma tøøts etjøøjty, tja'ixa'ay ja pyoo'kxaajk; jøts ku ja nima tkapaaty, jøts ja wyinmay: "Tiku øts ndøjk jadigojk nga'awimbeti ma tø ndsøøñ."

²⁵ Jøts ku ja wyimbity, jade'ents ja jaa'y ja tpaaty sam tu'uk ja tøjktawa'ats, pe'ety jaaxy ja jap.

²⁶ Winets ja chøøñ jadigojk jøts ja janixujk tjaaktyimy'atsway ja myimiku' jawaani ka'øydi sam ja kyamajada'agyin, jøts ja jadine'en ttatøkidi ja jaa'y, tsinaadyaajk ja tyikwa'andi, jøts ja jaa'y jade'en jinaxy myøwa'añ, nigidi ja y'ijty jade'en øyim idøøñ wyinaty ja miku' ja jam tjamøøt'aty tu'umchi.

Pøn ja xemikøjxpit xondaajkin myøøt'ajtpy

²⁷ Exam idøøñ ja Jesús wyinaty jade'en wyaañ ku tu'uk tøøxyøjk jam jaa'y agujkp møk'ampy wyaañ:

—janch kawinmaañi tmøøt'aty ja xondaajkin pøn tø myike'exyi jøts pøn ja che'tsk tø mduktay-eegy!

²⁸ Xjats yide'en ja Jesús y'adsøøy:

—janch nekim ja'adi pøn tpatmadooip ja Dios kyajpxy jøts ja jade'en tpadundi!

Ku ja ka'øyyaa'y ttamidowdi jøts yiktuk'ejxtit ja milagri

²⁹ Namyuk'adøjtsidip ja jaa'y jam wyinaty ma ja Jesús, jøts ja tnimaabyinaxwa'jky:

—Niwine'en ja yambi jaa'y kya'øyidi, ñadyijyi tnijawiwya'andi pøni janch ku nDios U'ngi, paty t'amidowdi jøts yiktuk'ejxtit ja milagri'ajtin;

nɪwɪne'ents kya'ukyiktuk'ejxnɪdɪt, wan ja'ayi
mɪdɪ ja kugajpxy Jonás ojts tyuk'ijxyɪdɪ.

³⁰ Nayide'ents sɑ ja Jonás ojts t'ejxpajt'aty
ja Nínive jaa'dyɪ, nayide'ents øts yɑ'atpi jaa'y
x'ejxpajt'att.

³¹ Ku wyɪnaty kyutuky ja et ja xøøw, ku yɑ'atpi
jaa'y nøjcx yiktiidyundi, jøts ja windsøndø'øxy yø
ñɪdanaagyukyɪdɪt jøts ja ñi'øøniydɪt pøn tɪdso'on
jagam et ja Salomón, jøts ja t'ejxøø tɪjɑ'wɪyøø
ja wyijy'ajtɪn; ɪxyɑts jadu'uk tø kyaxi'iky jawaani
wɪjy mɪdɪ tɪjɪnajxp ja Salomón, nayide'ents meets
ja xkagupiky.

³² Nay jats ja Nínive jaa'y wya'kukɪdɪt ku ja
tɪdyu'unɪn ñaxt ku yiktiidyu'undɪt yɑ'atpi jaa'dyɪ,
jøts yɪkni'øøniɪdɪt; ja'agøjxp ku ja Nínive jaa'y
ne'egi tyiktigajstøø ja chinaa'yɪndɪ ku ja Jonás
ja ojts tyukmadøyɪdɪ ja Dios kyajpxy ja Dios
y'ayuujk; ɪxyɑts jadu'uk tø kyaxi'iky pøn ty-
imñija'wɪp wɑ'ɑts, nɪgɪdɪ ja Jonás y'ijty jade'en
tɪjɪjawi, nayide'ents meets ja yɑm xkagupiky.

Ja øy jaj mɪdɪ jaa'y tyɪkja'gyukɪp

³³ Ka'axɪ pøn jaj ttukɪdøøbyøki jøts ja yɪkyu'utst
o mɑ, uk jøts ja yɪkujupt kajuun patki'py, ja'agøjxp
ja tyøøbyɪky jøts ja yɪkɪkta'akt mɑ yjajɪt, kuts jam
pøn tyøkit tyuk'ejxpɑɑtpts ja o tɪ.

³⁴ Jade'en ɪdøøɪn yø mween n'ukɪktaajkɪnt
sɑm jajɪn, yø'øts tyɪkujajtaajkɪp tyɪkudøø'kxaajkɪp
amuum ja mne'kx ja mgojpk; kuts ja mween
y'ø'y'aty nayide'ents ja amuum tjagejpy ja ne'kx
ja kojpk, ka'ap ja ttuktuñ kya'øybɪ.

³⁵ Øyɪmts x'ejxtɪt jøts kɪdɪ xyɪk'ooktɪ ja jaj mɪdɪ
wɑ'ɑts jajp, jøts kɪdɪm jade'en mjattɪ sɑm jaj

kya'ityin, sam ja jain midi kawa'atsjajp jøts yik'ayowin kube'ets kugoots.

³⁶ Pøni mwinmaa'nbyattipts øy yikxon, ja jajts idø'øn ndejint mgayik'oo'ktip jøts ka' jade'en m'etti sam o pøn kugootstujpy chøønin niti winmaa'ñ, o nugo chaachjawin'ejx'ookti. Kuts meets, wa'ats meets ja mduk'ejxpaadyidi pøni ti dø'øn m'ejxwandip, ka' ti jadu'uk chøkyi, jade'en ja myikujajtaagiyidi myikudøø'kxaagiyidi sam jaj wa'ats mduk'ejxpaadyidi o ti.

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

³⁷ Kuts ja Jesús jade'en kyajpx'abajtiyii'ñ, xjats fariseo ja tu'uk wyaajøø tyigam kaabyi. Kuts ja jam tyøjkiyii'ñ jøts ja y'ixaajky, kaabyajt twinguwa'atsiyii'ñ.

³⁸ Jøts ja fariseo janch ñigyumaap tyimyja'wiyii'ñ ku ja t'ijxy ja Jesús kyagøbujy yam ja kyaawya'andi, jade'en idø'øn ja tsinaa'yin'atti ka'ap ja nugo kyøbujti, yide'en ja tyikajpxti jøts ja' ja tyaniwa'ats'ajttip ku ja kyøbujti, jøts ja kyapøkpyatti.

³⁹ Yide'ents nwindson'ajtim ja tnimaay ku ja jade'en t'ijxy wyinmay:

—Jade'en mee fariseotøjk mjaa'y'aty, ja'ayi mee mjanchkamijotkukip sudso ja texy ja tas nikijxyi nadyiyi wa'ats y'ett, jøts ka'ap ja xunk'atti pøni sadam ja yjotpy. Ni xkaja'gyukidi kudam m'amp mjotp tum ja axøøkpi yigaappi xjamøøt'atti ku jaa'y nugo xwin'øøndi xwimaatsti.

40 ¡Nugo mee mdyimyø'øty! ¿Ka' xnijawidi ku tu'ugyi ja kojpi tø tyik'øyi ja m'anmija'windi jøts ja pikta'aky?

41 Jade'eñi Dios mgupøkiyidit ku amumjoojt md-sojkingøjxp xunk'attit ja pudøjkin. Jade'en ja m'anmija'win ja wa'ats'ajtin tpaattit.

42 'iMjanch'ayøøy me fariseotøjkti! Køx kida'ak meets xjanchkugubatkixy jøts ka'ap ne'egi xpadu'unxidi midi ja Dios kyutujk jawaani ne'egi yjani'ane'empy, ku ja ttsøky ja øy tiidyu'unin, ja pa'ayo'ejxk, jøts ja janchja'win. Ya'atpi meets idøøn ne'egi jawaani mjapaat'ajtip mbadu'ump.

43 'iMjanch'ayøøy mee fariseotøjkti!, ku mee tum jam mnachøkyidi mdsinaawya'andi tsaptøjk'okp windsønin. Jøts ku tuu'ajy, øy paat meets ja nagyajpxpoo'kxi xtsokti, myikwindsø'ogip myikwinjawip meets, ejxim meets jadi'iñi myikwinajxni.

44 'iMeets tsaach'ataayjaa'dyi, jøts m'ayøøy mee kajpxwejpitøjkmidi! Jade'en mee mnankyaxji'igyi sam ja oo'kpi kajuunin øy nikøjx kyaxji'iky jøts ka' nadyijyi tyikaxji'iky pøni sadam ja yjøtpy.

45 Xjats ja kajpxwejpitøjk nidu'uk y'adsøøy jøts ja wyaañ:

—Windsøn, ku jade'en mwā'añ xuk'ayojip øøts yø nayide'en.

46 Jøts ja Jesús yide'en y'adsøøy:

—iMjanch'ayøøy mee kajpxwejpitøjk nayide'endi!, ku ja kutujk xyik'øyidi kamaabyim, ka' meets ja køøm x'uktuni, ja pujx ja kajp meets ja mdukmidanaapy, kamadøyim meets ja x'ukja'wiñi.

47 'iMjanch'ayøøy meets!, ku yam xjanch'ukyik'øyiidi xyikpaadiidi ja oo'kpi nipots pøn ja m'apteety yik'ooktøø, ja Dios kyugajpxy.

48 Jade'en yø yikja'gyukiñi sam o ti pøn kajpxy'aty tyik'ity, kajpxy meets ja yjawi xyik'ejtni møøt ja mdeety'aṽpti ku ja tyik'oo'ktøø ja Dios kyugajpxy, jøts meets ixyam xyik'øyimi xyikpajtimyi ma ja ñaxøjkidøø. Mdsaachpa'ayøøpy meets ja xiij jade'en.

49 'Paty tam idø'øn ja Dios kyajpxy wya'añ yide'en: “Ndanigaxp meets ngugajpxy møøt ngudanaabyidi, myik'ookpts meets ja winaagin; jøts pønts jaakjata'aṽndip, myik'ayo'ombaattipts meets ja'.”

50 Meets Dios ja mdagubatidip wine'enin ixa mnaxwii'ñitjaa'y'atti ku ja m'apteetyi tø tyik'ookti ja Dios kyugajpxy. Tuki'iyi ja tpayø'øgyøxt, jaayip ja tpayø'øbyinaxwa'akt kuuyip ja naxwii'ñit cho'ondaajky,

51 kuuyip ja Abel t'oo'k'awiyii'ñ jabaat ku ja Zacarías y'o'jky, ku jaa'y ja yik'o'jkøø jap tsaptøjkjotpy ma ja altajr jap. Paty me ndukmadøy jøts ku Dios ja ttabayø'øty ja yamit naxwii'ñit jaa'y.

52 'iMjanch'ayøøy mee kajpxwejpitøjkti!, ku x'ama'at'ajtidi ja Dios kyutujk; kø'ømyi meets ja mnadyamidsøkyi, ni xkabadumidits ja', jøts ni xkaduknija'wimidits ja abikpyidi pøn ja tjanijawiwyaṽndip.

53 Ku ja Jesús jade'en wyaañ, jøts ja kajpxwejpitøjk møøt ja fariseotøjk yjantym'ambøjktøø. Jantyimyikmi'ambøjk ja Jesús

jøts ja tanejkin'ampy tjantyimyiktøwdi ñadyijyi tigati.

⁵⁴ Øyik idø'øn ja ti t'ukmado'odit, y'amaa'tsk'ejxwāndipxi ja' jøts ja jatyi ttani'øønidit pøni ti ja kya'uk'ømyadoodip.

12

Ku ja Jesús tnigajpxi ja fariseotøjk kya'øwyinmaa'ñ jøts yikjøpjawit

¹ Yikxon ja jaa'y yjantyimñañimujkpajtidøø mil'ampy, nugo yjanch'adøtsnidi, xem yam yjanchnadyateñidi. Jøts ja Jesús ja pyabøjkpitøjk tnimaabyinaxwā'jky:

—Øyim mnay'ejx'etidit ejxim yø fariseotøjk kya'øwyinmaa'ñ mdawin'iñidi ti sa yø iiy wyaniði, jabi wā'atsts yø iiy ñadyijyidi.

² Wants uk jade'en, ka'axi mā ti yu'uch'ity, kuwanixi ja øy juuni yjadyimyikpaaty; uk kuts o ti yjayik'amaa'tsk'aty, kuwanits ja yiknijawi.

³ Jade'en'ampy ja wā'ats nøjkx yiknijawi ti jaty mee mdumpy amaa'tsk, ti jaty mee mgayiknigaxji'kpy, adsu'jkyts ja y'uknigaxjø'knit sam o ti xinaxy wā'ats kyaxji'iky. O me ti amaa'tsk xjakajpxy, øy meets ja pøn xjagadukmadøy, wā'ats ja nøjkx yikajpxnaxy ejxim ti tøjköjxp yikajpxwa'kxyin jøts yiknijawit.

Ku ja Jesús tnigajpxy jøts ku ja tu'ugyi pøn yik-tsø'øgip

⁴ 'Mee migu'uktøjkti pøn jaty ø xpabøjkp, meets idø'øn nnimaapy jøts kidi xtsø'øgidi ja yikjaa'y'oo'kpidi, pø ka'axi anmija'win ja

tjadyimyik'ookti øy ja wyinaty tø tjayik'øøky ja ñine'kx.

⁵ Ja'ats mee ndukmadoowampy jøts ku ja' xtsø'øgidit ja Dios pøn tyikutujkp jøts mnøjkxtit ayodaajkjøtpty yam meets ja o'jkin tø xja'ixy. Ja'ats idø'øn mdsø'øgidip.

⁶ Ka' meets Dios m'ejxigøyi, ¿ti sa ja nimagoxkpi joon chobaaty jøts ja yiktagujuy majtsk ja puxmeeñ?

⁷ Machøybaat meets mwaay ja myik'ejtniyi. Paty ka' mdsø'øgidit, ti sa ja mutsk jonuna'jk ja tkaja'dyigøy; mats meets ja ndejint mja'dyigøø'ñiyit.

Pøn jaty t'øñigajpxp t'øñimadyakp ja nwindson'ajtim Jesucristo jam mayjaa'y agujkp

⁸ 'Yikxon mee x'ukmado'ot, pøn ø xpukajpxip, pøn wamp mayjaa'yjøjty jøts ku øts ja xpabiky, nayide'ents øts ja møk nnitanit jam Dios wyingujkp ma myay'ankilis ja jam møøt;

⁹ pønts ø xkabukajpxip, pøn wamp mayjaa'yjøjty jøts ku øts ja ka' xpabiky, nayide'ents øts ja niwine'enin nga'ejxkapt, niwine'enin nganitanit jam Dios wyingujkp ma may'ankilis ja jam møøt.

¹⁰ Jaakyikmaa'kxtip ja ne'egi pøn ø tø xk-aguidyimy'ødyejti, ja'ats nima niwindem ja kyayik-maa'kxtit pøni pøn tka'ømyigajpxtip ja Espiritu Santo.

¹¹ 'Kuts pøn myiknøjkxidit jam tsaptøjkjotp uk myikwaanøjkxtit ma kutujktaajk ma kudunk ma tiidyumbi, kidits meets ja xajotmay'oo'kni, kidi meets ja xkumayjawi sa dø'øn jap mwa'andit, sa dø'øn jap m'adso'odit,

12 pø ja Espíritu Santoxi meets ja mda'awa'aníyíp pøni sa dø'øn jap mwa'andít, ja' meets jap myikajpxiyíp ku tpaatt ja et ja xøow juuni mgajpxtit.

Sa ja kumeeñ'ajtín xyikwinmaa'nmya'jtínt

13 Xjats jam tu'uk wyaañ jam mayjaa'y agujkp jøts ja tniimaay ja Jesús:

—Windsøn, nimaajyík øts yø nmigu'uk jøts wan ø xmø'øy ja nmaay.

14 Jøts ja Jesús wyaañ:

—Yikxon me waani m'ukjaa'y'att. Ka'axi ø pøn tø xpikta'aky jøts meets ja mbikta'aky nyikwa'kxiyít, uk jøts øts jade'en ndu'unt sami kudungin.

15 Nayide'en ja wyaañ:

—Øyim x'ejxtit, nay'ejx'etidim jøts kidi o ti kayakyim x'ejxti, kaja'ajíp jaa'y ja y'anmija'win tyajujky'ajtpy xemikøjxp ku pyikta'aky ja may'ampy tmøøt'aty.

16 Jøts ja yide'en tmadyakpaajty tu'uk ja ejx-pajtin madya'aky midi ja kø'øm ñajtsja'wíp jøts ja yiktamija'gyukit midi ja ñimadya'akwampy, jøts ja wyaañ:

—Jaa dø'øn wyinaty tu'uk kumeeñ jaa'y jøts jan-tyimy'ejtp idø'øn pyikta'aky ja jam kyamjotp.

17 Winets ja tniwinmaa'yiyi'ñ jøts ja wyaañ: “¿Ti sudso ndabyaatt, sudso øts yø nbikta'aky ndu'unt? Ka'ats øts n'abøjk'i'ñ ma øts yø nbøkjø'økt.”

18 Jøts ja yjaakwaañ: “Tø nniwinmayi sudso øts yø ndu'unt. Yø ndsa'jx tam ø nyikida'ap jøts ø nyik'øyit jawaani møjpi, japts øts ja nbikta'aky nbøkjø'køxt ti jaty øts ja nmøøt'ajtpy.

19 Winets ø kø'øm nnañø'ømxiyit: Ja tidsik winmaa'ñu'nk xijy mjadyimyjadsøjkpy jabi ixyats may pikta'aky midi kawinaak jumøjt m'ajot'atp; poo'kx pøk mets, kay uuk mets jotkujk xoni.”

20 Yam ja wyinaty jade'en wya'añ jøts Dios ja ñimaajyøø: “Jaa'gyumo'tpi, ixyam koots inet m'looknit; jøts midi jap tø xpøkji'iky, ¿pøn yø tja'atp?”

21 Jade'en idø'øn jaa'y yjaty pøn ja pyikta'aky nugo tniþøkpajtp jøts ja ya jotkujk ttuktanaxy ja et ja xøøw, ayoopts ja y'anmija'win ja yjaty jam Dios wyingujkp ja'agøjxp ku pyikta'aky ja ya kø'ømyi tø t'ajot'aty.

Ku ja Dios t'ejx'ity pøn jaty ja y'u'ngip y'una'jkip

22 Xjats ja Jesús oojknim tniṃaay ja pyabøjkpitøjk:

—Yikxon ndukmadowdi: Kidi nugo xpmamaydi xpadajti ja mgaajyik m'uujkikti, ti mnidsøønidiþ, ni ja mwet ni ja mnaamy mee xkaguma'aty ti mwet'attip.

23 ¿Ti jade'en ja jujky'ajtin yikpaaty sam ja kaaky jii'kxyin? Pø ka'axi. ¿Jøts ja wet ja naamy miþaāt ja t'uk'amibaāt nayide'en pøni sa dø'øn ja ne'kx ja kojpk yikmøøt'aty?

24 Ejxti yø jøøky, ka'axi yø ñe'epti kyojti, ka'axi pyikta'aky yi tyikpidø'økti, ka'axi pyikta'aky yø tpøkjø'økti jøts tpikta'aktit jap tsa'jxjøtpy; øy yø jade'en yjagatundi, ja Diosts yø yikjujky'ajtidip. ¡Tits mee mdsow sa ja jiyujk jade'en ja yja' yikmo'odi!

25 ¿Pøn kø'ømdsøky tyimy'uknankyojnþ jagujkp metrþn øy ja maþaāt jade'en tjadyimyjatsøky?

26 Pøni ka'ats tam ja jade'en yjaty, ¿tigøjxpts ja yikmijotmay'ookt?

27 'Uk'ejxtim sa o ti pijy yøñ, ¿ti pee'tip kojtip yø'? Jøts tiy janch meets idø'øñ nnøjmi jøts ku ja windsøn Salomón nijade'en kyanaxyojxøø sam yø pijyin, øy ja mabaat tjabiktakijxy ja xyox.

28 Sats idø'øñ ja Dios jade'en txøxy ja pijy midi jaty ixyam o madsoo yondip øy ja jabom yjayiknitsaañit; kuts meets, ¿tiku meets idø'øñ ja mgaxoxit? ¿Sudso meets ja xpmay xpadajy ti jaty mga'ejtxiyidip?

29 Paty wingujk jotkujk mwidettit, kidi meets ja xkumayja'wiñi ma xpøktit ti mga'adyip m'uuktip.

30 Jade'en naqxwii'ñit jaa'y ixyamdi pøn ja Dios yja' tkaja'gyukidip, ja' pyawidejtip tpamaydi tpadajti ja pikta'aky ti jaty chojktip; kuts meets, wa'ats meets Dios Teety mnijawiyidi ti jaty mga'ejtxidip.

31 Ne'egi kupøjkidits ja Dios chinaa'yin ja kyutujk midi ja tyanitanaapy yjaa'y, jade'ents meets ja mmo'ojidit ti jaty mga'ejtxidip.

Ja kunuu'kxy jujky'ajtin midi jap tsajpjøtpy

32 'Kidits mdsø'øgidi, jade'en me n'ejx'ity sam pøn ja byorreegu'nk t'ixy; o meets idø'øñ mganamayi, mdanitaniiyipts meets Dios Teety ja kyutujk, jade'en meets ja mdamidsøkyi.

33 Tookti pøni ti jaty jam mmøøt'ajttip jøts ja Dios jade'en'ampy xamiyoxtit ku xmo'odit pøn jam ti ka'ejtxidip pøn ayoodip; jade'en y'øpyidsø'ømt ku xpaattit ja jujky'ajtin midi jap tsajpjøtpy, midi ka'ap mwindigø'xyidip.

34 Pøni mā xnajtsjawīdi xpaatwa'andi ja juky'ajtin, nay japts meets ja mwīnmaa'ñ y'ity.

Ku ja Jesús wyā'añ ku jøp'ejx'ity n'ejtindit

35 'A'ejxi abaadi mnanky'etidit.

36 Jade'en sam tumbi tjøp'ixy ja wyindsøn ku ja ñijkxy tø'øxñi'ukpi, jøts kuts ja wyimbett jøts ja jatyi tyik'awaajtsit ja tøjkaaw ja'ayi ja yja'att, ja'ayi ja kyugajpxit.

37 Nekim ja tumbidi pøn kajxa'aky pidsømdip ku ja wyindsøn ja pyaadyidi wijy keje, ku ja kyama'adi kya'etti yam ja yja'aty; jøts tiy janch meets idø'øn nnøjmi, wan ja tka'uknagyumayi kø'øm jøts ja tyik'ixa'akt ja tyumbitøj jøts ja ttukwinguwaadsit ja kaabyajt, wan ja tka'uktawindsø'øgi ja kaaky ja tojxk.

38 Øy ja juuni yjaja'aty, yjaja'aty ja tsuu'm yjaja'aty ja jøpkyoots, kuts ja kyayikmaa'gyubaadidi ja'abi tumbits idø'øn nekim t'ejxtip.

39 Ku o pøn pyikta'aky t'ejx'ity tyøjkjøtpy, ejtp ja tjøpja'wigyunaxy ja maa'tspi, ka'ap ja ñagyumaadigøyi pøni juuni dø'øn ja y'ukja'att.

40 Nayide'ents meets idø'øn mjøp'ext ejtp; ku øts jade'en jotmøñ nme'ent yam ø ngayikumay, pøn ja naxwii'ñit jaal'y ja myøjkudanaabyi'ajtpy.

Ja tumbi pøn øy ejx'ejtp

41 Wīnets ja Pedro wyaañ jøts ja tyiktiiy:

—Windsøn'ajtim, ¿øøts yø dø'øn yø jade'en xamimadyakp, uk niduki'iyi dø'øn xnøjmi?

42 Jøts ja nwindsøn'ajtim wyaañ:

—Ja tumbi pøn yiktump ku ja myadøy ku ja yja'gyuki, ja'ats ja wyindsøn tanipøjkip pøn jaty ja jap tyøjkjøtpy jøts ja tyika'aty sa pyaat'atyin.

⁴³ Nekimts ja'adi pøn jade'en tpadundip ti jaty ja wyindsøn ja tø tyanipikyidi. Øy ja juuni yja'aty, ixapts ja jade'en ttayø'øbyety, ixap ja jade'en tyundi.

⁴⁴ Ndyimñajtsja'wip øts jøts ku ja wyindsøn ja pyikta'agit jøts ja tyuk'ejx'etit tuki'iyi pøni ti jaty ja jam yjagyeypy.

⁴⁵ Pønts tkajøp'ejxp ja wyindsøn, pøn jade'en winmaapy, jekñim ja tijy yja'att, ku ja yiktaminikaagi ja myøøtumbi jøts ja jaty øy sagasa ttuñ ja myøøtumbi, ja yaa'y ja tø'øxy, ja'ayi ja chøøñ ja wyindsøn nekim ja winet kyay y'uuky, jøts ja myuktigøøñi,

⁴⁶ kuts ja wyindsøn wyimbity øy juuni yam ja ka' tjøp'ixy yam ja niwine'enin tkagumay; ixjadam ja yja'aty jøts ja tyagubetyi ja'agøjxp ku kya'øy'aty, ¿ma dø'øn ja yiktumbi jade'en?

⁴⁷ Pønts wa'ats tjanija'wip sa dø'øn ja wyindsøn tjatsøky jøts ja nika' tjøp'ixy jøts ja nika' tmimadøy pøni sa ja yjawa'añ, yikxonts ja nøjkx yiktagubety, yikxon ja yjantyimyikwojpmatst.

⁴⁸ Pønts tkidyimñija'wip pøni sa tam idø'øn ja wyindsøn ja tjatsøky, jøts ja ka'ap tjøp'ixy jøts ja ka'ap tmimadøy, ñiwyaanits ja ne'egi yiktagubatt, ka'ap ja ne'egi jadine'en yikwopt. Ti sa o ti jade'en pøn o ti may yikmøøpy, nayide'ents ja yik'amido'oxit may'ampy; pønts o ti yiktami'ajot'ajtíp, jinaxyts ja yikxon yiktabayø'øty.

Jesús køjxp jaq'y ñawya'kxyidi

49 Ja t̄idyu'unin øts ya t̄ø nmimiñ naxwiiñ; janch tyimjyawamp øts idø'øn jøts ja jeexyip yam nyiktunkpatni!

50 Nnijā'wip øts ku ndanaxt ja møj ayo'on, jndajotmay'oo'kunaxp øts ja jaanim kunim øts ja wyinaty t̄ø ndanaxy!

51 Sa mee m'ukwinmay, ζøy'ajtin xondaajkin ti øts yjawi t̄ø ndanimiñ naxwii'ñit jaa'y? Nømp øts jøts ku ka', nan̄kñawya'kxip øts jaa'dyi.

52 Yamnim inet t̄ø cho'onda'aky, nøjkxp naxpts idø'øn jade'en tukmigu'uk xyiktseptā'aktit øy ja tu'ugyi yjatsøøniidi, nideety nidaakti, ni'u'nk ni'una'jkti. Pøn nimagoxkti, nawya'kxidipts ja', jøts ja ñayjibøkidit jagam ixkø'øm namajtsk jaty nidigøøk jaty.

53 Øts køjxp ja kawin'ijxyim ñayjawiyidit ja u'nkteety ja u'nktaakti møøt ja y'u'nk y'una'jkti, ja yaa'y ja t̄øøxy, tum jade'en y'adø'tst̄it ja tsu' ja xa'kxy, ja u'nk ja mø'jt.

Ja ejxa'an sudso yiknijawit jøts ku wyinaty t̄ø tmibaat'aty jøts kyøxt ja naxwii'ñit

54 Ñayi ñimaamyøø ja Jesús ja mayjaa'y:

—Ku x'ejxti ja yaak pyidi'iky mā xøøw yjexy winets mnømdi, tu'up tam inet, janchjajpts idø'øn ja jade'en.

55 O kuts ja poj wimbet'ampy yø'øy ku kyax-uxpyøjy, jats mnømdi, janch'anwamp tam, janch t̄øødipts idø'øn ja m'ayuujk, janchjajtpxi dø'øn ja jade'en.

56 jMee win'øø'mbidi! Pøni mnija'widip tam sa kyaxi'iky ja et ja tsajp ku ti tyunwa'añi, ζtikuts nayide'en xkanijawidi pøni ti dø'øn tunwajnip

ya'atpi xøøw ya'atpi jumøjt ku ja møk'ajtín
wyíngaxi'íky jøts ja øy sagasā mjayiktuk'ejxti?

*Kajpx'øyidi jøts mnamyijotjimbetidit møøt ja
mmidsep*

⁵⁷ ¿Tiku yikxon xkawinmagyukidi pøni sã dø'øn
chøkyi, pøni sã dø'øn pyaat'atyí?

⁵⁸ Ku pøn mni'øøniwya'añidi jøts ja
myiknøjkxwã'añidi jam kudunk wyíndum,
nãnga'aním jam myiknijkxyidi tiku yikxon
xkakajpx'øyidi jøts ja møøt mnamyijotjimbetít
jadígojk, jøts kidi myiknijkxyidi jam tídyumbí
wyíndum; ¿ja tí nø'ømp ja windsøn jam? Pø
mgøyakídipxi ja jam jøts mee myikøyakt mã ja tajk
mã ja mayojr jamdí, ja'ats mee myikpuxøktøkiyip
jøts mee myiktsu'umt.

⁵⁹ Øts idø'øn wamp jøts ku jaanim mbidsø'ømdít
ku wyínaty tø ja multa xkubatøkøxti.

13

Yajkpy øy'ajtín ja' ku ja tsinaa'yín tyígach

¹ Nayí wínet et idø'øn ja Jesús jam ñimejnøø
wíngaagin ja jaã'dyí jøts ja ojts tyamímadya'agyi
ku ja Pilato wyínaty tø tyik'øøky ja Galileít
jaã'y, jøts ku ja jaã'ñi'jpy ja ttukmiyø'øyiyí'ñ ja
jyíujkni'jpy midí ja wyínaty kø'øm tø t'ukyik'oøkti
midí ja wyínaty kø'øm tø tyøxti.

² Jøts ja Jesús wyaañ:

—Jade'en mee mwínmay jøts ja' ja Galileít jaã'y
kyujajtídíp jade'en ku ja yjantyímbyøkyundi sãm
jam jade'en ka' pøn jam y'etjotptí kyajpjotptí.

³ Øts wamp jøts ku ka'; ti pøn idø'øn ka'ookp, nayide'en mee m'ookt pøni ka' mdsinaa'yin xyiktigatsti.

⁴ Jade'en meets yjawī mwinmaañi, ja jaa'y pøn oo'ktøø nimaktuktujk ku ja pøch ja pyajtidøø midi wyinaty janch køjxp tanaapy midi yiktejp Siloé, jade'ents meets yjawī mwinmay jøts ja' ja kyubajtip ku ja jawaani pøky tyaja'adyidi sam ka' pøn pøn jaty jam Jerusalén tsinaadyip.

⁵ Nømpsts øts ku ka'; nayide'en mee m'oo'køxt sam ja'ajindi pøni ka' mdsinaa'yindi xyiktigatsti.

Ku ja Jesús tmadyakpaaty ja iigi kipy midi katøømiip

⁶ Xjats ja Jesús ttamadyakpaajty tu'uk ja ejxpajtin madya'aky jøts ja wyaañ:

—Tu'uk idø'øn jaa'y, jamts ja y'iigi tsa'am kam ja', ja'ats ja y'ats'ijxpy pøni tø dø'øn ja wyinaty tyøømi, jøts ja ni tu'ugin tkapaajtøø ja tyøøm.

⁷ Jamts idø'øn tyumbi tu'uk pøn ja kam t'ejx'ejtp jøts ja tnimaay: “Ukmadowim, tigøøk jumøjt øts ixyam kujk njamiyø'øy jøts øts ja iigi tsa'am njatukwa'añ, nijuunits ø ni tu'uk ngapaatynim. Yikidaagøjxnits yø ñiguipy; nugots ja naajx yø yjawī tyikwindujkni.”

⁸ Jøts ja kam ejx'ejtpi y'adsøøy jøts ja wyaañ: “Waniimts, windsøn, tjaak'uk'ity jadukjumøjt; n'ukuyu'up øts, n'uktajyuu'ngip øts yø naajx jøts øts ja pu'uty nbiktaajkit.

⁹ Kidi wan jade'en tyøømi; pøni ka'ats, winets yikpo'jtjø'økt.”

Ku ja Jesús tyikmøkpiky tu'uk ja tø'øxyøjk poo'kxin xøøw et

10 Jøts idø'øn ngøjmyi, poo'kxin xøøw wyinaty, jøts ja Jesús yik'ixpiky jam tsaptøjkjotp.

11 Jamts idø'øn tu'uk tø'øxyøjk myaktuktujk jumøjtíp pa'am ja wyinaty tø pyaajtñiyi. Jøts ja jade'nen kyatsø'øky, tø ja yjigujxkidyigøøñi, miku' idø'øn ja wyinaty jade'nen tø tyuñi jøts ja niwine'nen kya'ukoogukini.

12 Ku Jesús ja y'ejxi, winets ja yaajxiyi, xjats ja ñimaajyøø:

—Tø mba'am mniwaajtsniyi, møk møjaa'wni mets.

13 Jøts ja ojts tkønixajy, jøts ja tø'øxyøjk nay jatyi kyoogukiyi'ñ jøts ja tiy tyaañ jadigojk, winets ja ttukmija'wiyi'ñ ttukunuu'kxyja'wiyi'ñ ja Dios.

14 Jøts ja møjaa'y midi tñigubajk'ajtp ja tsaptøjk tjantyami'ambijky ja Jesús, tigøjxp ku ja yiktsø'øky poo'kxin xøøw, jøts myigu'uk ja tñimaajy:

—Paty tu'unin xøøw jaa tudujk xøøw tø yikpikta'aky jøts jaa ndu'unindit; mendits øy juuni nugo ku kyapoo'kxinxøøwi, jade'nen mme'endit pøn jaty ja nankcho'ogi ttsojktíp.

15 Jøts nwindson'ajtim yide'nen t'adsøøy:

—Mee win'øø'mbidi, ¿m'ukyik'ijtpy meets mjiyujk mdsakaa miwø'ømbety, jøts adøødsi xyik'etti ku pyoo'kxinxøøwi? ¿Ti kidi meets ja xyikwinaky jøts meets nøø ja xaniwøpy?

16 Tits ya'at tø'øxyøjk kyubatp ku yø kyatso'okt ku poo'kxin xøøw, pø Abrahamts yø tyeety'apip jøts ja miku' yø myaktuktujk jumøjtíp yikpa'ambajtñiyi, ¿sudso'ampyts yø kyamøkpøkt øy yjapoo'kxinxøøwi?

17 Ku ja Jesús jade'nen wyaañ, jøts ja myidsep chø'dyunbattøø; jøts ja mayjaa'y tyaxondaktíp

ja' ku ja t'ejxti jade'en ja Jesús myøk'ajtín tyikwíngaxi'íky.

Ku ja Jesús tmadyakpaaty ja mortas tømt

¹⁸ Yide'ents ja wyaañ:

—¿Tixik ja y'ukyiktami'ejxip ja Dios Teety kyutujk midi ja tyanítanaapy yjaa'y? ¿Tixik jade'en?

¹⁹ Jade'en idø'øñ n'ukpiktaajkin ja' sa møj mortas tømt midi ja jaa'y wyøjpy kyamjøtpy, kuts ja myuxy jøts ja jade'en yøñ sam o ti møj kipy yøñ paxax paxax, jamts ja joon kyøxke'eky jøts tyik'øyiibaat pya'an ja jam mā jaty y'awaj y'axeeñ ja jam.

Ku ja Jesús tmadyakpaaty ja levaduri

²⁰ Nayinøøm ja Jesús:

—Tixik øts jadu'uk n'uktami'ejxip ja Dios kyutujk midi ja tyanítanaapy yjaa'y.

²¹ Jade'en idø'øñ ndejint sa ja levaduri midi yiktamimøø'kxip ja ariin way jøts ja amuum tyakaagiyit, jøts ja jich yaakt.

Ja mutsk tøjk'aaw

²² Xjats ja Jesús ñajxy jøts ja jam ojts ñijkxy Jerusalén, yik'ixpøjpk yik'ixpøjpk idø'øñ ja', pøni mā jaty kajp ja tpaaty ja møj ja mutsk.

²³ Winets ja jaa'y ja tu'uk yiktøjøø:

—Windsøn'ajtim, ¿janch niwaani dø'øñ ja jaa'y ñitso'ok'att?

Jøts ja Jesús ja t'adsøøy:

²⁴ —Janch jade'en jaa ku jap ka' pøñ nugo ajawí ñaxti, øyimts x'ejxtit mā mdøkidit, jade'en ja n'ukpiktaajkin sam jaa'y ttanaxy mutsk

tøjk'aaw; øy jap pøn yja'uktøkiwyaniidi, ka'ats ja y'uknaxnīdit.

²⁵ Kuts ø ndanaagyukit, jade'en ø ndanaagyukit sam kudøjk tyanaagyukin jøts tyøjk'aaw ja t'atsyik'aduky. Pøni tøts meets jap wyinaty mdandi tøjkwimpy, mjagugajpxidi mjatøjkwingoxti meets jap, uk mjanømdi meets jap: "Windsøn'ajtim, yiktøjkik øøts." Jade'ents mee nnøjmit sa ja kudøjk wyā'añin: "Ka' mee nnijawi pø mbøn meets, pø mā mee mdsøñ."

²⁶ Jats mee mwīnambīnaxwa'akt: "Tiku me ndejint øøts xka'ijxyi, jabi tøts adøm ngaamyujkin n'uukmujkin, jabi mets ojts o mādsōo myik'ixpiky."

²⁷ Yide'ents mee n'adso'ot: "Tø nwa'añ jøts ku mee ka' nnijawi pøni mbøn meets. Jiwa'akti ya, kidi øts ya xwīn'ejxti, ɿpønxik ø x'abajxtip, kidi meedsip?"

²⁸ Japts mjø'ødit mya'axtit, m'amdøtskaattit mdaachtøtskaattit ku x'ejxtit ja Abraham, ja Isaac, ja Jacob jøts ku ja jap ne'egi møøt nīduki'iyi ja Dios kyugajpxy y'etti, mā Dios kyutujktaajk mā yjaa'y ja ttanītani kyutujk. Ka'ats meets jap jade'en mdøkit.

²⁹ Yø'ømyujkøxtip naxwīi'ñit jaa'dyi, o mādsōo choondit, jøts ja tpaajtidit ja Dios myøjkunuu'kxin midi nīpøn kyapatpynim, midi ja tya'awijxpy ja yjaa'y.

³⁰ Pøn yam yik'ejxtip ka'ejxiyimdi, pyadundipts ja ne'egi sa nwa'añ, ja'ats idø'øn ne'egi nøjks yikmøjpiktaktip, pønts ñadyijyi ixyam møj nija'wībimdi jøts ja ka' tpadundi sa nwa'añ, ja'ats idø'øn yik'ayowim jattip.

Ku ja Jesús t'ayo'ijxy ja Jerusaléngit kajp

³¹ Jøts ja fariseotøjk nay ja'abi xøøw yjajtøø ma dø'øn ja jam wyinaty jøts ja ñimaajyøø:

—Jade'en ne'egi tyimy'øy'att ku mnøjkxnit, myik'lookwajnipts ja Herodes.

³² Jøts ja t'adsøøy:

—Nøjkx x'atsnøjmidi ja tsaach wyax'atøøy jøts ku yamyi jabomyi wixøjkpyi njaakajpxpidsimy ja miku', njaakyiktsø'øky ja jaa'y jøtsnim ø n'abaadit.

³³ Nøjkxpimts øts jam Jerusalén, tuu'døjkip ø tsojk, ti ma Dios kyugajpxy abikyajp y'uk'øøky.

³⁴ 'iMets Jerusaléngit kajp, meets Jerusaléngit jaa'y, pø meetsxi myik'øø'kpy Dios kyugajpxy, meetsxi mnankyajtsip pøn Dios kyajpxy y'ayuujk tyikyø'øyip ku Dios ja ya mjadaniguexyidi! iTø njapeemukwa'añ njakonmukwa'añ ja m'u'nk ja m'una'jk sam tsikuna'jk tyaak ñimu'uxyi tu'ugyi, ka'ats jade'en tø xkupiky!

³⁵ Ejxtits inet ja mdsaptøjk abak tyandi; øts idø'øn wamp jøts ku meets xka'uk'ejxnit tsojk jøts ku meets jaanim x'ext pøni juuni ja xøøw ja jumøjt wyinaty yja'aty ku mnø'ømdit: “Ejxik Dios kyunuu'kx u'nk ñadyaguguexyi midi mmimejnip ja kyutujk.”

14

Ku ja Jesús tyikmøkpiky ja jaa'y pøn wyinaty kexp

¹ Xjats idø'øn yide'en yjajty ku poo'kxin xøøw tpaajty, ojts ja Jesús kaabyi ñijkxy jam windsøn tyøjkwindum pøn ja fariseotøjk wyindsøn'ajtip. Jamts idø'øn ja'adi ja ti ma ja y'etti, jam ja tpa'ejxti tpagowdi.

² Jamts wyinaty tu'uk jaa'myi pøn ke'expa'am pøjkip.

³ Jøts ja Jesús tnimaay ja kajpxwejpitøjkti møøt ja fariseotøjkti, yide'en ja tyiktiiy:

—¿Kutuky jøts ja pamaa'y cho'okt poo'kxin xøøw u ka'?

⁴ Jøts ka'ap ja y'adsowdi, amøñi ja y'etti. Winets ja tnixajiyiñ ja pamaa'y jøts ja tyiktsøøjky, yide'en ja tnimaay jøts ku ja ñøjkxnit.

⁵ Winets ja tnimaay ja fariseotøjkti:

—¿Pøn yjiyujk chakaa jatyi tka'ukyikpidsømp ku ja ja'jøtpy kyunaxy øy yjapoo'kxinxøøwi?

⁶ Nika' idø'øn y'adsojimbetti, nisa ja kyawa'andi.

Ja tø'øxñigaabyi tø'øxñi'ukpidi

⁷ Jamts idø'øn ja Jesús t'ijxy ja migaabyidi jøts ku ja twi'ejxti ja chinaabyajti ku ja twinguwaadsidi ja kaabyajt jam, jam ja y'ixa'akti ma dø'øn ja myøjtøkidit jøts ja ojts t'ane'emy:

⁸ —Ku pøn mwawidit tø'øxñigaabyi tø'øxñi'ukpi, kidi jam jatyi m'ixa'akti ma ja tsinaabyajt jam ja windsøn tø yiktanibiktaagi, jaa ku ja wyinaty yja'aty yam meets jam tø m'ixajkni;

⁹ jøts ja kujøøn kudøjk mnøø'mxiyidit pøn wyinaty tø mwayidi: “Tani me waani, wan ya'at jam tsøøni.” Xjats kuwani mjanchjajiwā'aktit tsø'ødyumbim jøts jam m'ixa'aktit ma o pøn y'ixa'akti.

¹⁰ Ku pøn jade'en mwawidit, ne'egi øyts ku m'ixa'aktit ma o pøn y'ixa'akti; kø'ømnimts ja kujøøn kudøjk ja mdukmadowidit ku ja jam wingon mye'ent, jøts ja mnøø'mxidit: “Ya, migu'uk, naξ mdsøøniidi ma jam yik'ayowim

tø mdyimy'ixaknidi.” Jade'ents meets ja xajotkujk'attit ne'egi ku jade'en kø'øm myiktukmado'odit, yam ja jam chøønidi pøn jaty ja kaabyajt tø twinguwaadsidi.

11 Pøn kø'øm namyøjpiktaajkip, yik'amutskpiktakpts ja nøjkx, pønts kanamyøjpiktaajkidip pøn ka'ejxiyimdi, ja'ats ne'egi møjtøkidip, ja' yikmøjpikta'aktip.

12 Ñayi ñimaay ja jaa'y ja' pøn ja wyinaty kaabyi tø wyayi:

—Ku pøn xyikaawya'ant, kidi ja'ayi nugo xway pøn jaty møøt mnamyayiyi, ni ja mmigu'uktøjk xkawa'at, ni ja kumeeñ jaa'y xkawa'at pøn jaty jam mmigujøøn'ajtpy mmigudøjk'ajtpy. Ka'ap ja'ayi xwa'at pøn jaty myiwimbejtxiyip pøni ti jaty mets myajkpy.

13 Ja ne'egi mwa'ap ja ayoobi jaa'y, ku ti xøøw xu'unt, waw ja' pøn kati'ejtxidip, pøn kyø' tyeky ma'atti, uk y'ejxidi sagasa, pømbi tyeky ka'ejtp, pømbi jam winap.

14 Ne'egi nekimts jade'en mnayjawiyit, pø ka'axi ja mdunwimbejtxiyi nayide'en pøni ti mets ja tø xmø'øy, jaanimts ja xwin'ext sa ja mwingaxøjkxiyit ku jadigojk jujky'ajtpi pyidsø'ømdit pøn jaty tø tpadundi pøni sa jaty pyaat'atyi.

Ku ja Jesús tmadyakpaajty ja møj a'ux

15 Xjats nidu'ugin ja fariseotøjk wyaañ pøn jam wyinaty tø twinguwaadsidi ja kaabyajt, jøts ja tnimaay ja Jesús:

—Nekim xøñim ja'adi pøn ka'adyip jade'en ku Dios ja kyutujk ttanitanit ja yjaa'y.

16 Ja'ats ja Jesús tnimaay:

—Tu'uk idø'øn jaa'y t'a'ejxiyii'ñ ja a'ux møj'ampy, tøts ja wyinaty ttukmadøy ja mayjaa'y pøn jaty idø'øn ja wyaawampy.

17 Kuts ja a'ux'aats tpaajty, xjats ja tkejxy tyumbi jøts ja t'atstukmadoowa'añ pøn jaty idø'øn ja wyaawampy jøts ja t'atsnøjmit: “Jamsttik, jamik tuki'iyi a'ejxi abaadi y'ejtñi.”

18 Jøts ja tum jade'en ñañikajpxu'udyidi jøts ku ja ka' ñøjxtit, yide'en ja yjawyeembi wyaañ: “Naajx ø tø njuy, ja'ats ø n'ats'ejxwampy, mee mjanch'ukmaa'kxp.”

19 Jøts jadu'uk yide'en wyaamaa: “Ndsakaa ø magoxk yuundi tø njuy, ja'ats ø n'ejxmatswampy pøni yuup idø'øn uk ka'; mjanch'ukmaa'kxp inet idø'øn, ka' øts inet ndsoont.”

20 Jøts jadu'uk wyamøø: “Tyimy-jemy'amajtskipnim øts, patyts øts inet ka' nmajada'akt jøts øts inet ka' nnøjxkt.”

21 Kuts ja tumbi wyimbijty jøts ja ttukmadøøy ja wyindsøn sa jaty ja wyinaty tø yiknøjmi. Jøts ja windsøn yjantyimy'ambijky jøts ja tnimaay ja tyumbi: “Tsojk nøjkx nøø'ajy tuu'ajy wine'en yø kajpjoojt, jøts xwaame'ent ja ayoobi jaa'dyi møøt ja'adi pøn sagasa ejxidip, pøn kyø' tyeky ma'atti, pøn winapti.”

22 Jøts ja tumbi yjatso'ongojmi jøts ku wyimbijty jøts tnimaay ja wyindsøn: “Tø øts windsøn idø'øn jade'en nduñ sa tø mwa'añin, jaakwindampst ja tsinaadyaajk ja poo'kxaajk.”

23 Winets ja windsøn ja tyumbi tnimaay: “Nøjcx tuu' xkuyø'øy ma jaty paduu' ma jaty ti, jøts pøn jaty mbatpy møk'ampyts ja xwaame'ent jøts ya xkuwawit, ujts øts yø ndøjkjoojt n'ejxwa'añ.

24 Tyimñømp øts ixyam, kawindem xøøw øts ja xja'gyajpidi ja n'a'ux pøn jaty øts ja jawyeen tø njadaniway.”

Tuki'iyi nnadyamiyoxant ku Cristo nbadu'unint

25 May jaa'y ja Jesús o madsoo padso'onip jøts ja pyawidityiyi; jøts ja tuk'ojk tniwa'k'awidijty jøts ja tniimaay:

26 —Pøn jaty øts ya xpawidejtíp, pøni jaa pøngapøn, pøn tpa'ayoodip tyeety tyaak, y'u'nk ñidø'øxy, chø' y'uch, myigu'uktøjk, uk kø'øm paat ñabya'ayøyi, ka'ats øts ja mibaat nbabøjkpi'att.

27 Kaja'ajip ø nbabøjkpi'ajtpy pøn ja ayo'on tkamidanaadyip pøn ø xkabaduujnidip ja nja', xjapawidetwandipts øts, ka'ats øts yjade'embí jaa'y nbabøjkpi'aty.

28 Ti ka' meets ja jawyeen xanipaaty, ku pøn pøch køjxp t'ukyikpidø'økwa'añ pøni ti jaty idø'on tsojkíp jøts ja y'abaadit pøni wine'enin ja chøkyi ja gasti, jawyeents ja yiktanipatkixy.

29 Kuts nugo ja pøchkojpk pyidø'økixy jøts ja nika' y'abaadi, janch nigajpxy nimadya'akts ja yjaty ku ja jade'en pøn t'ixy,

30 jøts ja wya'andi: “Tø yø jaa'y y'ukpojtsøñ jøts yø nika' tø t'ukyik'abajtiñi.”

31 Uk kuts o pøn windsøn tsep t'uktunwa'añ møøt jadu'uk ja myiwindsøn midi ja syoldadi ja tyikmemp ni'ee'px mil, çti kidits ja jawyeen ttanibiktaagit pøni sudso dø'on ja ttukwa'ktso'ot pøni ja'ayi tam ja syoldadi tmøøt'aty nimajk mil?

32 Pøni ka'ats ñay'a'ejxiyi, jøts ku jagamnim ja myidsep myiñ, kyaxpts ja tu'uk ja kyugajpxy jøts ja t'amido'ot jøts ka' cheptu'undit.

33 Nayide'ents meets pøni ka'ap jawyeen xpawinmaadyi pøni ti jaty idø'øn m'ixmatstip øts køjxp, ka'ap meets jade'en mibaat nbabøjkpi'att.

Sa kaan amuum tyik'øiygyjxy

34 'Kaan amuum tyik'øiygyjx o ti, nayide'en meets idø'øn ndejint m'ødyunt ku mmigu'uk xukmado'ot ja Dios yja' sudso y'anmija'win kyawindigø'odyit. Kuts ka'ap jade'en mdu'undit, tø wyinaty mbidsømdi ejxim ja kaanin midi kawa'ats midi katump.

35 Nima ja jade'en kyatu'unt ok naajx ok ti tyiktu'unt, ja ti nøø'mimp ok idø'øn ja nda'abu'jta'ant, pø nugoxi ja jadi'iñi ñiyik'ixkø'øy. Ja'gyukidi pøni mja'gyukiwyandip.

15

Kuja Jesús tmadyakpaajty tu'uk ja borreegi midi tigøøpy

1 Nimejnip idø'øn ja Jesús jam ja yikugubajtpitøjkti, ja jaa'dyi pøn amuum tyimyktejtíp pøkyumbi jaa'dyi, jøts ja jam myendi amidodujkpi,

2 patyts ja fariseotøjkti møøt ja kajpxwejpitøjkti tjanchpagajpxti ja Jesús, jøts ja wya'andi:

—Tum ka'øy jaa'y yø kyupijkpy jøts yø jotkujk tmøøtkay tmøøt'uuky.

3 Ja'agøjxpts ja Jesús ttamadyakpaajty tu'uk ja ejxpajtin madya'aky midi yide'en wamp:

4 —Ku meets wyinaty x'ukyiktigøy tu'ugin ja mborreek midi nimagø'pxy, ¿ti kidi meets ja ñimakta'pxy myaktaxujkpi borreek jam xyikta'ant jam pejyotp, jøts ja tyu'ukpi x'ats'ixa'adit kunim meets ja xpaatt?

5 ¿Jòts kidi meets ja xaxonda'akt ku meets ja xpaatt? ¿Ti kidi meets ja xkøxkapt mguejnkyøjxp? ¿Pøn kidi jade'en xyonda'aky ku ja nbaajtin jadigojk midi tø y'uk'atstigøy?

6 Kuts jam mdøjkjotp mja'atti, ti kidi meets ja mmigu'uktøjk, ti kidi meets ja mgudøjk ja xukmadøy, jòts ti kidi meets ja xnøjmi: “Xonda'akti meets, tøts øts ja nborreek nbaaty midi tø y'atstigøy.”

7 Janch øts idø'øñ nwa'añ jòts ku nayide'en yiktaxonda'aky jap tsajpjøtpy ja pojkpitumbi jaa'y ku ja tyiktigach ja chinaa'yin, jòts ja ne'egi yiktaxonda'kp midi tu'uk jòts nigidi ja myakta'pxy myakta'xujkpi jaa'dyi pøn chinaa'yin tø tyiktigatsnidi, ñadyijyi øy ñayjawiyidi.

Ku ja Jesús tmadyakpaajty ja meen midi tigøøpy

8 '¿Uk pøn tø'øxyøjkts myeen tka'uk'ixaapy ku ja tyiktigøy tu'ugin yam ja majk t'ukmøøt'aty? Kuwanits ja tyiktøøbyiky ja yjaj jòts ja pyøknaxy yja'axnaxy jap tyøjkjøtpy, yikxonts ja tyimy'ixaadyøki jòts kunim ja tyimbyaatt.

9 Kuts ja tpaaty, jòts myigujøøñ myigudøjk jòts myigu'uktøjk ja ttukmadøy, yide'en ja tnøjmi: “Tø øts ja nmeen nbaaty midi tø y'atstigøy.”

10 Janch øts idø'øñ nwa'añ jòts ku Dios møøt y'ankilis ttaxonda'aktit ja pojkpitumbi jaa'y pøn tyiktigajtsp ja chinaa'yin.

Ku ja Jesús tmadyakpaajty ja jaa'y y'u'nk pøn tyik'o'jkøjxp ja tyeety myeen

11 Nayide'en ja Jesús wyaañ:

—Tu'uk idø'øñ jaa'y, namajtsk myajnku'nk,

12 jøts ja mutskpi ja ñimaajyøø: “Teety, møøñik øts ja pikta'aky midi øts idø'øn nmaay'atp.” Winets ja u'nkteety ja ojts tyikwa'kxy ja pyikta'aky jøts ja ttagumaay ja y'una'jk.

13 Ñiñamnim idø'øn ja wyinaty jade'en yjaty ku ja myutskmajnk tpøkmujkni t'ejxmujkni ja pyikta'aky tuki'iyi jøts ja ojts ttoo'kni, jøts ja ojts abikyajp abikñaajx tminiijkxy jam jagam, jamts ja ojts tyik'o'jkixy ja myeeñ kyawindiy'ajtingøjxp.

14 Kuts ja wyinaty tuki'iyi tø tyikøjxni, jøts ja yuu jam winet et yjantyimdyøjkixyñ ñ mā dø'øn ja naajx ja kajp jam, jøts ja y'ayodøjkiña.

15 Winets ja t'ixaay tunk mā ja kugajp jaa'y jam, jøts ja ojts kyexyi kyamjøtpy kuch'ejxpi.

16 Janch tsojk jøø'kxxixyim ja t'ejxi ja kuch yji'kxy, kumi niti ja kyayikmø'øy.

17 Jøts jotmay ja tyatøjkixyøø, yide'en ja ojts ñawyinmaa'nxiyi: “Janch ku'uxyi ndeety tyumbi net jam kyaydi yjøø'kxti, yikwindandip paat ja o ti, jøts øts ya yuu njanch'oo'kni!

18 Tiku øts ndeety nga'awimbeti mā ja jam chøøni, jøts øts ja jam nnøjmit: Tø teety Dios nmidundigøy; jøts mets, tø me nayide'en nmidundigøy;

19 ka'u'nk'atyim ø tø njantyimyjaty; yiktunkts ø nayide'en sam o pøn tumbi xyiktuñin.”

20 Jøts idø'øn ja yjanchtuu'døjkixyñ jøts ja wyimbijty jam tyeety wyindum.

Jøts kuts tyeety ja jagamyi y'ejxpajttøø, xjats ja ojts y'am'ijxyi chaach'ijxyi. Jøts ja ñibujtjø'jkøø jøts ja ojts pyatsøyi, jigøxy jibi'kxy ja yja'jty.

21 Winets ja tñimaay ja tyeety: “Teety, tø øts

Dios nm̄idundiḡoy m̄ok'ampy, j̄ots nayide'en me t̄o nm̄idundiḡoy; ka'u'nk'atyim ø nnayjaw̄iyi.”

22 J̄ots ja u'nkteety tn̄imaay ja tyumbit̄ojk: “Tsojk n̄ojkx xjuutti ja øybi wet j̄ots xuktat̄okidit, piktaaj̄kidi kȳojeets, tuktawa'agidi kȳø'øk.

23 N̄ojkx x'atswetsti ja tsakaa midi yaa'kpids̄ompnim j̄ots xyik'ookit. j̄Wan tx̄øduu'ñ̄indi, wan tkaa'yint t'uujkȳindi!

24 T̄o øts ȳo n'u'nk ndijy tyimy'oo'kni, ixyats jujky xwindanaa'ȳindi; t̄o jeky y'atstiḡoy'ity, ixyats jadigojk t̄o nbaaj̄tȳindi.” J̄ots ja xȳødund̄ojkid̄ø.

25 'J̄ots ja mȳøjmajnk jam wyinaty wyidity kamjotp; kuts ja wyimbījty, yja'jty wingon ma ja t̄ojk jam, j̄ots ja t̄mad̄øoy ja iy ja ech.

26 W̄inets ja tu'uk tyaājxiȳi'ñ̄ ja tumbi j̄ots ja t̄tībȳjky ti d̄ø'on jam jade'en tuuj̄n̄ip.

27 J̄ots ja tyukmadooj̄øø, yide'en ja ñ̄imaaj̄ȳøø: “T̄øts ja m'uch yja'aty; t̄øts mdeety ja tsakaa tn̄ankyik'øøgȳiyi midi y'ity yaa'kpety, ja'aḡøjxp ku m̄ok m̄øjaaw t̄o yja'aty ja m'uch.”

28 J̄ots ja mȳøjpi yjantyimy'ambijky, j̄ots ka'ap ja twa'añ̄ j̄ots ja jap tȳokit, tyeetynim ja ojs k̄ø'øm ñ̄ibidsimyi j̄ots ja m̄ok ñ̄imaaj̄ȳøø j̄ots tȳokit t̄ojk̄j̄otpy.

29 Xjats tyeety ja tn̄imaay: “M̄nija'w̄ipxi teety winaāk jum̄øjt me t̄o nm̄iduñ̄, j̄ots juuni me nga'ukm̄imad̄oy, nijade'ents me tu'ugin xkam̄ø'oy øyik chiv̄i'u'nk øyik ti, j̄ots øts nm̄igu'uk jeexȳip nm̄øøtx̄øduñ̄.

30 Aa kudamts ȳo m'u'nk t̄o yja'aty, mdukni'o'jk̄ip tam meets ȳo' mdsakaa w̄inet midi yikxon t̄o yaa'kpety, ku mmeeñ̄ ȳo t̄o myik'o'jk̄xiyi kawine'en m̄øøt kaw̄indiy t̄o'øxȳojk.”

31 Winets ja u'nkteety wyaañ: “Ti sa u'nk mjaty, pø yaayimpts me nmøødi, ti jaty øts ixa nmøøt'ajtpy tum mets yø' mja'.

32 Kuwanits pyaat'aty, ¿ti ja ti nguidy-imdyu'uñin? ¿ti jadam yø nguidyimdyax-ondaajkyim? Patyts ixyam nxødu'uñindi ku yø m'uch tø yja'aty, pø nøø'mimpts adøm jøts ku yø tø y'oo'kni, ixyats jujky xwin'ijxyim, jeky tø y'atstigø'yity, tøts inet nbaajtyim jadigojk.”

16

Kuja Jesús tmaryakpaajty ja ka'ødyumbi'ejx'ejtpi

1 Ñayiñimaay ja Jesús ja pyabøjkpitøjk:

—Ja dø'øn wyinaty tu'uk kumeeñ jaay'ly midi yiktump, jøts jats idø'øn ja' tyumbi tu'uk wyinaty midi t'ejx'ejtp ja myøøtumbi, jøts ja windsøn yiknimaay jøts ku pyikta'aky ja nugo yikwindigø'øxyiyi ja tyumbi.

2 Winets ja windsøn tnajtswa'wiyii'ñ ja tyumbi jøts ja tnimaay: “¿Janch idø'øn ku dø'øn jade'en myiknimadya'aky ti øts jade'en nnimadøøpy? Køyajkøjxni mdunk, ka' me n'ukyiktumbi'ejx'ejtnit.”

3 Jøts ja tumbi'ejx'ejtpi yjanchmaañi yjanchtajni, yide'en ja køøm ñawya'añi: “¿Tits ø ndu'ump, ejx øts yide'en nwindsøn xka'ukyiktunwani? Ka'ats ø n'ukmajadakni øyik øts idø'øn nyu'ut ndu'unt, tsø'ødyumipts øts ku øts inet njayiklimunsimujkmit.”

4 Xjats ja tyabyaajty jøts ja wyaañ: “Tø ø nnijawi sudso ø ndabyaatt, sudso øts pøngapøn xkupøkt tyøjkjøtpy ku øts yø ndunk wyinaty tø yikpøjkni.”

5 Winets ja tu'uk jaty tñajtswa'wiyii'ñ pøn jaty ja wyindsøn wyinaty miyoj'ajtip. Jøts ja yjawyeembi ja tyiktiy: “¿Wine'en øts nwindsonsø xmiyoj'ajti?”

6 Jøts ja y'adsøoy jøts ja wyaañ: “Magø'pxy tãmbi øts aceite ja ndamiyoj'aty.” Winets ja tumbi'ejx'ejtpi wyaañ: “Ixya ja ñinøky; pe'tpy ixa'ak jøts xjaadyigatst, wixijxmyajk tãmbi ja'ayi xpikta'akt.”

7 Jøts yjadu'ukpi ja tñimaay: “Jøts mets, ¿wine'en mets ja xmiyoj'aty?” Jøts ja ñimaajyøø: “Magø'pxy kyunchi ariin.” Xjats ja tñimaay: “Ixya ja ñinøky midi ojts xja'ay; wants tkajtswijchim jøts makta'pxy kyunchi nbiktaajkin.”

8 Jøts idø'øn ja windsøn tjanchnija'wiyii'ñ jøts kudam ja tyumbi'ejx'ejtpi yikxon o ti tñiwimayi ku dø'øn o ti ttuñ. Jade'eñimts yiknijawidi pøn jaty Dios yja' tkababøjkidip, yikxon ja ne'egi tyimiyukyati ja tyaay yam nigidi jade'en wyinmaa'nbyaatti pøn Dios ja'ajtidip.

9 'Kajpxwejin øts idø'øn nyajkpy jøts kidi mbikta'aky nugo x'amnipøjkpatti xtsaañipøjkpatti; pøni jam mbikta'aktyi, yikxon xyiktunkpaattit, øy yø' ka' kya'øyi. Ku yaayi, xabudøkidit o pøn, nugo ku xnijawidi tigøjxp idø'øn ja jade'en xundi. Øy ja yjakixy, wa'atsts meets ja xnijawi jøts ku meets m'anmija'win yikupøkt jap tsajpjøtpy.

10 'Pøn øyjaa'y'ajtp, øyjaa'y'ajtpimpts ja øy ma, wan o ti tmayi tkamayi nayide'ents ja øy yikxon tyiktunkpaaty; pønts kidyim'øyjaa'y'ajtpim, jade'eñimts ja øy ma, nayide'en ja ka'ap tyik'ødyunkpaaty ja pyikta'aky øy ja wine'en myayi kyamayi.

11 Pøni ka'ats yikxon xyiktunkpaatti ja mmeen ja mbikta'aktyi sa pyaat'atyi, çti sudsots meets Dios yja' mjaakmo'ojyit midi ja yakwampy?

12 Pøni ka' meets mmigu'uk yja' xwingudsø'jkiyi, çpønts meets ja mja' jade'en xijy tsø'ogiyip, pøn meets ja xijy mmo'owajnip o meets ja xjakø'ømja'aji?

13 'Ka' pøn tumbi namajtsk wyindsøn tmiduñ; ku ja jade'en ttu'unt, tu'ukts ja pyidsø'ømt pøn ja wyinjawip jøts ja yjadu'ukpi tkawinjawit, tu'uk t'ømyidu'unt jøts jadu'uk tka'ømyidu'unt. Jade'ents ka' y'øyi ku Dios yikmiduñ, icyaptants meen nayide'en myøjtøjkyimi. Paty ka' y'øyi adsow aduuk, tu'ugyi Dios n'ajot'ajtin.

14 Tyimyjade'ents idø'øn ja fariseotøjk yjaa'y'atti, ja meen ja yjanchmøjmigu'uk'ajttip, ixamts idø'øn ja wyinaty jade'en pyatmadowdi jøts ja jam tjanchpagajpxti ja Jesús.

15 Winets ja Jesús wyaañ jøts ja tnimaay:

—Meets idø'øn jade'en mjaa'y'ajttip, ñadyijyi mjanch'uknawya'atspikta'agyidi, ka' meets yjaw i mbøktyuñ, jade'en ja mayjaa'y xwin'øøndi, wa'atsts ja Dios mnijawiyidi sa jaty mwa'andi mgajpxti m'am mjotp; yø' idø'øn Dios kyatsøjkpy, ka' Dios jade'en tkupiky jøts ku jaa'y jade'en kø'øm ñamyøjpikta'agyidi.

Ja Moisés kyutujk jøts ja' midi Dios tyanitanaapy yjaa'y

16 'Ku ja Juan Bautista ya myiiñ, jaayip ja kugajpxtyøjk ja y'aaw y'ayuujk y'adujktøø. Nay jaabaat ja Moisés kyutujk kya'pxy sa Dios ja wyinaty tø myø'øyi. Jøts nay jatyi

cho'onda'aky ja Dios y'øgyajpxy y'øy'ayuujk, yikniġajpxy yiknimadya'aky ja kyutujk midi ja tyaniġanaapy yġaa'y, xjats jade'en kuwaṅi o pøn tjanchjadatøkiwya'añ ja'abi kutujk.

¹⁷ 'Kuwaṅi dø'øṅ jade'en yġatt kyubatt sa Dios kyutujk wyaa'añ, niġuuni ja jade'eñi kyakixy kyanaxy pø ne'egi køjxp najxp naajx tsajp jøts niw'ine'enin kyagudiġøy ja kyutujk.

Ku ja Jesús kyajpxwiyj sa amaġtsk'ajtin ñaxy

¹⁸ 'Ku pøn tmaġtsu'uty ñidø'øxy uk ja tø'øxy tmaġtsu'uty ñiyaa'y, ja'ats idø'øṅ møj pøky; uk kuts pøn yaa'dyøjk tmøøt'amaġtski ja tø'øxy midi tø yikmaġtsu'uty, møj pøkyts ja nayide'en.

Ja kumeeñ ġaa'y jøts ja Lázaro

¹⁹ 'Tu'uk idø'øṅ ja ġaa'y janch kumeeñ, janch xøxy piky idø'øṅ ja', tum ja y'øybi ja yikpejtpy jøts idø'øṅ ja xyumi'xøduñ jabom jabom, piġy xuugy'in tpikta'aky ja xyox.

²⁰ Jamts idø'øṅ ġaa'y ġadu'ukmi pøn txøøw'ajtp Lázaro, janch ayoop janch pøktsoop ja' jøts janch amuum pu'uts ja', ka'ap ja myøġki jøts idø'øṅ ja jam xyumi'ixa'aky jam kumeeñ ġaa'y tyøk'agø'øm, jam ja kyu'uxnay'ity.

²¹ Tsoġk kaagyixyim ja tja'ijxy ja kaaky abu'xk midi jam kumeeñ ġaa'y kyaabyajt patkø'øm najtska'jip; jøts idø'øṅ uk ja jam yjanchni'imiñiyi jøts ja twiweedyi ja pyu'uts.

²² Jøtsnim idø'øṅ ja ayoobi y'ø'jky, winets ja oġts yikniġkxyi tsajpjøtpy ja ankiġistøġk ma ja Abraham ġap. Jøts ja kumeeñ ġaa'y nayide'en y'oo'knima, oġts ja ñaxøki.

23 Kuts idø'øn ja jap ayodaajkjøtpty tja'ejxni jøts kudam ja Abraham jam jagam møøt ja Lázaro.

24 Winets ja møk'ampy wyaañ: “Teety Abraham, ayo'ejxk øts, kax yø Lázaro, wan tmiñ, wan yø kyø' tyikxøøky jøts øts yø ndoojts xuktaxujxit; janch møk øts yap jønjøtpty n'ayøy.”

25 Jøts ja Abraham ja ñimaajyøø: “Ja' u'nk mja'myatsp, tøxi me xaxøñ ku me tø m'atsøøni m'atstani, ka' mets jade'en mjaty sa yø Lázaro tø y'ats'ayøyin, wants yø taxoni jøts me m'uk'ayoomit.

26 Jøts ti tits nnidyu'unim, abikyxi meets jami, abikyts øøts yam; ma pøn y'uknaxt øy yam pøn yjamenwa'añ nidu'ugin, uk øyts jam pøn yjanøjkxwami, nisudso'ampyts pøn kyamajada'aky.”

27 Winets ja kumeeñ jaa'y wyaañ: “Tixi teety Abraham, pøni jade'en tunts may'ajt jøts yø Lázaro xkaxt jam ndeety tyøjkwindum,

28 jaak jam øts nmigu'uk ja nimagoxk, jøts t'atstukmado'ot jøts kidi ya nayide'en myendi ay-oobi ya ayodaajkjøøjty.”

29 Jøts ja Abraham wyaañ, yide'en ja tnimaay: “Jøts timts ja wya'ant midi ja Moisés yjaa'y midi ja Dios kyugajpxtyøjk tø tnigajpxti. ¡Ti wan ja jam tnijawidi pøni myøjpiktaktip!”

30 Jøts ja kumeeñ jaa'y y'adsøøy: “Janch ja jade'en teety Abraham ja', yjayiktigatstibik chinaa'yin ja y'ijtyi ku ja pøn jam juky ñinøjksidit pøn tø y'oo'knidi.”

31 Jøts ja Abraham ñiimy: “Tixi pøni ka' ja tkupøjkti midi ja Moisés yjaay jøts sa

jaty ja Dios kyugajpxy wyandøø, ¿ti ja'ats ja yjaakjanchjawidip øy oo'kpi ja jujky yjaninijkxyidi?"

17

Ja' midi yikpøkpyajtp

¹ Yide'en ja Jesús tnimaay ja pyabøjkpítøjk:

—Juuni øy ti kya'ukyikpøktyuñ, kø'øm tsøkyts ja'. Pønts myigu'uk tyikwinmaa'nmya'atp jøts ja tyikpøktyuñ, ipø tinim sanim ja yjanchjatt y'anmija'win!

² Ne'egi tyimyjapaat'ajtip jøts ja mejyjotp yikniwibejpatt ku møj paandaak ja y'ukyiktayukxotsit, jøts øts n'u'nk n'unajk ja kidi mibaat xyikpøktyuujni.

³ Øyimts mnay'ejx'etidit jøts kidi nayide'en m'adø'øtsti sam o pøn y'adi'ichin.

'Pøni m'ejxtip ku ja mmigu'uk mmidundigøyidi, tukmadowdits jøts kidi jade'en y'adø'øtsti, uk pøni nagyumaajyidipts, maa'kxuktits ja'.

⁴ Øy ja wixujk ojkin tjayiknipati, øy ja jade'en mjamidundigøyidi, pøni nadyagumaajyidipts ja nayide'en wixujk ojk pøni mnimaajyidip ja': "Ka' øts jade'en n'uktunit", maa'kxpts meets ja'.

Ja møj janchja'win

⁵ Xjats ja nwindson'ajtim ja kyudanaabyitøjk ñimaajyøø:

—Møøky øøts janchja'win møj.

⁶ Winets ja tnimaay:

—Kuk meets jeexyip wine'enin xmøøt'aty ja janchja'win sam tu'uk mortas pajkin, tøts meets ya'at kipy jeexyip xnimaañidi: "Pidø'øk ya jøts

mejjjotp mnøjkxt, jamts myo'ont", nay jatyi'ts meets ja jeexy'ip tø mmimadøyi.

Ja tumbi tyunkjøjp

⁷ 'Ku pøn ja tumbi t'ukyiktuñ kyamjotp, tyikyu'uy tyiktuñ uk tyiktsakaa'ixy ja jam, kuts ja wyimbity jam wyindsøn tyøjkjotp, ku ja jam yja'aty, ζti jatyi ja jam tyimyiknøjmi: "Ya tyimñax jøts mga'aty"?

⁸ Pø ka'axi ja jade'en yiknøjmi, pø yiknimaapyxi ja jam: "Yik'øyik øts n'a'ux jøts ø xwindsø'øgit, wan øts jawyeen tkay t'uuky jøtsnim me mga'aty m'uukt."

⁹ Kuts ja tumbi ja jade'en tø tja'uktumi pøni sa dø'øn ja tø yik'ane'emy, ζja ti winets ja yiktaka-jxa'aky? Pø ka'axi.

¹⁰ Nayide'ents meets idø'øn Dios xmidu'unt, ku ti xun'abaadidit pøni ti ja mduktuujnidip jøts meets ja xnøjmit: "Ti tumbi øøts idø'øn, ja'ayi øøts iiy tø nduñ, midi paat'ajt'ip øø ndu'ump."

Ku ja Jesús tyiktsøøjky nimajk ja jaa'y pøn jadi'iñi putsnidip

¹¹ Kuts idø'øn ja Jesús tyuu'døjkigyojmi jøts ja ñijkxy jam Jerusalén, najx idø'øn ja Samariit etjotp jøts nayide'en jam Galilea.

¹² Jøts kuts ja yja'jty jam ma tpaajty tu'uk ja kajp, jamts ja pyajtøø nimajk ja jaa'dyi pøn pu'uts pa'am wyinaty pøjkidip, jøts ja jagamyi wya'k'øydøø,

¹³ jamts ja møk'ampy ñimaajyøø:

—jWindsøn Jesús, ayo'ejxk øøts, ejx øøts yide'en njaty!

¹⁴ Kuts ja t'ejxpaajty jøts ja tnimaay:

—Nøjkx x'ats'ejxti ja teetyøjkti.

Xjats ja jatyi ñøjkxtøø, jamnim ja wyinaty ñaxti ku ja tsø'øky ñayja'winiyidi.

¹⁵ Winets nayjatyi tu'uk t'ejxpaajty ja pyu'uts jøts kudam ja tø tyaagyøjxni, jøts ja jatyi wyimbijty, møk ja Dios ja ttukmøja'wiyii'ñ ttukunuu'kxyja'wiyii'ñ, ñiyaxni niyjojkni ja wyimbijty.

¹⁶ Jøts ja twinguxanay'øiyii'ñ ja Jesús jøts ja jamyi ñamyujtstaajkøø, ttukmøja'wiyii'ñ ttukunuu'kxyja'wiyii'ñ ku ja wyinaty jade'en tø yiktsø'øgyi. Samariit jaa'y idø'on jade'en tump.

¹⁷ Xjats ja Jesús wyaañ:

—¿Ti kidimts meets nimajk tø mdsokixy? ¿Ma net ja yjanidaxujkpidi?

¹⁸ Jabyøø'kxyik øts ya ne'egi xnimemp nadyu'uk, yø'øjik øts ya ne'egi x'atskajxajkp.

¹⁹ Jøts ja tnimaay ja jaa'y:

—Wa'kuki jøts mnøjkxni; ja'agøjxp tø tyay yø mbu'uts ku ø tø xjanchjawi.

Sa ja Dios ja kyutujk tyikme'ent midi ja tyanitanaapy ja yjaa'y

²⁰ Xjats idi'ingøjmyi, ja fariseotøjk tyiktøødøø ja Jesús juunin idø'on ja yja'att ja Dios kyutujk midi ja tyanitanaapy ja yjaa'y, jøts ja t'adsøøy:

—Ka'ap ja ti ejxin pøni sa Dios ja kyutujk tyikja'aty.

²¹ Kidi xjøp'ijxy'atti jøts pøn wya'ant: “Ixya ja”, uk ñø'ømdit “Ixem ja”; ka'ats, pø jaanixi meets ja ya xjamøøt'ajtni.

²² Jøts ja tnimaay ja pyabøjkpitøjk:

—Ja'atp ja xøøw ja jumøjt ku mee tsojk ejxpaa_{dyim} xja'ejxwa'ant ja naxwii'ñit jaa'y ja myøjkudanaabyi, ka'ats meets ja jatyi x'ext.

²³ Mjadyimyjayiknøjmidi meets: “Ixya ja”, uk møknojmidi meets “Ixem ja”. Kidits xmibøkti.

²⁴ Ku ø nme'ent, wa'ats x'ejxtit xnijawidit jade'en sam ja et wyidsukyin xem yam tyikjajta'aky, jats idø'øn wyinaty tmibaat'aty.

²⁵ Jawyeents ø n'uk'ayo'ot øy øy, ka' øts ja jaa'y xkupøktit pøn jaty ja ixyam juky'ajttip.

²⁶ Nayide'en ø njatt sam ja Noé yjajtyin ku ja ya y'atsinaay, nayide'en øy pøngapøn y'adø'øtst.

²⁷ Kya'adyit y'uuktit sam ja y'adøtstøø, y'amajtskidi ja jotkujk, ja y'u'nk ja ñøøx ja tyik'amajtskidi tyimyjaakja'abi xøøw ku ja Noé tyøjkiyii'ñ jam barkijotp, kuts ja møk tuu myiiñ xjats ja ojts ñ'i'ijtyi y'oo'køxti.

²⁸ Nayide'ents yjajty ku y'atsja'ajty ja Lot: jotkujk kyaydi y'uukti, yjuydi kyajpxti, yakti tyookti, ñe'epti kyojti, ña'adi pyotsti, ja tyøjk tyik'øyidi jotkujk;

²⁹ kuts ja Lot jam Sodoma kajpjotp ja'ayi pyidsiimy, jøts ja jøønduu jatyi myiiñ jøkmyøøt, jøts ja niduki'iyi tyiknax'o'jkijxy ja jaa'y.

³⁰ Nayide'ents idø'øn winet et yjatt ku ø x'ejxpaa_{ttit} jotmøñ.

³¹ Pøni jam wyinaty øy pøn jam tøjkøjxp tø pyety, ka'ats ja t'uk'atsnidøjkinit pøni ti jaty ja jap tyøjkjøtpy myøøt'ajtpy jøts ja tøkpidømwa'ant; pøni pønts jam wyinaty widejtp kamjotp, ne'egi tøøpts ku ja ne'egi kya'ukwimbejtnit tyøjkwindum.

³² Ja'myajtsidi ja Lot ñidø'øxy sa ja yjajty.

33 Pøn kagu'øøgyim pyikta'aky t'ejxp, windigø'øpyts y'anmija'win ja' Dios wyingujpk; pønts tkayikmøjtøjkip øy ti, pøn ø ne'egi tu'ugyi xnadyamiyojxip, ja'ats idø'øn y'anmija'win nøjkx nitso'ok'ajtp.

34'Øts idø'øn wamp jøts ku jam wyinaty o pøn namajtsk ttamaamukti tu'ugyi ja maabajt, tu'ukts ja ja'ayi yikpøkjø'økt jøts ja yjadu'ukpi wyindigø'øty.

35 Pøni jam tø'øxyøjk wyinaty namajtsk yjøjtsmukti, tu'ukts ja nayide'en yikpøkjø'økt ja y'anmija'win jøts ja yjadu'ukpi nayide'en wyindigø'øty.

36 Nayide'en ja yaa'dyøjkmidi, pøni jam ja nama-jtsk wyinaty jam kamjotp, tu'ukts ja yikpøkjø'økt jøts ja yjadu'ukpi ka'.

37 Kuts idø'øn ja jade'en tmadoodøø jøts ja ojts tyiktøwdi:

—¿Ma windsøn'ajtim idø'øn ja jade'en yjatt?

Jøts ja y'adsøøy:

—Kidi mwa'andi ku ja kyayiknijawit, jabi niduki'iyi meets ja xnijawit ku ø nme'ent.

18

Ku ja Jesús tmadyakpaajty ja ku'økyø'øxy jøts ja kudunk tiiidyumbi

1 Xjats Jesús ja ttamadyakpaajty tu'uk ja ejxpajtín madya'aky. Ja' idø'øn ja tyukmadogukiwyampy jøts ja Dios'ajot'ajit'ettit jøts nijuuni kya'amutsk'attit.

2 Jøts idø'øn ja tnimaay:

—Jam idø'øn kudunk tiidyumbi wyinaty tu'uk jam kajpjotp, niwine'enints idø'øn Dios ja tkidyimwyindsø'øgi, nipøn ja tkamøj'ijxy øy yjapøni.

³ Nayjamts idø'øn ku'økyø'øxy tu'uk chinaamyi, ja'ats ja kudunk tiidyumbi jam tmiyø'øy'ejtp, ejtp ja yja'øø'ngunaxy, jøts idø'øn ja tja'amidøy ja tiidyu'unin, ja myidsep tjani'øøni jøts ja yikpayø'øty.

⁴ Jeky idø'øn kudunk tiidyumbi ja tkamøjpikta'aky jøts ja ka'ap tpayø'øy, xjanimts ja wyinmaay: “Øy øts idø'øn Dios ngawindsø'øgi, øy øts idø'øn nipøn ngatunk'aty,

⁵ kuwanits øts idø'øn jade'en ndu'unt, pø ejtpts øts yø xjanchmiyø'øy'ity, janch møk ø xyikjotkixy, tikuts øts yø nganitanit jøts jade'en kya'ukmenit jøts øts yø xka'ukyikjotma'tnit.”

⁶ Jøts ja nwindson'ajtim yide'en yjaakwaañ:

—Ja ka'øy kudunk tiidyumbi dø'øn jade'en wamp.

⁷ Kuts idø'øn Dios, ¿ti jaa ja tkidyimñitanit ja yja' pøn ja xinaxy tsunaxy ja'myajts'ejttip? ¿Ti kidi ja jatyi tpudøjkiñit?

⁸ Øts idø'øn wamp jøts ku ja jatyi tnitanit ku ja jatyi tnikajpxu'utt. Kuts ø nme'ent, ¿windem øts naxwii'ñit jaa'y n'ukpaaty tum jade'en tu'ugyi ja yjanchja'win?

Ku ja Jesús tmadyakpaajty ja fariseotøj jøts ja yikugubajtpi

⁹ Jøts ja Jesús ttanimadyaktøjkiyiññ jadu'uk ja madya'aky, jøts ja ttukmadøy pøn namyikaxi jaa'y'ajttip, kø'ømyi ñay'ødyiyidi ñay'øbyikta'agyidi

jøts ja myigu'uk ja kawin'ijxyim tjawidi. Ja'ats idø'øn ja ñimaay:

¹⁰ —Namajtsk idø'øn ja jaa'y ñøjxxtøø Dios ajot'ajtpi jam tsaptøjkjotp: tu'uk fariseo, jøts ja yjadu'ukpi yikugubajtpi jaa'y.

¹¹ Tanaapy ja fariseo jøts ja yide'en tmigajpxy: “Dios Teety, ndukmøja'wip ndukunuu'kxyja'wip mets ku ø ka' nayide'en nduñ sam o pøn myaatsti kyawindiyjaa'y'atti, sam øy pøn axøøk pyøkyundi; ni ngajade'eni paat øts sam yø yikugubajtpi ixa tyani.

¹² Majtsk ojk me n'amaay'aty tuksamaan, ngagugayi ngagu'uugi mets, jøts ndamiyøjpxy mets nbikta'aky wan jaty ti jaty ø nbatpy n'ijxpy.”

¹³ Jøts idø'øn ja yikugubajtpi jagam ja ne'egi wya'k'øyiñ, ka'ap ja jadine'en y'aaaw yjoojt myajada'aky jøts ja wine'enin y'ejxjø'økt jøts ja wine'enin chajp'ext, jøts ja ne'egi ñagyachkoxi, yide'en ja wya'añ: “iDios Teety, ayo'ejxk øts, janch pojkipitumbijaa'y øts!”

¹⁴ Xjats ja Jesús yide'en wyaañ: “Øts nømp jøts ku ja yikugubajtpi ojts ne'egi yikmee'kxy, jøts ja ojts wyimbejtni ñøjxni tyøjkwindum, tø ja yiktamee'kxy ja pyøky. Jøts ja fariseo nigidi yikmee'kxy pøn namyikaxi jaa'y'ajtip, pøn kø'ømyi nay'ødyejidip nawya'atspiktaajkidip, ka'ats ja mibaat tminaxti ja wyinmaa'ñ jam Dios wyindum. Pønts tpøkja'widip ja pyøky, pøn yik'ayowim tminuu'kxaktip ja Dios, ja'ats idø'øn ne'egi møjtøjkidip jam Dios wyingujkp.”

Ku ja Jesús ojts tkunuu'kxy ja mutsk una'jk

15 Nayi yiktanimemp idø'øn ja Jesús ja mutsk unajk jøts ja tkønixajt; jøts kuts ja pabøjkpitøjk jade'en t'ejxtøø, winets ja ojts møk twingugajpxidi pøn jaty ja mutsk unajk tyikmendip.

16 Winets ja Jesús ja mutsk unajk tyaaajxmiiñ, jøts ja pyabøjkpitøjk ojts tnøjmi:

—Wan yø mutsk unajk tmendi, kidi meets yø xkaduknimiñ; ja yjade'embì jaa'y idø'øn Dios kyutujk nitanaajyidip.

17 Janch meets idø'øn nnøjmi, pøn tkagupøjkp ja Dios kyutujk midi ja tyanitanaapy yjaa'y sam ja mutsk unajk ja tkupikyin, niwindemts ja tkapaaty tka'ixy ja Dios ñitso'ok'ajtin pøni ka'ap ja tkupøkti.

Ja kumeeñ jaa'y

18 Jøts idø'øn ja Jesús tu'uk ja kumeeñ jaa'y ñimaajyøø:

—Mets øyjaa'y yik'ixpøjkpi, ¿ti ø ndu'ump jøts øts ja n'anmija'win tpaatt ja nitso'ok'ajtin xemikøjxp?

19 Jøts ja Jesús wyaañ yide'en:

—¿Ti jade'en myikwajnip jøts ku øts øy? Ka'ap ma pøn tu'ugin y'øyi sam Dios.

20 Mnija'wipts ja Dios kyutujk sa ja wya'añ: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwin'iiñ; windsø'øgi mdeety mdaak.”

21 Jøts ja jaa'y wyaañ:

—Jaayim øts yø jade'en nbaduñ ku nmutsk'aty.

22 Kuts ja Jesús ja jade'en tmadøøy, xjats ja tnimaay:

—Jap jadu'uk midi mgabadumpñim: too'køx ti jaty jam mmøøt'ajtpy jøts ayoobi jaa'y ja xabudøkit, jøts ja jap tsajpjøtpy nøjkx

mwingaxø'jkxi ja juky'ajtin; winets mdsont jøts øts xmøødit.

²³ Kuts ja jade'en tmadøoy jøts ja jaty yjanchjot-madyøjkiyiñ kumi janch kumeeñ idø'øn ja', ka'ap ja tmajtstu'utwa'añ ja pyikta'aky.

²⁴ Kuts ja Jesús t'ijxy jøts ku ja jaa'y jade'en yjotmay'øøky, jøts ja wyaañ:

—iWindemnim ja kumeeñ jaa'y jade'en tpaajtniyidi ja Dios kyutujk midi ja tyanitanaapy yjaa'y!

²⁵ Ne'egi tsojk ñaxt tu'uk møj jiyujk jap xuu'ñ jutjøtpy, jøts nigidi tu'uk kumeeñ jaa'y tyøkit jade'en ma Dios kyutujk tnitani tuki'iyi.

²⁶ Pøn jaty ja jade'en tmadoodip, ja'ats wandøø:

—¿Pømbits idø'øn nitso'ok'atp?

²⁷ Winet Jesús ja ñimaajyidøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsepjawi.

²⁸ Jøts ja Pedro wyaañ:

—Windsøn'ajtim, tøts øøts nbikta'aky tuki'iyi nmajstutkixy ti jaty øøts y'ijty nmøøt'ajtpy, ixyaats øøts jade'en nwidity møøt mets.

²⁹ Jøts ja t'adsøoy:

—Janch øts idø'øn nwa'añ, pøn yjøøn tyøjk tk-aba'ayoop, pøn tyeety tyaak, y'uch myigu'uk, y'u'nk ñidø'øxy tkajotmay'ajtp, ja'agøjxp ku ja ne'egi tyikmøjji ja Dios kyutujk midi yjaa'y ja tyanitanaapy;

³⁰ pøni wine'enin ja ya naxwiiñ yjaaktsøøni, pyaajtips Dios kyunuu'kxin ja' jøts nitso'ok'atp y'anmija'win ja xemikøjxp ku ja Dios jadu'ukpi tsinaa'yin ja myo'ojiyit.

Ku ja Jesús jadigojk tñigajpxy jøts ku ja y'ookt

31 Xjats ja Jesús abiky tyaajxiyiiñ ja nimakmajtskpi pabøjkipitøj, jøts ja tñimaay:

—Yamnimts inet jam Jerusalén nnøjxindit, ma jade'en yjatt sa jaty ja kugajpxtyøj tjaadyandøø jøts ja tñigajpxti ti ø ndu'ump, ti nbaatp.

32 Yikmatsp øts jøts ø nyikøyakt nyiktagødøkit pøn ø ngamigugajp, nyiknixe'ekt nyiktaxe'ekt øts, nyikwidsujt nyikjøptsujt, kawine'en nyikjemnøjmit nyiktenøjmit.

33 Ku øts jawyeen n'ukyikwinwopt n'ukyikjøpwopt, jøtsnim øts ja xyik'ooktit; pidsø'ømpst øts jap oo'kpi jutjøtpy kidigøøk xøøw.

34 Jøts ja ka'ap tja'gyukidi nisudso'ampy, pø ti ja jade'en yiktamimadyaktip, nisudso'ampy ja tkaja'gyukidi.

Ku ja Jesús tyikwin'ejxwa'kxy ja winap jaay

35 Kuts ja Jesús jam wyinaty Jericó yja'atwani, jøts jam tuu'pa'am tu'uk chøøni ja winap jaay, jam ja yiklimunsimuky.

36 Kuts ja tmadøøy jøts ku ja mayjaay jam yjanchnaxti, jøts ja ojts tyiktty ti døøøn tuujnip jajtip.

37 Jøts ja yiktukmadøøy jøts ku ja Jesús jam wyinaty ñaxy pøn jam Nazaret tsoo'mp.

38 Winets ja møk'ampy wyaañ:

—Jesús, mets m'aats'ajtpy mgugoj'ajtpy ja David, ayo'ejxk øts!

39 Pønts jam wyinaty jawyeen yøødyip, ja'ats ja møk'ampy nimaajyøø jøts y'amo'ont, jøts yjaaktyimyikjinajpxy ja', ka'ap ja y'amøñ, jinaxy ja wyan'adi'ich:

— ¡Jesús, ayo'ejxk øts!

⁴⁰ Winets ja Jesús wya'k'øyiñ jøts ja wyaañ jøts y'atsyikwa'at ja winap jaa'y. Kuts ja wyingume'eniyoø wíngon, xjats ja tyiktiiy jøts ja tnimaay:

⁴¹ — ¿Ti dø'øn mdsøjkpy, ti øts idø'øn xuktunwamp?

Jøts ja winap jaa'y y'adsøoy:

— Windsøn'ajtim, win'ejxwamp øts.

⁴² Jøts ja Jesús ja ñimaajyoø:

— ¡Win'ejxts inet! Ja'agøjxp yo mween tø y'øyi ku ø tø xjanchjawi.

⁴³ Jøts idø'øn ja winap jaa'y jade'en wyin'ejxpijky, jøts ja tpadsø'jñ ja Jesús, møk ja ttukmøjawi ttukunuu'kxyjawi ja Dios. Jøts ja nayide'en wyamidì pøn jaty jam ja jade'en t'ejxtoø.

19

Ja Jesús jøts ja Zaqueo

¹ Xjats ja Jesús yja'jty jam Jericó, kyajptøjkiyiñ,

² jamts kumeeñ jaa'y wyinaty tu'uk, Zaqueo ja xyøøw midi ja yikugubajtpitøjk wyindsøn'ajtip.

³ Ja'ats idø'øn tyimyjawin'ejxwamp ja Jesús jøts ja t'ejxkapt. Janch mayjaa'yts jam wyinatyi nisudso'ampy ja tka'ext, jaa ku ja kon yjaaktyimtyanaañimi.

⁴ Xjats ja ojts jawyeen putyi t'anøjkxi ma dø'øn ja Jesús jam wyinaty ñaxwa'añ, jøts ja jam kipkyøjxp kyøjxpejty.

⁵ Kuts ja Jesús jam ñajxy, ixam ja Zaqueo kipkyøjxp, jøts ja Jesús pyat'ejxøø, yide'en ja ñimaajyoø:

—Zaqueo, putyi winak, jap øts ixyam mets mdøjkjøtpy njā'da'akwa'añ.

⁶ Jøts ja Zaqueo jatyi wyinaajky, janch ejtni xoni dø'ø'n ja tyikja'jty ja Jesús jam tyøjkjotp.

⁷ Pø'n jatyts ja jade'en t'ejxtøø, jøts ja pyagajpxpinaxwa'ktøø, ja' ja kyajpxtip jøts kuk ja Jesús jam wyinaty tø ñijkxy mā ja ka'øyjaa'y tyøjk jam.

⁸ Jøts ja Zaqueo wya'kukiyi'ñ jøts ja nwindsøn'ajtim yiknimaay:

—Windsøn'ajtim, ndamay'atp øts ayoobi jaa'y kujkwa'kxy ti jaty øts ixja nmøøt'ajtpy; pøni tøts øts o pøngapø'n o tigati nbøjkxi awin'øøni'ampy, nyik'u'nkipts øts ja' jøts øts ja jawaani may nyikwimbejtxit, maktaxk ojk tukjadine'en jaty y'u'nk'att pøni sã ja kyojpk.

⁹ Xjats ja Jesús wyaañ jøts ja tnimaay:

—Ixyam ja nitso'ok'ajtin tø yja'aty ya tøjkjøøjty, kumi nay Abraham meets m'aadsip mgugojip.

¹⁰ Pø ja'abixi ø tø nnimendi jøts øts ja ndukpaattit nduk'ejxtit ja nitso'ok'ajtin pø'n ja y'anmija'win y'ijty tigøy'ejtnidip.

Ku ja Jesús tmadyakpaajty ja meeñ kyojpk

¹¹ Ixam ja mayjaa'y ja pyatmadøyi'i ku ja jade'en wya'añ, jøts ja ttanimadyaktøjkijyi'ñ tu'uk ja ejxpajtin madya'aky, ku ja jam wyinaty kujk wyingoni jam Jerusalén. Nømpxi dø'ø'n ja jaa'y wyinmaydi, ja'ayi ja jam y'ukja'att jøts ja jatyi wyindsøndøkit, jøts Dios kyutujk ja tyiktuujnit midi ja tyanitanaapy yjaa'y.

¹² Jøts idø'ø'n ja tnimaay:

—Jaa dø'øn jaa'y y'ijty tu'uk, jotkujk jaa'y. Ja'ats ojts abikyajp t'anøjkxi jøts ja jam y'atswindsøndøkit. Ku ja wyimbett, møjwindsøn ja wyinatyni.

13 Jøts idø'øn tyumbi ja nimajk twaadsøoy ku ja wyinaty choonwa'añ, jøts ja nidu'uk jaty ttagødøjkii'ñ tu'uk møj mukmyeeñ, jøts ja tnimaay: “Mda'aju'udyip mda'agajpxtip idø'øn yø mmeeñ, wan tmayi kunim ø nwimbett.”

14 Mi'ajkiyipts idø'øn ja jaa'y ja' pøn jaty jam tsinaadyip, jøts ku ja chø'jñ jøts kexy yø'øbyi ja yik-tabaguejxy jøts ja jam yide'en y'atswa'andit: “Ka' øts ya'at jaa'y ndsøky jøts øøts yø nwindsøn'att.”

15 Jøts yikpiktaajkim idø'øn ja' jøts ja wyindsøn'att, winets ja wyimbijty jam ma ñaajx kyajp. Ku ja jam yja'jty jøts ja twaadsøoy ja tyumbi pøn jaty ja wyinaty tø tkømø'øoy ja meeñ, ja' ja ñijawiwypy wine'en jaty ja wyinaty tø tyik'u'ngidi.

16 Jøts ja yjawyeembi myiiñ jøts ja tyukmadoo-jøø: “Windsøn, majk ojk øts ja jadukjadine'en jaty tø nyik'u'nk'aty ja mmeeñ.”

17 Xjats ja wyindsøn y'adsøoy: “Øy'ajtp, øyxi dø'øn jade'en mduñ, mjotwampxi dø'øn jade'en; ti sa metsxi yjadini'iñibi meeñ jade'en tø xyik-mayi, ja'agøjxpts mets ndukwindsøn'atwa'añ majk ja kajp.”

18 Jøts jadu'uk myiiñ, ja'ats waan: “Windsøn, magoxk ojk øts jadukjadine'en jaty tø nyik'u'nk'aty ja mmeeñ.”

19 Jøts ja nayide'en yik'adsoomøø: “Windsøn'atp mets ja magoxkpi kajp.”

20 Winets jam jadu'uk myiiñ jøts ja wyaañ:

“Windsøn, ixyaani ja mmeeñ. Konji'iky øts yø nbaayjøtpy tø nyik'ity;

²¹ kumi nnija'wip øts jøts ku mets ka' ti jadi'iñi xnajtsjawi, ja'agøjxpts øts ndsø'øgi, ja'abaat me xpayø'øy øy mets ja xjagaja'aji, myikpidø'økwambyaat mets ja pikta'aky øy me njagani'ipy.”

²² Winets windsøn ja ñimaajyøø: “Mets ka'ømyidumbi, kø'øm yø m'aaw mnadyani'øøniyi, yø' me kø'øm mdiidyujnip. Pøni mnija'wip tam ku øts jade'en njaa'y'aty ku øts ja nbøkmuky midi ø ngabiktakpy, ku øts ja xijy nyikpidi'ikpyaat midi njaganipy,

²³ jøts, ¿ti kuts øts ja nmeeñ tø xka'anuu'kxyaky, jøts øts ja meengyojpk jeexyip tø nbaaty møøt ja meeñu'nk?”

²⁴ Jøts ja tnimaay pøn jaty jam wyinatyi: “Pøjkxidi yø meeñ, jøts ja xmo'odit pøn øts ja nmeengyojpk majk ojk tø xyik'u'nk'ajtiyi.”

²⁵ Jøts ja wyandøø: “Pø jamimts windsøn ja' myeeñ, pø majkts meeñ muky ja jam tmøødi.”

²⁶ Jøts ja windsøn y'adsøø: “Øtsts idø'øn wamp, jøts ku ja yjaaktyimyikpudøkit pøn tyikmøjtakp ku ja o ti yiin waan yikmø'øy; pønts kø'øm o ti tkidy-imyikmøjtakp ku ja o ti yiin waan yjayikmø'øy, jaaktyimyikpøjkøjxipts ja ne'egi tuki'iyi.

²⁷ Jøts ja' pøn ø xmi'ajkidip pøn ø xkatso-jktip jøts ø nwindson'att, nøjkxts ja x'atswawdi jøts ya xyikme'endit jøts ya xtyimyikpa'ooktit øts nwingujky.”

Ku ja Jesús kyajptøjkiy'ñ jam Jerusalén

28 Kuts ja Jesús jade'en myadyak'abajtiyiñ, jøts ja ñajxy, jamxi ja Jerusalén ñijkxy.

29 Jawaani ja jam wyinaty kyidyimyja'atti jam Betfagé jøts jam Betania, jade'en ja kajpxøw jam, ku ja tkejxy namajtsk pyabøjkpi ku ja jam wyinaty wingondi ma ja kojpkuk'nk jam txøwi Olivos,

30 jamts ja tniṁaay:

—Nøjkxti ixem kajpjotp, ixew wingon. Kuts inet jam mja'attit, jam inet buur tu'uk kuwiñ xpaattit midi ka'anim pøn ttatsøøni. Ja'ats m'atsmigajidip jøts xyikme'endit.

31 Pøni pønts myiktøjidip tigøjxp ku xmigajidi, nøjmidits jøts ku ø ndsøky.

32 Jøts idøøn ja pyabøjkpi namajtsk ñøjkxtøø tpattøø jade'en sa Jesús ja wyinaty tø ñi'mxyidi.

33 Jam ja wyinaty tyimyigajidi ja kujiyujk ku ja jiyujk ja ñiṁaajyidøø jøts ja yiktøjidøø:

—¿Tigøjxp ku yø jiyujk xmigajidi?

34 Jøts ja t'adsoodøø:

—Kumi ja nwindson'ajtim yø ttsojpk.

35 Jøts ja twejtsnøjkxtøø ma ja Jesús jam wyinaty y'awijxy, jamts wyet ja ttajiba'andøø jøts Jesús ja ttawa'atspejty.

36 Kuts idøøn ja Jesús wyingon'adøtsni, xjats wet ja nøø' tuu' yiktabatya'abi.

37 Ku ja wyinaty wyingoni ja kajp, ku ja jam kyida'aky Olivos kojpkwemp, winets pyabøjkpitøjk ja ejtni xoni yjanchpaya'axyi yjanchpajøkyi, jøts ja møk'ampy ttukmøjajawidi ttukunuu'kxyjawidi ja Dios ku milagrí'ajtin ja wyinaty jade'en tø tyuk'ijxyidi.

38 Yide'en ja wya'andi:

—iØy'ajtp ku Dios xuknimi'iñim kyunuu'kxy wyindsøn! jJotkujk'atyim idø'øn jap tsajpjøtpy! iKuyi Dios jadu'uk yjaak'øyi!

³⁹ Winets ja fariseotøjk winaagin tnimaadyøø ja Jesús pøn jam wyinaty jaa'y agujkpti:

—Windsøn, tiku waani sa xkanøjmi yø mbabøjkpitøjk.

⁴⁰ Jøts ja y'adsojøø ja Jesús:

—Øts idø'øn wamp jøts ku øts inet yø njayik'amo'ondit, wenkpits inet kajpxkojmidip møk'ampy, nijuuni yø kya'amondi øy yø pøn yjayik'amonwa'añidi.

⁴¹ Kuts ja t'ejxpaajty ja Jerusaléngit kajp ku ja jam wyinaty jawaani kyaja'añni, jøts Jesús ja tkudsaachwinma'ayiyi'iñ jøts ja yaajxy,

⁴² yide'en ja wyaañ:

—iKuk jeexyip iiy wine'enin xja'gyuki jøts ku ja mxøøw ja mjumøjt tø mjataja'adyi, jøts jeexyip ni'ijtyi ja mjaa'y tpaatti ja Dios kyunuu'kxyin! Tøts ja tiempi ñaxy, iti jaa ja xijy, jatyi myiktami'awa'anigyojmit!

⁴³ Ja'atp ja xøøw ja jumøjt ku tiempi kya'øyt, ku mmidsep mdamukit, amuum myikna'awidejtkøxt, nima awa'ats mgata'ant, ja xem ja yam myiknidøkit,

⁴⁴ naxjøtpy myikjaagida'akt jøts ja mjaa'y may'ampy kyudigø'ødyit. Niwine'en niti kyata'ant; ja'agøjxp ku tø xkagupiky ja Dios ku ja kø'øm tø mjanimiñi.

Ku ja Jesús twojpidsoinguixy ja too'kpitøjk jam tsaptøjk agø'øm

⁴⁵ Xjats ja Jesús chaptøjktøjkijyihñ jøts ya tuki'iyi tyikpidsømbinaxwa'jky pøn jaty jam wyinaty yajktip too'ktip, juudyip kajpxtip,

⁴⁶ yide'en ja tnimaay:

—Yide'ents Dios kyajpxy jap kyøjxja'ayi: “Ja' øts ndsaptøjk wya'añ jøts øts njaa'y jap Dios'ajot'attit”; mā meets yø ya jade'en xyiktuni sa maa'tspi chinaadyaajkindi.

⁴⁷ Jabom jabom idø'øn ja Jesús jam tsaptøjkjotp yik'ixpijky; yam idø'øn ja teetywindsøndøjkti, møøt ja kajpxwejpitøjkti møøt ja møjaa'dyøjkti midi tniigubajk'ajttip ja kajp, tniwinmayidi sudso ja yjadyimy'uk'ooktnim.

⁴⁸ Jøts ja nisudso tkamidabyaatti ti sa ja ttu'undit, pø amuumts ja jaa'y ja jam pyatmadøyyi, ti pøn ja jam kabatmadojiyip.

20

Ja Jesús kyutujk

¹ Xjats idø'øn yide'en tuk'ojk yjajty ku ja Jesús jam wyinaty tsaptøjkjotp tyik'ixpiky ja mayjaa'y, ja øgyajpxy ja øy'ayuujk ja jam wyinaty kyajpxwa'kxpy sudso nnitso'ok'ajtin, ku ja teetywindsøndøjk jam yja'jttøø, møøt ja kajpxwejpitøjkti, møøt ja møjaa'dyøjkti pøn tniigugajp'ajttip ja kajp,

² ja'ats idø'øn jam yide'en wändøø:

—Yø' mnigajpxp pøn jade'en tø mdagutujk'aty jøts jade'en m'adø'øtst. ¿Pøn yø kutujk jade'en tø mmø'øyi?

³ Winets Jesús ja t'adsojimbijty jøts ja tnimaay:

—Nayide'en mee nyiktøøwami, jøts m'adso'odip idø'øn:

⁴ ¿pøñ ja Juan ojts tya'ane'emyi jøts ja yiknøbatt? ¿Dios ja ojts jade'en tyanigutujk'ajtxyi, uk ja naxwii'ñit jaa'y?

⁵ Winets ja agøømyi tkajpxy'ajttøø, yide'en ja ñawya'añidi:

—¿Sã nnima'ayin? Ku net yø njanima'ayin jøts ku Dios ja tyanigutujk'ajttøø, yide'ents inet yø x'adso'owin: “Jøts ¿tigøjxp ku ja xkajanchja'widøø pøni jade'en tam?”

⁶ Jøts kuts inet yø njanima'amyia'andit jøts ku ja yaayi jade'en yiktanigutujk'aty, tsojk inet yø jaa'y xjanchka'tspa'o'jkindit, kumi wa'ats yø tnijawidi jøts ku ja Juan ja Dios kyexyi.

⁷ Xjats ja t'adsoodøø jøts ku ja ka' tnijawidi pøni pøn ja Juan jade'en wyinaty tø tyanigutujk'aty jøts ja jade'en yiknøbatt.

⁸ Jøts Jesús ja ñimaajyidøø:

—Pøni jade'en tam, ni øtsts meets ja ngaduk-mado'ot pøni pøn øts jade'en tø xanigutujk'aty ku øts jade'en n'adi'ich.

Ku Jesús tmadyakpaajty ja ka'ødyumbidi

⁹ Winets ja Jesús tnimaabyinaxwa'jky ja mayjaa'y, yide'en ja ejxpajtin madya'aky ja tu'uk tnmadyaktøjkiyii'ñ:

—Ja døøñ jaa'y y'ijty tu'uk pøn jam kyamjotp tnejp ja uvi tsa'am, jøts ja ttukmidaañ ja tyumbi winaagin ku jeky'ampy widejtpi ñijkxy.

¹⁰ Kuts tpaajty ja uvi tsa'am tujk'aats, jats ja tkejxy tu'uk tyumbi jøts ja t'atstuk'amidowa'añ pøn ja kam jam wyinaty tø tmidandi jøts ja tyaktit ja

nidsa'am ni'ipy, midi ja paat'ajtip jøts ja yikmo'ot. “¿Maã?” “Ka'ap.” Ja tumbi ñømdøø. Yikxon ja jam ojts yjantyimyikwøpy, jøts ja yikajxjimbijty wa'ats jadi'iñi.

11 Xjats ja kugam tkejxy jadu'uk tyumbi; nayide'en ja ojts yikjemnøjmi yiktenøjmi, yikxon ja jam yjanchyikipwyøjpy jøts ja nayi wa'ats jadi'iñi yikajxjimbijty, niti ja kyayikmøøy.

12 Jøts idø'on ja ka' tmimøñ, ojts tyumbi ja jadu'uk tkajkxkojmi jøts ja jam nayide'en ttundøø, tyikwindsaachidi tyikjøptsachidøø jøts ja tyikaktøø.

13 'Jøts yide'en ja kugam wyaañ: “¿Sudsom tsøky ndu'unt? Nmajnku'ngin n'ukaxp, ja ku yø t'ejxpaattit, ¿ja kidi yø ttsø'øgidit?”

14 Ja'ayi ja tumbitøjk ja ojts y'ejxpaadyiyi jøts ja xem yam ñawyajnidøø: “Ya'at yø kam tmidanwamp; wan tyikpa'o'jkyim jøts adøm yø kam nmida'anindit.”

15 Winets ja tjidøjtpidsømdøø jam kamjotp jøts ja ojts tyik'ookti.

—¿Sats idø'on kugam ja yjaw tyunidit?

16 Me'emp ja kø'øm jøts ja tyikugøxit ja yjade'embidi tumbidi pøn jadyimyjade'en'ajtip, jøts ja ne'egi tmo'ot ja kyam ja abiky tumbidi.

Ku ja nidaay'ajtibidi ja jade'en tmadoodøø, jøts ja wyandøø:

—iPø katsojknim ja Dios!

17 Tiy Jesús ja wyin'ijxyidi, jøts ja yiknimaadyøø:

—¿Tits idø'on yø Dios kyajpxy ñigajpxy ku yø jap yide'en yja'ayi? ¿Nugo yø jap jade'en wya'añ? Ja tsaa midi ja pojtspi kya'ejxidøø,

ja'ats yam ne'egi tø y'uknøjkxni jam pøch kyubajkp
jøts ja' t'amajtsmujkøjxp yø pøch.

18 Ku ja y'ukyiktanaxkidakpatt ku jam o pøn
y'uknaxkida'akt, pø mā ja nay'ejxpaadit; u kuts
o pøn tyanaxkidakpattit ja tsaa, pu'uxints ja yikt-
awayit.

Ku yikajpxy'aty ja kugubajt

19 Xjats ja teetywindsøndøjk møøt ja
kajpxwejpitøjk ja tjadyimy'ukmatswandøø
ja Jesús, wa'ats ja tyimyjaja'gyukidi jøts ku
ja ja'agøjxp ja madya'aky yikmadyakpaajty;
yjadyimy'ukmatswandip ja' ja Jesús, ja jaa'yts
ja chø'jkidip paty ja jade'en tkatundøø.

20 Winets ja tpiktaktøø myigu'uk pøn tpa'ejxtip
tpago'odip jøts ja ñadyiji nugo jade'en ñanky'ijxyidi
sam øy jaa'y, ja'ats ja chojktip jøts ja tkajpxy'ejxtit
kuuyi ja y'ukajpxigø'øty, ja'ats ja jatyi tyani'øønidip
jøts ja jam tkøyaktit mā wyindsøn ja jamdi.

21 Paty ja yide'en tyiktøødøø:

—Windsøn, nnija'wip øøts jøts ku myik'ixpiky øy
tsuj, tiy janch tuki'iyi xnigajpxy jøts ka' me pøn
xkupiky xkagupiky ti sa me mwa'añ, ne'egi yikxon
mets ja ne'egi xnankñi'ixpøkiyi tiy janch ja Dios
tyiy'ajtin sudso ja yiknijawit.

22 Tukmadookts øøts: ¿Nmo'op øøts kugubajt
ja møj windsøn midi jam abiky'ampy nichøky tø
myiñ yikutujkpi, uk ka'?

23 Yja'wiyiñ Jesús ja jatyi jøts ku ja
kya'ødyunwa'añi, jøts ja tnimaay:

—¿Tiku øts jade'en xkajpxy'ejxti, tigøjxp ku øts
jade'en xniwambatwa'andi?

24 Uktuk'ejxtik øts tu'uk meeñ. ¿Pøn ja wyeen y'aaw yø jam myøøt'ajtíp, jøts pøn ja xyøøw jam køxja'ay?

Jøts ja wyandøø:

—Ja møj windsønimts yø' yja'.

25 Xjats ja tnimaay:

—Ja'ats meets ja mmo'op midi ja yja'ajtpy, jøts ja Dios ja' xmo'odit midi ja paat'ajtmiiyip.

26 Jøts ja nisudso'ampy tkakajpxy'ejxti øyik idø'øn ja ttaniwambattit sa jaty ja jam wyinaty wya'añ jam mayjaa'yjotp; jinaxy ja ñigyumaap yjajtøø ku ja jade'en yik'adsøødøø, jøts ja ne'egi y'aaw amøñi t'ukyik'ejtnidi.

Kuja jaay tyiktøwdi pøni janch idø'øn ja' ku oo'kpi jadigojk yjukpyøktit

27 Jøts idø'øn ja saduceotøjk jam winaagin yja'tmidøø jøts Jesús ja t'ejxwa'andi. Ka'ap idø'øn ja saduceotøjk ja tkupøkti jøts ku oo'kpi y'anmija'win jadigojk pyidsimy juky'ajtpi xemikøjxp møøt ñine'kx; paty ja tnimaadyøø ja Jesús:

28 —Windsøn, yide'en ja Moisés tjaadyaañ, pønìk ñidø'øxy ku'øøky tyiktamp yam ja ka'anim y'u'nk tpaati, pøni jamts ja' y'uch y'ajch, ja'adsik tmøøt'amajtskip ja ku'økyø'øxy jøts ja ttukpaatt y'u'nk, jøts ja jade'en tkayikudigø'ty ja myigu'uk.

29 Jats idø'øn jaay y'ijtyi, niwixujk ja tyukyaadyøjk'atti jøts ja yjagyooobi jawyeen y'amajtskiyiñ jøts ja tku'ø'jky ja ñidø'øxy, nitu'uk y'u'nk ja ojs tkapaatti.

30 Xjats ja mutskpi ja tmøøt'amajtskiyiñ ja ku'øktyø'øxy jøts ja nayide'en tku'ø'jky, ka'ap ja tyik'u'nkpaajty.

31 Jøts ja midigøøkpí ja twaay ja ku'øktyø'øxy jøts ja nayide'en tku'ø'jky. Tum jade'en yjajtkøjxti niwixujk, ni tu'ugin pøn y'u'nk tkayiktaañ.

32 Jøts ja tø'øxyøjk nayide'en y'o'jknimaa.

33 Kuts idø'øñ ja nøjkx jadigojk yjukpyøkti, çpømbits idø'øñ ja nøjkx tñidø'øxy'aty jadigojk, pø niwixujkxi ja tø t'atsnidø'øxy'atti?

34 Xjats ja Jesús ja ñimaajyidøø:

—Yaayi dø'øñ yø jade'en yjaty, yaayi naxwiiñ jade'en y'amajtskidi ja yaa'y ja tø'øxy.

35 Pøn paat'ajtidip jøts ja ñøjkxtit jam ma Dios ja tø t'a'ejxi, ku ja yjukpyøktit jadigojk ka'ap jam pøn t'ukjotmay'ajtnit ja amajtsk'ajtin, ni tka'ukyik'amajtskyinidit y'u'nk y'una'jk jam pøn,

36 ka'ap pøn y'uk'oo'knit y'uktigøøñit. Tum jade'en ja jam chinaañidit sam ankilistøjkti. Tum Dios ja amuum u'nk'ajtidip una'jk'ajtidip, ja'agøjxp ku dø'øñ ja jemchinaa'yin tø tpaatti ku ja jadigojk tø yjukpyøkti jap oo'kpi agujkpy ja nwindson'ajtimgøjxp.

37 Kø'øm paatxi Moisés ja xuknija'windi jøts ku oo'kpi yjukpyøkti jadigojk ku ja jam ojts t'ixy ja ximum ñitøøwyidity. Pø yide'enxi ja jam tmadøøy jøts ku ja Abraham, jøts ku ja Isaac, jøts ku ja Jacob ja tdios'atti ja Dios Teety.

38 Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjujky'att øy pøn.

39 Winets ja kajpxwejpitøjk winaagin ñømdøø:

—Janch tigyajpxy, windsøn.

40 Jøts ja ka' y'uknay'a'ejxiniiyidi jøts ja tyik-tøø'adø'øtstit, ne'egi ja y'amondøø.

¿Janch idø'øñ ku ja David t'ap'aty ja Cristo?

41 Xjats Jesús ja tnimaay:

—¿Jøts sudso jade'en mwā'andi jøts ku David ja Cristo t'ap'aty?

42 Pø yide'ents ja David tyikwā'añ ja nøky ku ja tjaay ja Salmos:

Yide'en ja nwindson'ajtim ja Dios Teety ñimaajyøø:
“Putsinaaky øts n'aga'ñ'ampy,

43 kunim øts yø nmimajadakøxt pøn jaty
mmidsep'ajtip.”

44 ¿Sudso'ampyts ja David t'ap'aty ja Cristo, pø
wyindsøn'ajtpyts ja kø'ømbaat?

*Ku ja Jesús tnigajpxi ja kajpxwejpitøjk ja
kya'øwyinmaa'ndyi*

45 May jaa'y idø'øñ ixam amidodujktip ku ja
Jesús tnimaay ja pyabøjkpitøjk:

46 —Øyim mnay'ejx'etidit, ejxim yø
kajpxwejpitøjk mdawin'iiñidi kya'øwyinmaa'ñ,
jade'en yø ñachøkyidi jøts wyet yø tyeky'ok'am
paat tpajidøttit, jøts ja' yø chojktip ja
nawyindsø'øgi jøts yø yikajpxpoo'kxtit jam
mayjaa'y agujkp, jøts ku yø tsaptøjkjotpy tyøkidi
tum ja tsinaabyajt yø tyatsinaawyandip midi jam
tsaptøjk'okp, jøts ku kyaamyidi tum jam yø ñaxti
tsinaabyi mā dø'øñ yø myøjtøkidit.

47 Nayø'øxi ku'økyø'øxy ja pyiktā'aky tpøjxidip
jøts ñadyijyi ñadyagubøjkyidi ja Dios'ajot'ajtin. Ja ti
pøn ja', ja ti pøn ñadyijyi jeky'ampy tsapkajpxtip,
nayø'øxi ja'adi pøn ka' ti tyikniøaxø'økti, ñadyijyi

øy jaa'y'atti. Yø yjade'embì jaa'yts idø'øn Dios møj yik'ayo'op.

21

Ku ja ku'økyø'øxy tpiktaajky lyimunsi

¹ Xjats idø'øn ja Jesús ojts t'ixy jap tsaptøjkjøtpy ku ja kumeeñ jaa'y jam wyinaty tkugonidi ja lyimunsi jam meeñ'abøjk'i'ñjotp.

² Jøts ku'økyø'øxy majtsk ja pyujxmeeñu'nk jam tkugo'onimøø;

³ winets ja Jesús ja pyabøjkpitøjk tnimaay jøts ja wyaañ:

—Janch meets idø'øn nnøjmi, jøts ku yø ku'økyø'øxy ayoobi ne'egi myinajxpy lyimunsi yø jam Dios wyingujkp øy idø'øn yø kyamabaadi sam o pøn yja' tpikta'akti.

⁴ Ja' yø iiy vojxtip midi yø winda'anxiyidip yam yø ku'økyø'øxy ayoobi ne'egi tpikta'aky ja yiktu-ujnik ja ñidsinaajyik.

Ku ja Jesús tnigajpxy jøts ku ja tsaptøjk yjett

⁵ Jøts idø'øn niwinaagin jam wyinaty tnimadya'akti ja tsaptøjk, ku ja janch tsuj kyaxi'iky, ku tsaa ja jade'en janch tsuj tmøøt'aty, jøts ja nayide'en chujkaxi'iky midi jam wyinaty pøngapøn tø tyoxti. Xjats ja Jesús wyaañ:

⁶ —Ja'atp ja tiempì ku ya'at kyuja'wigyøxt ixa jade'en x'ejxti, ku yø tsaa ni tu'ugin kyata'ant nikiibyety.

Ku ejxa'an jawyeen yikpikta'akt ku wyinaty ja t#dyu'unin xøøw wyingøñ

⁷ Winets ja tyiktøødøø jøts ja tnimaadyøø:

—¿Juuni windsøn idø'øn ja jade'en yjatt? ¿Ti dø'øn ja yiktanijawip jøts ku dø'øn ja wyinaty jade'en yjatwa'añ?

⁸ Jøts ja Jesús wyaañ:

—Øyim mnay'ejx'etidit, jøts kidi mee tø mniyjajtni ñiwyindaay'ajtk. Kumi may ja mye'endit pøn øts nxøøw nugo nadyanikajpxidip ku ja ñø'ømdit: “Cristo øts”; “Tø kya'pxy ja tiempi.” Kidits mets ja xpanijkxy jatyi.

⁹ Jøts ku xnimado'attit ja tsep, uk tyiktigatsti ja kyutujk adsepkojxp, kidits me mdsø'øgi; pø jawyeenxi dø'øn ya'at jade'en ñajxkøxt, ka'anims idø'øn wyinaty kya'pxy jøts kyugøxit ja naxwiiñit.

¹⁰ Winets ja tjaaknimaay:

—Ja møj ja mutsk kajp nøjkx ñañibidi'igyidi, jøts ja windsøndøjk cheptu'undit ja xem ja yam pøn jaty ja naajx ja kajp tñitanaadyip ya naxwiiñ.

¹¹ Møk'ampy ujk ñaxt, yuu pa'am ñaxkida'akt øy madsoo, adsø'jkyibim ja tuki'iyi myiktuk'ejxtit ku ja Dios ejxa'an møk tpikta'akt jam tsajpwemp.

¹² 'Jawyeents mee myikmajtsmukøxwa'ant, myik'ixa'adit o madsoo. Kuts myikpaattit jøts myikwanøjkxtit jam tsaptøjkjotp ma myiktiidyu'undit, myikti'idyit myiktsu'umdit puxøjkjotpy, ja møj windsøndøjk myik-tawinguwawidit pøn jaty yikutujktip, ja'ats idø'øn ja mdukpøky'atidip ku øts nja' xpabøjkidi.

¹³ Jats meets idø'øn ja nja' xnigubojkit.

¹⁴ Kidits meets ja xwandijy pøni sa mee mnagyubokit ku mee mnagyu'adsowiyit.

¹⁵ Øts meets ja wijy'ajtin nmo'op, øts meets nyik'ayukpaatp sa mee mwa'ant jøts ja mmidsep

nisudso'ampy kya'adsojimbettit, jadi'iñi ja tmi'amo'ondit.

¹⁶ Mdeety paat mdaak paat mee nga'odyuniyit. Tits ja chow ja mmigu'uktøjkti jøts ja'adi pøn mminamyaaajyidip, myik'oogidip winaagin meets ja'.

¹⁷ Tum midsep meets o pøn m'ejxit ja'agøjxp ku mee xjanchjawi.

¹⁸ Ka'ats meets jadi'iñi myik'ejxigø'øty, ni tu'ugin meets mwaay kyawindigø'øty.

¹⁹ Pøni mmidanaadyip tu'ugyi amumjoojt, mbaatpts meets ja nitso'ok'ajtin jøts meets m'anmija'win yujky'att xemikøjxp.

²⁰ 'Ku x'ejxtit yø Jerusaléngit kajp jøts ku amuum tseptumbitøjk tø ñi'awidejtniyi, jade'ents meets ja xnijawit jøts ku yø kajp wyinaty tsojk kyudigøøwya'añ.

²¹ Pøni pønts jam Judeit naxjotp wyinaty, wants ja tkaknøjkxti jam kojpkøjxp; pøn jaty jam Jerusaléngit kajpjotp, wan ja jam tkakpidsømdi, jøts pøn jaty jam o muum awa'ats etjotp widejttip, kidi ja winet et wyimbetti jøts ja ñøjkxtit jam kajpjotp.

²² Ja'abi xøøw idø'on ja ayo'on mye'ent, jaa dø'on ja jade'en yjatt kyubatt sa jaty Dios kyajpxy wya'añ.

²³ ¡Ayo'ijxyim ja tø'øxyøjk yjattit pøn jaty ja myutsk jam wyinaty tnikøjxp'ajttip, pøn jaty ja myaxu'nk jam wyinaty tø kyaxø'økti! Pø ji'iyim ya'axyimxi dø'on ya naxwiiñ yjatt, møk ja jaa'y ayo'on tpaattit t'ejxtit.

²⁴ Pømbi ooktip jam tseptundaajkjotp, pømbits yikmatstip jøts ja yiktsu'umdit o magajp, øy yø

Jerusaléngit kajp øy sa yiktu'unt, øy ja ja'at jaa'y yø sa tyuniyit, kunim ja y'ayo'on yø ttanajxkøxt winetnimts yø yikmajtstu'utt.

Sa mye'ent ja naḡwii'ñit jaa'y myøjkudanaabyi

²⁵ 'Wenk yø xøøw yø po' yjatt, yø maadsa' nayide'en; jøts naajx kajp jadi'iñi tya'andit, niti tabyajtin tkapaattit, øy ja tsø'øgi yik'o'jkniiyidit ku tmado'odit ja mejy tyojmjø'økt øy maḡsoo.

²⁶ Yik'oo'kjimbetidip jaa'y tsø'øgi ku ja tnmado'odit jøts ku jade'en naḡwiiñ yjatwa'añ; jøts ku ja'abaat jade'en yjatt ti jaty jam tsajpwemp ejtp.

²⁷ Jaanimts ø x'ejxtit, ja naḡwii'ñit jaa'dyi myøjkudanaabyi, ku nmime'ent yootsjøtpy ja nmøk'ajtin, jajpim tsamambim ja n'aju'uk nyikaxø'økt.

²⁸ Ku dø'øñ ja jade'en yjajt'ukwa'ant, møk mnabyikta'agidit jøts xjøp'ejxtit jøts ku tsojk mye'ent pøn myiknitso'ok'atidip.

²⁹ Ñayi tyamimadyakpajtiyii'ñ ja' jadu'uk ejxpajtin madya'aky jøts ja wyaañ:

—Ku x'ejxti ja iigi kipy uk øy ti kipy kya'adigach ja y'aay.

³⁰ Ku kujk xyimumni, jats ja wa'ats xnijawidi jøts ku poot wyingøñ ku ja nøø ja tuu myenwani.

³¹ Nayide'ents idø'øñ ja' ku x'ejxtit jade'en ja ayo'on, jade'ents ja xnijawidit jøts ku wyingøñ ja Dios kyutujk midi ja tyanitanaapy yjaa'y.

³² 'Janch øts idø'øñ nwa'añ jøts ku dø'øñ ja jaa yjatt namga'anim y'oo'kixy pøn jaty ja ixyam juky'ajttip.

³³ Najxp y'ity ja naajx ja tsajp, øy yø juuni kyudigø'øty, jøts øts n'ayuujk nijuuni yø kyakixy kyanaxy.

³⁴ 'Øyim mjaa'y'attit, kidi m'aaw mjoojt xamiyoxti midì yiktundigøøpy, kidi ja nøø ja mu'uk xunk'atti, kidi meets ja ne'egi xajotigøydi ti jaty ja ejtp naxwiiñ jøts jade'en adsu'jky mgayikubaadidit

³⁵ sam naky myukyìn, jade'en ja yiknime'endit pøn jaty jujky'ajttip øy madsoo ya naxwiiñ.

³⁶ Jøp'ejxtits meets, ajot'at'etti ja Dios jøts mniwã'adsidit ja ayo'on midì tunip jatip, jøts ø xwinguwa'agidit amgujk jotkujk, ja naxwii'ñit jaay myøjkudanaabyi.

³⁷ Xinaxy idø'øn ja Jesús jam yik'ixpiky tsaptøjkjotp, jøts ja koots ñijkxy jam kojpkøjxp midì yiktejp Olivos.

³⁸ Jøts ja mayjaa'y jam tsaptøjkjotp ejtp xyuminøjkxti jøpyi jøts ja jam pyatmadøyi.

22

Ku ja Jesús yikajpxy'aty jøts ja yikmatst

¹ Ja paski xøøw idø'øn wyinaty pyatpy ku ja tsapkaaky yikay jadi'iñi midì kalevaduri møøt.

² Jøts ja teetywindsøndøjkti jøts ja kajpxwejpitøjkti tjanch'ixa'adi ja taay sudsonim ja t'ukyik'ookit ja Jesús, ja mayjaa'yts ja chø'jkidip.

³ Xjats ja Judas Iscariote ja miku' tyatøjküyøø, ja idø'øn ja pabøjkpitøjk møøt kya'pxti nimakmajtsk.

⁴ Jøts ja ojts tninijkxy ja teetywindsøndøjkti møøt ja tajk mayut, jøts ja ojts tminagyajpxyi, ojts ja tkajpxy'atti sudso ja tkøyakt ja Jesús jøts ja tmatstit.

⁵ Jøts ja jade'en yjotkujk'atti, ojts ttami'awanidi meen ja Judas, jøts ja ttami'ju'udyit ku ja tkøyakt ja Jesús;

⁶ kyupøjk ja jade'en jøts ja t'ixaadyøjkiyi'ñ ja taay, jøts ja winet tkøyakt ku ja mayjaa'y jam kya'ettit.

Ku ja nwindson'ajtim yjaak'uk'a'ux'ajtni ja pyabøjkpitøjk

⁷ Xjats ja xøøw tpaajty ku ja tsapkaaky kyayikay levaduri møøt, xjats idø'on ja borreegi maxu'nk wyinaty y'ookwa'añ, jøts ja' idø'on yikyøxy'ajtp ku ja paski xøøw ñaxy.

⁸ Winets ja Jesús tkejxy ja Pedro møøt ja Juan, yide'en ja tnimaay:

—Nøjkxti jøts ja paski a'ux xyik'awejxtit.

⁹ Jøts ja tyiktøødøø yide'en:

—¿Mamts øøts ja xuk'a'ejxiwya'añ?

¹⁰ Jøts ja Jesús ja y'adsoojidøø:

—Ku net jam mgajptøkidit, jam inet tu'uk xpaattit jaa'y pøn jam wyinaty nøø twejtsp tsiijøtpty. Ja'ats mbanøjkxtip jam tyøjkjotp, pøni ma yja'aty jamts mja'attit,

¹¹ jøts ja kudøjk xnøjmidit: “Yide'en ja windsøn wya'añ: ¿Mak idø'on ja tøjkjoojt ma ja tmøøt'a'ux'att ja pyabøjkpitøjk, mak idø'on ja tka'adyit ja paski a'ux?”

¹² Winets meets inet ja tøjkjoojt myiktuk'ejxtit jap nipatøjkijxpy a'ejxi abaadi; japts xyik'awejxtit ja a'ux.

¹³ Xjats idø'on ja ojts ñøjkxti jøts ja jam jade'en tjanchpattøø sa Jesús ja wyinaty tø ñii'mxyidi, jøts ja jam t'a'ejxidøø ja paski a'ux.

14 Kuts ja a'ux'ajtk tpaajty, xjats ja Jesús møøt ja kyudanaabyitøjk twinguwa'adsiyii'ñ ja kaabyajt.

15 Jøts ja tnimaay:

—iixyamnim meets inet ja paski a'ux jade'en nmøøtkaamyuky sam ø ndyimchøkyin namga'anin ø n'øøky!

16 Janch øts idø'øñ nwa'añ jøts ku meets ixyamyi jade'eñi njaakmøøtkay jaanim jadigojk ku mye'ent ja Dios kyutujk midi ja tyanitanaapy yjaa'y.

17 Winets ja tnixajiyii'ñ tu'uk uujk'ii'ñ, jøts ja jawyeen ttukmøjajawiyii'ñ ttukunuu'kxyjajawiyii'ñ ja Dios Teety, jøtsnim ja wyaañ:

—Axajidi ya'at jøts x'ukwa'kxtit;

18 øts køøm wamp jøts ku ø ka'ap tsojk n'uk'uknit yø uvi tsajam nøø'u'nk, jaanim jadigojk ku Dios ja kyutujk tyikme'ent midi ja tyanitanaapy yjaa'y.

19 Jøts ja tnixajiyii'ñ tsapkaaky, ojts nayide'en ttukmøjawi ttukunuu'kxyjawi ja Dios Teety, jøts ja t'adujkpaajkxi ja kyudanaabyitøjk jøts ja tmø'øy, yide'en ja tnimaay:

—Kaydi ya'at, yø' øts idø'øñ ñamyayi nne'kx'ajtpy midi meets mnitsoojkingøjxp inet mniyoxp. Mdu'undip ya'at jade'en øts nja'myajtsingøjxp.

20 Nayide'en ja uujk'ii'ñ ja ttuun ku ja y'a'ux'ajtkøjxtøø, jøts ja wyaañ:

—Ya'at tsapnøø'uujkin idø'øñ ixyam tamp ejxpajtin ku ja Dios Teety ja wyandajaky tyik'aduky samdam ja ttami'awa'anii'ñ ja naxwii'ñit jaa'y ja nitso'ok'ajtin. Ixyamts idø'øñ ja cho'onda'aky ku øts ja nni'jpy inet wyidsu'unt wyidaxt.

21 'Pønts ø xkøyakp, pøn ø xka'ødyunwamp, ixya øts ja møøt ngay, kidi majip ja'.

22 Ja' ø nbadumpy midi ø tø nyiktanipiky; jja' ayo'ijxyim jajtp pøn ø xkøyakwamp!

23 Jøts ja ñayiktøønaxwa'jkidøø agø'ømyi, pøn idø'øn jade'en ka'øy'adø'øtswamp.

Ku ja Jesús kyudanaabyitøjk tkajpxy'atti pøn idø'øn jawaani møj pidsø'ømp

24 Xjats ja xem yam tkajpxy'ajtpinibøjkidøø pømbi dø'øn jadyimy'ukmøjtøkip.

25 Jøts Jesús ja ñimaajyidøø:

—Jade'en møj windsøn t'ana'amdi ja naajx ja kajp pøni sa ja ttsokti; jøts pøn jaty tñigubajk'ajttip o ti, ja'ats yiktejtíp jøts ku ja t'ødyundi øy pøn.

26 Ka'ats meets idø'øn jade'en mjaa'y'attit; pøni pøn møjtøkip, pøni pøn ana'amp, kidi ja jawyeen namyiduni ttsøky; ja' idø'øn paat'ajtip ja myigu'uk tpudøkip.

27 ¿Pømbi dø'øn møjtøkip? ¿Ja' pøn yikwindsø'jkíp, uk ja' pøn windsø'jkíp ma ja kaadyaajk jam? ¿Kidi ja'ajip møjtøjkíp pøn jam tø twinguwaadsí ja kaabyajt jøts ja yikwindsø'øgi? Ixyats meets jade'en nmøøtwidity sam ja' pøn ja myigu'uk wyindsø'jkíp.

28 Tøts meets xmøøt'ayo'ombaaty, tø nayide'en xmidanidi wine'enin øts ixyam xmøøtwidetti.

29 Paty meets mbaat'atyí nmo'ot ja Dios Teety kyutujk midi ja tyanitanaapy yjaa'y, nayide'en sam øts ja tø xmø'øyin,

30 jøts mga'adyit m'uuktít øts ngaabyajtkøjxp ku øts ja njaa'y ja kutujk ndanitanit, jøts m'ixa'aktit

ma ø nyikutukt jøts xii dyu'undit ja Israelit jaa'y niduki'iyi.

Ku ja Jesús kò'òm tnigajpxy jøts ku ja Pedro ja kyu'øønyit

³¹ Nayide'en ja nwindson'ajtim wyaañ:

—Simón, Simón, tyimdyø jøts miku' yja' myøjtøkit. Tø ja t'amidøy ja Dios Teety ja tiy'ajtin jøts meets ja øy øy myik'ayo'ombaadit, yikxon meets ja mduktani'ejxwā'añi;

³² tøts me nni'amidowi jøts kidi yikmimajada'aky ja mjanchja'win ku jade'en m'ukjatt m'ukubatt. Kuts ja m'ajot'ajtin jadigojk tu'ugyi xyik'ett, kajpxjot'amøjkits ja mmigu'uk pøn jaty ø nja'ajtpy.

³³ Jøts ja Simón wyaañ:

—Windsøn'ajtim, ku me m'ukyiktsu'umt, nayide'ents øts nyiktsu'umt, ¿ti ti ø nnida'amp? Mjadyimya'øøky mets, nmøøt'ookpts mets.

³⁴ Winets Jesús ja ñimaajyøø:

—Øts Pedro dø'øn wamp jøts ku tsapni'aaw wyinaty ka'anim y'ayajxji'ikñim, ku mets wyinaty tigøøk ojk tø xku'øø'ni jøts ku me xka'ijxy'aty.

Ku Jesús tnimaay kyudanaabyitøjk jøts ku ja tyagøda'akwā'añidi ja ayo'on

³⁵ Xjats Jesús ja yiktøøjidøø:

—Ku meets ojts nguexy jadi'iñi, ku ja pejn ngadukwejtstøø, ku ja meñ abøjk'iñ ngadukondøø, ku ja mgø'øk paat xkakondøø, ¿sats meets ojts mdyimyjaty? ¿Ti ojts mguidyim'ijtxyidi o dø'øn ja jade'en xkakondøø?

Jøts ja yjanchwandøø:

—Janch ka'ap øøts ojts ti xka'ejtxi.

36 Winets ja ñimaajyidøø:

—Yamnims inet ja pejn xwetstit pøni pøn yja' jam, nayide'en ja meeñ abøjk'ii'ñ; pøni pøn ja chujx ka'ejtxip, wan ja ñijan ttøøky jøts ja ttaju'uty.

37 Øts wamp, wan idø'øn jade'en tjaty, jabi kuwanyimxi jade'en yjatt sã Dios kyajpxy wya'añ: “Møøt ka'øy jaa'y ja yik'amachomujky.” Jade'ents øts idø'øn nyiktu'unt sã øts jap tø nyiknigajpxy. Ka'pxy idø'øn ja jade'en yjatt kyubatt.

38 Jøts ja wyandøø:

—Windsøn'ajtim, pø ıxyats majtsk tsujx.

Jøts ja y'adsøøy:

—Amøñidi.

Kuja Jesús t'ajot'aty ja Dios Teety jam Getsemaní

39 Xjats ja Jesús chø'jñ, jøts ja ñijkxy jam kō-jpkøjxp midi yiktejp Olivos mā dø'øn ja jam xyumiyø'øy'ity; jøts pyabøjkpitøjk ja pyadso'onøø.

40 Kuts ja jam yja'jty, jøts ja ñimaajyidøø:

—Ajot'atti Dios Teety, jøts kidi myikmajada'akti.

41 Jøts ja ojts yjiyø'øy nadyu'uk, ñajtsyø'øyiyii'ñ nijagam. Jamts ja ñagyuxendyaajkøø, jøts ja jam Dios Teety t'ajot'ajty

42 yide'en:

—Dios Teety, pøni mdsøjkpy, jøts ø ka' jadine'en n'ayo'ombaatt; kidi øtsipts nja' kø'øm nyiktumpy, ja' ø nbadumpy pøni sã me xamidsøky.

43 Winets ankilis ja tu'uk ñimejnøø midi tsajpjøtpty tso'omp, jøts ja myøjaawmøøjyøø.

44 Tyimchaachja'wipts ja møk ku dø'øn ja jade'n yjatwa'añ, jøts ja ojts tjaaktyimyøktuñ tjaaktyimy'ajot'ajty ja Dios Teety amunjoojt.

Janch yikxon ja yja'anuu'kxiñi, jade'en y'anuu'kxi ja wyixe'kxy sam ni'jpy kom kom wyixe'kxyin.

⁴⁵ Kuts ja Dios'ajot'ajt'abajtiyii'ñ, jøts ja ojts tnimiñ ja pyabøjkpitøjk mā ja jam wyinatyi. Maadip ja jam ku ja tpaajty, ja jotmay ja jadi'iñi yikjotkøjxidip.

⁴⁶ Winets ja tnimaay:

—¿Tigøjxp ku mma'adi? Pidø'økti, jøts ja Dios Teety x'ajot'attit jøts kidi mibaat miku' yja' mmimajada'agyidi.

Ku ja Jesús yikmajch

⁴⁷ Nay ixam ja Jesús wyinatyi jade'en kyajpxy ku yja'jty may jaa'y. Ja Judás ja twinyø'øpy pøn ja pabøjkpitøjk wyinatyi nimakmajtsk møøt tø y'uka'pxti, jøts ja twingume'eniyii'ñ ja Jesús jøts ja ojts ttsu'kxy.

⁴⁸ Winets nwindson'ajtim ja tnimaay:

—Judás, ¿jade'eñi øts idø'on xkøyaky ku ø xtsu'kxy?

⁴⁹ Jøts pøn ja Jesús jam wyinatyi møøtwidejtíp, ku ja jade'en t'ejxtøø, winets ja yiktøøjøø:

—Windsøn'ajtim, ¿nadyagubojkim yø tsujx?

⁵⁰ Jøts ja nidu'uk tyiktsaachiyii'ñ ja teetywindsøn tyumbi, ojts y'aga'ndyatsk ja tkajtspo'jtíyi.

⁵¹ Ka'ap Jesús ñiimy, yide'en ja wyaañ:

—Majtstu'utti; wan jade'eñigøjy.

Jøts ja tkønixajøø ja soldadi tyatsk jøts ja tyikt-søøjký.

⁵² Xjats ja tnimaay ja teetywindsøndøjkti, ja kajpxwejpitøjkti, ja møjaa'dyøjkti wine'enin ja jam winaty tø myendø jøts ja yiktsoonwa'añi:

—Ja tsujx, ja kipy meets yam xanimemp. ¿Ti øts yjawí tø nduni? ¿Tø øts yjawí nmaa'tsni?

⁵³ Ku meets jam y'ijty nxumiminabyaadyi jabom jabom jam tsaptøjkjotp, niwine'enints meets y'ijty sa xkatuñ xkanøjmi; yamts meets winet tø mnaxwa'aky ku ja et tø chuu'ji kyoodsi jøts miku' yja' jade'en myajada'aky.

Ku ja Pedro tku'ñ jøts ku ja ka' t'ijxy'aty ja Jesús

⁵⁴ Winets ja tmajtstøø ja Jesús, jøts ja tyiknøjkxtøø jam teetywindsøn tyøjkwindum; jøts Pedro ja ojts tpanijky ix'oojk, jagam ja tpayø'ø.

⁵⁵ Jøts jøøn ja jam tajkyujk'am tyikmøjidøø, jamts ja tnidsinay'awidejttøø jøts ja Pedro nay jam y'ixakmøø.

⁵⁶ Winets tø'øxyøjk ja tu'uk y'ejxøø pøn jam wyinaty tump, jøts ku jøøn ja jam twindsøøni, winets ja tiyim wyin'ejxøø jøts ja wyaañ:

—Yø'øts ja Jesús y'ijty tmøøtwidijtp.

⁵⁷ Ka'ats Pedro ja tkupiky, yide'en ja wyaañ:

—Ka' ø migu'uk ja n'ijxy'aty.

⁵⁸ Jøts jawaandøki y'ijty, xjats jadu'uk y'ejxpajtøø, jøts ja wyaañ:

—Mets yø y'ijty møøtwidijtpy, ¿kidi?

Ka'ats ja Pedro ñimy, yide'en ja wyaañ:

—Mixy, ka'ap ja y'øtsi, ka' øts ja nmøøtwidity.

⁵⁹ Tø wyinaty tukoori ñaxy ku ja jadu'uk møkta'aky wyaañ:

—Janch yø' tam yø y'ijty myøøtwidijtpy, pø nayi Galileit jaa'yts yø'.

⁶⁰ Xjats ja Pedro wyaañ:

—Migu'uk, nguidyimñija'wip øts pø ti mets jade'en mmadya'kpy.

Jøts nay jatyi nay ixamni ja jade'en kyakajpx'abaadi ku ja tsapni'aaw tu'uk y'ayajxy.

⁶¹ Jøts ja nwindson'ajtim t'ejxjimbijty ja Pedro, winets ja Pedro tja'myejch ku nwindson'ajtim ja wyinaty tø ñii'mxyi: “Ku tsapni'aaw inet y'aya'axt, tø mets wyinaty tigøøk ojk xku'øø'ni jøts ku me ka' x'ijxy'aty, jøts ku me ka' xnijawi.”

⁶² Xjats ja Pedro yø'øpyidsiimy janchniyaxni.

Ku ja Jesús yiktaxi'iky yiktaguyaty

⁶³ Jøts ja jaa'dyi pøn ja Jesús wyinaty tkøjø'øm'ajttip, ojts ja ttaxe'ekti ttaya'axti, jøts kawine'en twinwopti tjøpwopti.

⁶⁴ Ojts ja twindsumdi jøts ja twingoxti tjøpkoxti, yide'en ja tnøjmidi:

—iUknajtsjawi pøn yjawi tø mgøxyi!

⁶⁵ Kawine'enin ja tjemniimaadyøø ttenimaadyøø.

Ku ja Jesús yikwaanijkxy jam kutujktaajkjotp

⁶⁶ Xjats ku xyijndyajky jøts ja jamit møjaa'dyøjk ñamyujkidøø møøt ja teetywindsøndøjkti, møøt ja kajpxwejpitøjkti, jøts ja tyiknøjkxtøø ja Jesús ma ja myøjkutujktaajk ja jamdi. Jøts ja jam tyiktøødøø yide'en:

⁶⁷ —Tukmadook øøts, ¿janch mets idø'on myiktejp Cristo midi yiknitsokp?

Jøts ja y'adsoojidøø:

—Ku net njanøjmidit jøts ku ja y'øtsi, ka'ats meets inet xmibøkt.

⁶⁸ Kuts meets inet nyiktø'øtt, ka'ats meets inet x'adsojimbett, nijade'en meets inet xkamajtstu'utt.

69 Nay ixyamyits øts inet ja Dios Teety nbu'ixaagit kyutujktaajk jøp'am, pøn ja myøk'ajtin kamaabyim.

70 Winets ja niduki'iyi wyandøø, niduki'iyi ojts yiktiyi:

—¿Janch mets idø'øn Dios U'nk?

Jøts Jesús y'adsøøy, yide'en ja tnimaay:

—Øts idø'øn ja', nagyø'øm meets ixa jade'en tø mwā'añ.

71 Jøts ja wyandøø:

—¿Ti ejxpi ti nija'wibi jaaktsojkiyip? Tøxi adøm yø yam kø'øm ndyimyadø'øyin sa yø kø'øm wya'añ.

23

Ku ja Jesús twinguwa'jkiyi'ñ ja Pilato

1 Winets ja tyanyagukigyøjxtøø, jøts tyiknøjkxtøø ja Jesús jam Pilato wyingujkp.

2 Jøts ja jam tni'øø'ninaxwa'aktø yide'en:

—Tø øøts yø jaa'y ngubaadi, yø' tkajpxma'tp adøm ja nmigu'uk. Yide'en yø wya'añ jøts øøts ja yjadu'ukpi windsøn ngamigubatt midi ya'at naajx kajp tnitanaapy. Nayide'en øøts yø xnimaamyi jøts ku yø' Cristo, tyimy ja møj windsøn midi yiknitsokp.

3 Xjats Pilato ja tyiktiy:

—¿Janch mets idø'øn israelit jaa'y mniwindsøn'ajtpy?

Winets ja Jesús y'adsøøy jøts ja wya'añ:

—Janch øts ja', ka' me nugo mwā'añ.

4 Jøts ja Pilato tnimaay ja teetywindsøndøjkti møøt ja mayjaa'y:

—Niti pøky yø jaa'y, niti tundigø'øyin yø tkatuñ.

5 Tiii møkta'aky ja tyimñømdi:

—Yø', Judeit jaa'y nugo tkajpxma'tp ku kyø'øm wyinma'añ yø ttuk'ixpiky. Jam yø ojts Galilea jade'en y'adøtspinaxwa'aky, jøts yø icyabaat jade'en tpamiñ, icyabaat jade'en tkamajstutu.

Ku ja Jesús twinguwa'jkij#ñ ja Herodes

6 Kuts Pilato ja jade'en tmadøø, xjats ja tyiktiiy pøni janch Galileit jaa'y idø'øn ja'.

7 Kuts ja ñømdøø jøts ku jade'en, winets ja ojts ttaninijkxy ja Herodes pøn wyinaty møj kudunk'ajtp jam Galilea, tyimbyøn ja wyinatymi jam Jerusalén ja'abi xøøw.

8 Kuts ja Herodes twingu'ejxij#ñ ja Jesús, jøts ja yjantyimxyondaajky; jekyip idø'øn ja wyinaty tyimyjawin'ejxwa'añ jøts ja jadine'en ka' twin'ijxñim, tø ja wyinaty yiktamimadya'aky jøts ja jade'en tnijawi, yjöp'ijxpyts ja t'ejxit øy juuni ja myilagri'ajtin.

9 Kawine'en ja ttiibyijky, jøts ja Jesús kyidy-imy'adsoop ja'.

10 Ixam idø'øn ja teetywindsøndøjk wyinatyi møøt ja kajpxwejpitøjkti, ja'ats jam møk'ampy janty-imy'øø'ndip.

11 Xjats ja Herodes møøt ja tyumbitøjk ta'ajkin'ampy tjemdundi ttedundi ja Jesús, jøts ja tnixe'ekti ttaxe'ekti, ojts wet ja ttuktatøkidi sam møj windsøn wyetin, jøts ja Herodes ja ttaniguejxy ja Pilato jadigojk.

12 Winets ja ñamyigu'ukpøjkidøø jadigojk ja Pilato møøt ja Herodes, namyidsep'ajtidip idø'øn ja wyinaty.

Ku ja Jesús ñidujkiy#ñ jøts ja y'ookt

13 Jøts ja Pilato twaamujky ja teetywindsøndøjkti, ja kudunktøjkti, møøt ja mayjaa'y,

14 jøts ja tnimaay:

—Meets yø jaa'y ya tø xanimiñ jøts mnømdi jøts ku yø' tkajpxma'aty ja jaa'y; tøts xmadowdi ku tø njatiibyiky, jøts niti tundigø'øyin øts yø ngadapøky'ijxy, øy meets yø jade'en xjani'øøni.

15 Nayide'en Herodes yø niti tundigø'øyin tkapaajtxi, ixyats ja tø tkajximbejtñimi jadigojk. Ixats idø'øn x'ejxti jøts ku ka' pyaat'aty jøts yø y'ookt.

16 Nyik'ayo'opts øts inet yø' jøtsnim øts inet yø nyik'awa'atspidsø'ømt.

17 Xumijade'ents idø'øn ja ttundi ku ja xøøw tpaaty, kuwani dø'øn ja Pilato tu'uk ja pøkyjaa'y tjadyimyik'awa'atspidsimy.

18 Jøts ja ni'ijtyi møk'ampy wyambinaxwa'aktøø:

—¡Yikjiwa'ak yø', jøts yø Barrabás ne'egi xyik'awa'atspidsø'ømt!

19 Tsep'ejxp idø'øn ja Barrabás jam wyinaty jam kajpjotp jøts ja tø yikjaa'y'øøky, ja'ats ja kyubuxøjktøjkiyiñ, ja' ja wyinaty tø yiktagudsumi.

20 Yik'awa'atspidsømwampy Pilato ja Jesús, jøts ja ojts tmigajpxy jadigojk ja mayjaa'y;

21 ¿maa?, jawaani møk'ampy ja wyandøø:

—¡Yikruspat! ¡Yikruspat!

22 Xjats ja Pilato midigøøk ojk wyaañ:

—¿Tims yø tyimgyubatp? ¿Ti tundigø'øyin adøm yø tø xtyimdyu'unxim? Ka øts yø nbøky'ixy ti yø tyimgyu'oogip. Ja'ayi øts yø nyik'ayo'ot jøts øts yø nyik'awa'atspidsø'ømt.

23 Jøts ti dø'øn ja tjantyimdyejti, møk ja tyimdyanidi jøts ja tnøjmidi wan tyikruspety; yjanchka'uk'amonidi ja', jøts idø'øn ja teetywindsøndøjk ja jade'en tnanktyuujnidøø sam idø'øn ja wyinaty tyimyjotkida'akti.

24 Winets ja Pilato ja tkupijky sa ja wyinaty tø wya'andi,

25 jøts ja jade'en tyik'awa'atspidsiimy ja jaa'y pøn ja wyinaty tø t'a'ejxidi. Jøts ja pyidsø'ømt ja' pøn jam wyinaty tsumy'ejtp puxøjkjotp, pøn jam wyinaty jade'en tø tkubety ja tyundigø'øyin ku ja wyinaty tø tnankchep'ijxyi ja kajpjaa'y jøts ku ja yikjaa'y'øøky. Xjats idø'øn ja Jesús yikøyajky jøts ja yiktagøðjkiyih'ñ ja mayjaa'y, wan ja ttundi pøni sa ja ttundi chojkingøjxp.

Ku ja nwindson'ajtim Jesús kyiruspejty

26 Kuts ja wyinaty jam tyiknøjkxti ma ja tyikruspattit, winets ja tu'uk tmajtstøø ja jaa'y pøn kugajp'ajtp Cirene, Simón'ajtp ja'. Kyamjotp ja wyinaty chøøn jøts ja ttaguwa'anidøø jøts Jesús kyirus ja tpagøjyit jøts ja ix'oojk ttabayø'øty.

27 Janch may jaa'y idø'øn ja jam wyinaty payø'øyiyip, may ja tø'øxyøjk yjanchya'axti ku ja jotmay ja tyatøkiyidi, ku ja jade'en tyimyiktuñ.

28 Jøts Jesús ja ojts y'ijxyidi jøts ja ñimaajyidøø:

—Meets Jerusaléngit tø'øxyøjkti, kidi ø xkuyaaxidi, kø'ømyi mee mnabyaya'axit jøts ja' m'ejxtip ja m'u'nk m'una'jk, ja' mbaya'axtip.

29 Ja'atp ja et ja xøøw ku pøn wya'ant: “Nekim yø t'ejxti pøn ka'u'nkpattip, pøn nijuuni kayikwidse'etstip, pøn nijuuni y'u'nk tkatsimy'ejttip.”

³⁰ Jøts ja jaa'y wyambinaxwa'aktit: “Ok øts yø tun yø kojpk ne'egi xnijaanit.”

³¹ Jade'en sam øts ixyam n'ayo'ombaaty niti pøkyøjxp, isats ja tyimy'ayo'onbaattit ja Jerusaléngit jaa'y!

³² Namajtsk pøkyjaa'y ja pyaa'yø'øyi ja Jesús jøts ja t'atsmøø'toort.

³³ Kuts ja jam yja'jttoø ma ja et jam txøøw'aty Calavera, jamts ja tyikruspajttoø ja Jesús møøt ja yjanamajtskpi pøkyjaa'y, tu'uk jaty ja adsow aduuk kyiruspajttoø.

³⁴ Kuts ja ixam wyinaty jade'en yikruspatti, xjats ja Jesús wyaañ:

—Dios Teety, maa'kxuk, ka' yø tnijawidi pøni ti yø tyundip.

Jøts ja soldaditøjk ja wet tniguyajttoø midi ja Jesús y'ijty wyet'ajtpy, jøts ja jamyi agø'ømyi twestwa'kxtøø.

³⁵ Ixam idø'on ja mayjaa'y y'a'ejxukti jøts kudunktøjk paat ja ñixi'igyi tyaxi'igyi, yide'en ja wya'andi:

—Tøxi wyenkpi tyiktsø'øky, wants inet yø kø'øm tnankchø'øgyi, pøni janch ja Cristo tam idø'on yø' pøn ja Dios tø y'a'ejxiyi yiknitsokpi.

³⁶ Nayide'en soldaditøjk ja ñixejkmiyøø tyaxejkmiyøø, jam ja wingon wyingunøjkxiyi jøts ja ttuk'uukwa'andi ja vino ta'am,

³⁷ yide'en tnøjmidi:

—Pøni mets tam idø'on mjanchwindsøn'ajtp ya israelit jaa'y ñaxjøøjty kyajpjøøjty, nankñitso'ogits mets jøts mga'ookt.

38 Jøts letri ja jam y'agubajkp yikøxjaay kawinaak jøøjp ja ayuujk, jade'en griego, jade'en latin, jøts hebreo, yide'en ja wya'añ: "Ya'at idø'on tniwindsøn'ajtp israelit jaa'y."

39 Jøts ja pøkyjaa'dyi pøn jam wyinaty kudydi, ja'ats ja nidu'uk migajpxigøøyoø, yide'en ja ñimaajyoø:

—Pøni mCristo tam mets, çti kuts mganankwyinakyi jøts øøts nayide'en xyikwinakt?

40 Jøts ja yjadu'ukpi ojts twi'øjy ja myigu'uk, yide'en ja tniimaay:

—çKa' mets ja Dios x'uktsø'jkiñi? Jabi nayide'ents jam yjaw'i mja'ayo'ombaati.

41 Jøts xpaat'ajtim adøm jade'en jøts adøm jade'en ngu'ayo'owant ja nga'øy'ajtin ti jaty adøm tø ndu'uñin, mats ya'at niti yø tkatuñ ti dø'on yø jade'en kyubejtpy.

42 Jøts ja yjaakwaañ:

—Jesús, xja'myatspim øts ku mja'att jam mgutu-jktaajk jøp'am.

43 Jøts Jesús ja y'adsoojøø:

—Janch øts idø'on nwa'añ jøts ku øts inet nayamyi xmøøtnøjkxt jap tsajpjøtpy.

Ku ja nwindson'ajtim Jesús y'øjky

44 Ja dø'on ja xøøw wyinaty kyuki ku jotmøn kyoodsiyi'ñ, jøts ja et kugoots tyaañ, jaanim xiñiñ jadigojk tigøøk yaxp.

45 Kuts ja xøøw wyingoodsiyi'ñ, jats ja tsaptøjk awejtstuk kujkwa'kxy, winet tyakø'jtsiyi'ñ.

46 Jøts ja Jesús møk'ampy wyaañ:

—Dios Teety, pøjkjø'øgik øts n'anmija'win.

Ja'ayɨ ja jade'en yjaakwaañ jøts ja y'ø'jky.

47 Xjats kuts ja romit soldadi mayut ja tuki'iyi jade'en ojts t'ixy sa jaty idø'øñ yjajty kyubejty, jøts ja tmøja'wiyiñ tkunuu'kxyja'wiyiñ ja Dios, yide'en ja wyaañ:

—Janch øy jaa'y tam idø'øñ yø', ka'ap yø pyøkyjaa'dyi.

48 Pøn jaty jam wyinaty, pøn jaty ja jade'en t'ejxtøø tnija'widøø, niyaxni ja jam cho'onidøø.

49 Jøts pøn jaty ja Jesús ijxy'ajtip, jøts ja tø'øxyøjkti pøn ja jam Galilea wyinaty tø pyadsøøñiyi, ja'ats idø'øñ jam jagam ojts t'a'ejxukti ti jaty tuujnøø jajtøø, wa'ats ja t'ejxkøjxtøø.

Ku ja Jesús ñine'kxy yikpiktaajky jap oo'kpi tsaa jutjøtpy

50 Jamts wyinaty tu'uk ja jaa'y midi janch øy jaa'y'ajtp, ka'ap ja pøn tmidundigøy, José ja xyøøw'ajtpy, jam ja Arimatea kyugajpi, nayjam idø'øñ ja kajp tyañ Judeit etjotp. Nay jamts idø'øñ ja tyuñ jam kutujktaajkjotp ma ja israelit jaa'y kyutujk'adsøøñidi.

51 Y'awijxpyts idø'øñ ja José ja' ja Dios kyutujk midi ja tyanitanaapy yjaa'y, jade'ents ja ka' tkupiky sa ja møøtkutujk'adsinaabyi wyinaty tø y'adø'øtsti.

52 Ja'ats ojts tninijkxy ja Pilato jøts ja t'ats'ijxy jøts ja t'amidoojøø ja Jesús ñine'kx.

53 Kuts ja tyikruswinajky, winets ja tpoopwet'amøjch jøts ja tpiktaajky ma oo'kpi jut ja wyinaty yikxon tø tyik'øyi, tøjku'ngin ja wyinaty tø tpejkxjuty ja tsaa, nipøn oo'kpits jap kyayikpikta'akñim, tyimñay'amaay ja y'ity.

54 Ja'abi xøøwts ja øy ti tjaaktyimdyungøxti jøts t'amaay'atti kyimjabom ja poo'kxin xøøw.

55 Jøts ja tø'øxyøjk ñøjkxtøø pøn wyinaty tø tpadsoondi ja Jesús jam Galilea, jøts ja t'ats'ejxtøø ja oo'kpi jut, ojts ja t'ejxti ku ja oo'kpi jap yikpiktaajky.

56 Kuts ja wyimbejtnidøø, ñøjkxnidi jam tyøjkjotp jøts ja ojts t'a'ejxidi ja pa'akxuu'kpi møøt ja aceite, jødsyim ja t'amaay'atti ja poo'kxin xøøw sam wya'añ ja Dios kyutujk.

24

Ku ja nwindson'ajtim Jesús yujukpyijky jadigojk

1 Kuts ja yjadu'ukpi samaan tyøjkii'ñ, ku myidukxøøw'ajty, winets ja tø'øxyøjk wyimbejttøø jøts ja ñøjkxtøø jøpyi jøpyi mā ja oo'kpi jut jam, jøts ja ojts tyiknøjkxti ja pa'akxuu'kpi midi ja wyinaty tø tyik'øyidi; ojts ja yjadu'ukpi tø'øxyøjk ja tmøødidi.

2 Kuts ja jam yja'jttøø, jøts ja oo'kpi jut ja tpattoø jøts kudam y'agø' ja kya'uknayjamini;

3 tøjkidøø dø'øn ja jam jøts ja ka'ap t'ukpaajtniyidøø ja nwindson'ajtim ñine'kx.

4 Jøts ja yjanchø'jkidøø, nisudso'ampy ja kya'ukwinmaa'nbyatnidi pø ti dø'øn tyu'undip jøts ku ja tjaaktyimy'ejxpattøø namajtsk ja jaa'y jap wingon wyindaniyidi, janch jajp tsamamp ja wyet tmigaxø'økti.

5 Kumì janch tsø'jkidip ja wyinaty jøts ja nugo ñaxkoodøø, yide'en ja ñimaajyidøø:

—¿Jadits ya x'ixa'adi oo'kpi agujky midi tø yjukpyøkni?

6 Ka'ap ja ya pøn, tø ja yjukpyiky. Ja'myatsti sa ja mnimaajyidøø jam Galilea ku ja jaak nay jam wyinaty,

7 ku ja wyaañ jøts ku ka'øy jaa'y ja yiktagidøkit, ku ja kyiruspatt, jøts ku ja kidigøøk xøøw yjukpyøkt.

8 Jøts idø'on ja tjanchja'myajtstøø ja Jesús y'ayuujk sa ja wyinaty tø wya'añ,

9 jøts ja jam cho'ondøø mā ja oo'kpi jut jam jøts ja wyimbejtnidøø, ka'pxy ttamimadyakøjxtøø ja yjanimaktu'ukpi kudanaabyidi jøts pøn jaty jam wyinaty.

10 Ja María Magdalena, jøts ja Juana, jøts ja yjadu'ukpi María midi ja Jacobo tyaak'ajtpy, jøts jadu'uk ja tø'øxyøjkti, ja' dø'on jade'en ojts yjatti jøts ja ttamimadyakøjxtøø ja kudanaabyitøjkti.

11 Jøts ja kudanaabyitøjkti ka'ap ja tmibøkti ku ja tø'øxyøjk ja jade'en tyamimadya'agyidi pø sa ja tijy yjatti.

12 Xjats ja Pedro chøø'ñ jøts ja ojts pyujtnijkxy mā ja oo'kpi jut jam. Kuts ja kyu'ejxiyii'ñ jøts ja t'ejxpaaity ja poop wet jøts ku ja jagam wyøjnaañi. Kuts ja wyimbijty tyøjkjotp jøts ja janch ñigyumaap tja'wiyii'ñ ku dø'on ja wyinaty jade'en tø yjaty.

Ku ja nwindson'ajtim Jesús ñanky'ijxyi jam Emaús tuu'am

13 Wïnets ja pabøjkpitøjk namajtsk nay ja'abi xøøw ñøjkxti jam mā kajp txøøw'aty Emaús, tuk'ajopyø'øyu'ngin idø'on ja tyø'ødyi ku choondi jam Jerusalén jøts ja jam ñøjkxti.

14 Ja' ja jam wyinaty ñigajpxtip ñimadyaktip sa dø'on jade'en wyinaty tø yjaty;

15 ixam idø'øñ ja kyajpxti myadya'akti wyinaty, ja' ja jam kyajpxy'ajttip ku Jesús ja ñimejnidøø wingon jøts ja myøøtyø'øydøø.

16 Yja'ejxtip ja wa'ats, jadi'iñits ja yikmøñidi yik-tukyidi pø pøn ja jade'en.

17 Xjats Jesús ja yiktøjidøø:

—¿Ti dø'øñ ja jaa mgajpxy'ajttip ku ixa jade'en mduu'yø'ødyi? ¿Ti mdajotmay'oo'ktip, sã mjatti?

18 Xjats ja nidu'ugin y'adsoodøø, ja Cleofas idø'øñ waan:

—Tyumnija'widip ja jaa'y ixyam ti tø tyuñi yjaty: jam Jerusalén. ¿Kidi mets mjam'ajty, pø mets inet idø'øñ ja nadyu'uk mganija'wip?

19 Jøts ja ñimaajyidøø:

—¿Timts jam ti yjaty?

Jøts ja tnimaadyøø:

—Ja Jesús øøts idø'øñ ndijpy, ja Nazaretit jaa'y, midi Dios Teety yikmøjkugajpxy'ajtip ku ja tkajpxwa'kxy ja y'ixpøjkin u ku ja ti ttuñ. ¿Ti ja kya'ukajtpy? Myinajxpts ja jam Dios wyingujkp, jøts nayide'en mā naxwii'ñit jaa'dyi.

20 Ja teetywindsøndøjk ja tø tkøyakti møøt ja nwindsøndøjkti jøts ja yiktaguwanit ja o'jkin jøts kyiruspatt.

21 Ja' øøts ja jaa ndyimy'ukjøp'iixpy jøts ja jekyip tnigubøky yø Israelit naajx yø Israelit kajp. Ixyamts ja tyigøøkxøøwip jade'en yjajtni.

22 Øy øøts ja tø'øxyøjk winaaagin tø xjanøjmi adsø'jkibim, ku ja tø y'ats'otsti ixyam jøpy mā ja oo'kpi jut jam,

23 ka'abik ja tø tpaatti ja Jesús ñine'kx, jøts øøts ja tø xninijkxy, tuki'iyi tø xamimadyakixy jøts ku ja tø

t'ejxti namajtsk ja ankilis jødsik ja tø ñi'mxyidi jøts ku ja Jesús yjuky'aty.

24 Winets øøts ja nmigu'uk winaagin jaty tø yjanøjkxti mā ja oo'kpi jut jam, jødsik ja jam jade'en tø tjanchpaatti sã ja tø'øxyøjk tø tñigajpxti, ka'adsik ja mā tø t'ejxti ja Jesús.

25 Xjanimts Jesús ja ñimaajyidøø:

—iNiwine'enin mjanchkaja'gyukidi, meets tsaachkujuunjaa'dyi, jeky meets ja xøøw ja jumøjt ja xukminaxy jøtsnim meets ja xjanchjawit sã jaty ja Dios kyugajpxy wyandøø!

26 Jabi kuwañimxi tyimbyaat'aty ja Cristo jøts ja jawyeen y'ayo'ombaatt jøtsnim ja tpaatt ja windsø'jkin winja'win o mādsøø.

27 Xjats ja Jesús tyukmadoobinaxwa'jkidøø sã ja Dios kyajpxy wya'añ mā jaty ja jap yiknigajpxy tøøyip, ja' ja ñigajpxøjkiyi'ñ sã wya'añ midi ja Moisés ja Dios tukjajyøø jøts ja tñigajpxkijxy sã jaty ja yjadu'ukpi kugajpxy wyinaty ja Dios tø tyukjaadyañidi.

28 Kuts ja jam kyajptøjkidøø mā dø'on ja jam wyinaty yja'atwa'andi jøts ja Jesús yjaaktyimñøjkxwa'añ, tyimñaxwamp ja jam.

29 Jøts kuwani tyiktandøø, yide'en ja tñimaadyøø:

—Møøt tank øøts ya, pø tøts chuu'jini, koodsiwyanipts.

Xjats ja Jesús ja jam jade'eñi myøøtaajnidøø.

30 Kuts ja tmøøt'ixaktøø, tø wyinaty twinguwaadsidi ja kaabyajt, ixam ja chinaañidi ku ja tñixajiyi'ñ ja tsapkaaky, jøts ja ojts tkunuu'kxy, jøts ja t'adujkpaiky, jøts ja tyagiko'oniyidøø.

31 Winets wyeen ja nay jatyi wyatstøø, jøts ja t'ejxkajptøø jøts kudam ja' Cristo; jøts ja nay jatyi ñanky'ejxigø'øñiyi.

32 Jøts ja ñawyaajnidøø:

—Kidi janchjotkujk adøm yø tø xyikjajtyim ku tuu'ajy tø xamimadyaajkyim ja Dios kyajpxy.

33 Xjats ja niwine'enin kyata'anidøø kya'amøjkidøø, jatyi ja jadigojk tyuu'døjkidøø jøts ja wyimbejtøø jam Jerusalén, jamts ja tpatøø ja ñimaktu'ukpi kudanaabyidi, tø ja jam wyinaty ñamyukyidi møøt ja myigu'uktøjkti.

34 Jøts ja ñimaajyidøø:

—Janch tøts ja nwindson'ajtim yjujkpyiky, yø Simón tø tyimyi'ixy.

35 Jøts yja' ja tñimadyakmidøø sa ja wyinaty tø yjätti kyubatti jam tuu'am, jøts sudso ja wyinaty tø t'ejxkapti ja Jesús ku ja t'adujkpajky ja tsapkaaky.

Ku ja nwindson'ajtim Jesús ñanky'ijxyi ma ja pyabøjkpitøjk jam

36 Ixamni dø'øn ja wyinaty jade'en ñawya'añidi ku ja Jesús jam ñanky'ejxøø jadigojk ja' y'agujk'amdi ma ja jam wyinaty, jøts ja ojs kyajpxpoo'kxidi, yide'en ja ñimaajyidøø:

—Dios mjagyepyidi.

37 Jadi'iñi ja myondi tyukti, tsø'øgi ja jadi'iñi yikmajadaktip, jade'en ja wyinmaydi pø nugo ja tijy y'ejxjooxti.

38 Yide'en ja Jesús ja ñimaajyidøø:

—¿Tigøjxp ku mdsø'øgidi, ti mdsø'jkidip? ¿Tiku xkajanchjawidi?

39 Ejxidik øts ngø' ndeky. Pø øtsts idø'øn kø'øm. Tondik øts, ejxtik øts; pø ka'ats ejxma'jtin ñine'kx

møødi, ni pyajk niti ja jade'en kya'ejtxi, sam meets ixyam x'ijxy tuki'iyi nmøøt'aty.

⁴⁰ Kuts ja jade'en tyukmadojidøø jøts kyø' tyeky ja tnanky'eixøø.

⁴¹ Kumi nika'anims ja wyinaty yikxon ttajotkukidi jøts ja tjanchjawidit, jade'en ja xyonda'akti, jade'en ñigyumaap tja'wi'adøøtsti, xjats Jesús ja ñimaajyidøø:

—¿Ka'ap ja ti jii'kxy xmøødidi?

⁴² Jøts ja tmøødyøø tukupidasi ja ajkxtsa'ayu'nk møøt ja jømbya'aku'nk,

⁴³ jøts ja t'axajiyii'ñ jøts ja ojts jami tji'kxy ja wyindumdi.

⁴⁴ Winets ja ñimaajyidøø:

—Jade'en øts idøøn tø njaty sa meets ojts ndukmadøyin ku meets ja y'ijty njaakmøøtwidity, jøts ku øts jade'en wyinaty njatwa'añ sa øts jap nyiknigajpxy ma ja kutujk Moisés Dios tyukjajyøø, jøts nayide'en jap nøkyjøtpy midi ja yjadu'ukpi kugajpxy yjaadyandøø, jøts nayide'en sa ja nøky tnigajpxy jap Salmosjøtpy.

⁴⁵ Xjats ja Dios kyajpxy ja tyukja'gyukiyidøø,

⁴⁶ yide'en ja ñimaajyidøø:

—Jade'en jap yja'ayi jøts ku ja Cristo y'oockt, kyidigøøk xøøwts ja yjujkpyøkt ku o'jkin ja tja'uk'ext;

⁴⁷ jøts ja yiknigajpxwa'kxt o manaajx o magajp, ku ja ya Jerusalén cho'onda'akt jawyeen, jøts ku ja'agøjxp yiknøjmidit o pøn, wan ja chinaa'yin tyiktigatsti jøts yikpojkipimaa'kxtit.

⁴⁸ Meets, wa'ats mdyimy'ijxpy mdyimñija'wip sa jaty tuki'iyi tyuñi yjatyi.

49 Madowdits, ndanigaxp meets ja' midi øts ja Dios Teety tø xamiwandaagi; yaayits meets m'awext ya Jerusaléngit kajpjøøjty kunim ja mbaadidit ja møk'ajtin midi jap tsajpjøtpy kidakp.

Ku nwindson'ajtim Jesús chajpejty

50 Xjats idø'øn Jesús ja jam kajpjotp wyaabidsøøjmidøø, jøts ja yiknøjkxidøø jam Betania, ojts kyø' ja tyanixajyidi jøts ja kyunuu'kxidøø.

51 Kuts ja jade'en kyunuu'kxidøø, jøts ja myajt-stujtidøø, jøts ja chajpejty.

52 Jøts ku ja wyinaty tø t'ukwindsø'øgidi t'ukwinjawidi, xjats ja ojts wyimbejtnidi ñøjkxnidi jotkujk'atyim jam Jerusalén,

53 xumijam'ajttip idø'øn ja' jam tsaptøjkjotp jøts ja jam tmøjawidi tkunuu'kxyjawidi ja Dios. Jade'en ja y'ejxi tyiyi.

**Ja øgyajpxy ja ømyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

422dcf73-46a5-5403-b423-8406ed76ac1d